

**CA TITSA' TSE' NU CCA QUI'
JESUCRISTUA NU BEDIA SAN
LUCAS
El Santo Evangelio Según
SAN LUCAS**

¹ Nuỹetse' ca enne' chi beni cabi duel·la' gudía cabi en orden historia qui' ca cosa nu hualigani uccua entre ri'u, ² ti'taání chi nabia'ni ri'u por medio de predicación qui' ca enne' bila'ni ca cosı̄ dèsdèba gudulo uccua çà. ³ A'hua inte', bitola de chi uccua tsì'a' saber acerca de iyaba ca cosı̄ ti'iyá uccua loti' gudulo çà, acca rú'u huá látsa'a' gùdia ya' çà en orden ba para lu' estimado Teófilo, ⁴ para qui'ni gunibiá' tsè' lu' nu ná lígani sobre de nu chi beluè'ni çà lu'.

⁵ Loti' uccua Herodes rey le' distrito nu lá Judea nna, gùdua ttu sacerdote le' grupo qui' Abias lá bi Zacarías. Niula qui' bía nna lá bi Elisabet, dá'tia' huá bi dèsdèba le' familia qui' Aarón enne' uccua sacerdote primérute tiempo antigua. ⁶ Chuppa taá cabi nna yala èxani gutsé'e cabi lani Tata Dios, gutua cabi iyaba ca mandamiento qui'e nna labí biyá mal beni cabi. ⁷ Pero lanú yí'ni cabi uccua, porqui'ni Elisabet nna uccua bi niula huètsì. Chuppa taá cabi nna chi ná cabi enne' gùla. ⁸ Ttu vuelta nna de gùl·la' ládi grupo qui' Zacarías para guni cabi tsina nu runi ttu sacerdote tiempo lánia para guni cabi Tata Dios servir; ⁹ ti'a ná bá costum-bre qui' ca sacerdotéa nna gùl·la' huá Zacarías gá'a

bi le' templo qui' Señor para gudàyi bi tì'a ttu cosa nu ná yàlá'. ¹⁰ Iyaba ca enne' yětse'á nna gulèda cą fuera nna beni cą oración miéntraste ral·la' yàlá'á. ¹¹ Làniana de repente taá gùdu ttu ángel enne' guthel·la' Señor ru'a lo Zacarías lado bàni qui' altar làti ral·la' yàlá'á. ¹² Zacarías nna bilá' báni bi ángelia, gálá gání tsía bi ùccuanì bi de tántua gutsini bi. ¹³ Pero ángelia nna rèe bi: Zacarías, bittu gátsini lu'. Chi biyénini Tata Dios oración qui' lu', acca niula qui' lu' Elisabet nna gúditsina' bi ttu nító', quixa lu' lá bi Juan. ¹⁴ Yala la' redacca' latsi' gáta'ni lu', a'hua canchu chi galia bi nna enne' yětse'ní nna edacca' huáni cą, ¹⁵ porqui'ni ccá bi enne' ýeni para lani Tata Dios. Labí í'ya bi vino nihua biya licor ni nna. Sino Espíritu Santo nna thúe lani bi dèdèba ántescala galia bi. ¹⁶ A'hua por medio de làbi nna, nuýtse' ca enne' Israel eyeqquia cą lani Señor enne' ná Dios qui' quí. ¹⁷ Ýi'ni lu' Juan nna tsía bi lani la'a mísmuba espíritu de la' huacca nu guta' qui' Elías para gútse'e tsè' bi ca tàta lani ca ýi'ni quí, a'hua para qui'ni canu cabezudo nna guthete' cą guni cą nu ná tsè' ru'a lo Tata Dios. Anía modo nna guni bi preparar ttu yetsi para guni cą recibir Señor enne' íl·lani bitola. ¹⁸ Zacarías nna ra tè bi ángelia: Ti'ani modo tsíalátsa'a' nui ni'í, porqui'ni inte' nna chi ná' enne' gùla, a'hua niula quíya'a nna yala chi dia ida quí'í. ¹⁹ Becàbi ángelia nna ra bi: Inte' ná' Gabriel, runia' servir Tata Dios. Lèe nna guthel·le'e inte' para qui'ni ínnía' lani lu' nna quixa'ánia' lu' ca noticia tsè'. ²⁰ Pero annana eyà'na lu' mudo labiru cca inne lu' hàsta'na i'yu tsá qui'ni ccá ca cosí, porqui'ni labí huíalatsi' lu'

ca titsa' quíy'i'í, pero hui'yu bá tsá ná qui'ni ccá cumplir nu chí gutixa'ánia' lu'.

²¹ Ca enne' yétsiá nna tsè'e bá cą fuera ribèda cą Zacarías, yala nùŷe uccuani cą porqui'ni ritsá bá bi le' templua. ²² De beria bi nna labiru uccua inne bi lani cą, acca gutelíni cą qui'ni bila'ni bi nuŷa ttu ángel le' templua. Gunne tènì Zacarías cą puro lani seña ba, puesto qui'ni beyà'na bi mudo. ²³ Bedá'a diba tsá nu ná qui'ni guni Zacarías servir le' templua nna, acca beyya bi para litsi' bi. ²⁴ Bitola de lània nna gutebé'ni niula qui' bía qui'ni nùà' bi huatsa to', acca gùdua bi le' yú'u por gayu' biú' nna ra bi: ²⁵ Por fin nna beni Señor Dios permitir nui lani inte', para qui'ni bíttuúru quiniyu ca enne' inte'.

²⁶ Cca xuppa biú'a nna guthel·la' Tata Dios ángel Gabriel le' región qui' Galilea hàstaá ttu yetsi láą Nazaret, ²⁷ làti dua ttu niula chì' nábabáni ttu ènne'yu' bi lá bi José. Joséa nna dá'tia' bi dèsdeba le' familia qui' David enne' uccua rey. Niuláa nna lá bi María. ²⁸ Gutà'a tè ángelia làti dua María nna benie bi saludar nna rée bi: Yala ica'rubà lu', porqui'ni Señor Dios nna dùe lani lu' a'hua adí bendecir chi runie lu' de lo iyaba ca niula. ²⁹ Pero María de bilá'ni bi ángelia nna uccuaŷí bá latsi' bi por titsa' qui'éa, acca uccuani bi: Biadi' lo acca beni enni'í inte' saludar í. ³⁰ Làniana ra tè ángelia bi: María, bittu gátsini lu', porqui'ni chi gùppa lu' favor ru'a lo Tata Dios. ³¹ Acca huá' lu' ttu nító' nna; canchu chí itsine'e nna quixa lu' lée JESUS. ³² Lèe nna quée enne' ŷeni porqui'ni née ŷi'ni Tata Dios Tsùna' enne' rigú'ubia' lo iyate nna gunie qui'ni quée rey tì'a ta' tata qui'e David enne' gùdua

tiempo antigua. ³³ Lèe nna cu'úbi'e naciòn qui' ca enne' Israel tulidà taá, a'hua la' rigú'ubia' qui'e nna nunca labí l·luỹa latsi'ì. ³⁴ Làniana ra tè María ángelia: Ti'ani modo ccá nui ni'i, porqui'ni labí chi nabia' te' ènne'yu'. ³⁵ Angelia nna ra tìe bi: Espíritu Santo nna chádìe sobre lu' nna íl·lani la' huacca qui' Tata Dios enne' dua ÿiabara', ti'a ttu ÿula làti dua lu'; acca enne' galia nna quée para Tata Dios nna gata' lée ÿi'ni Tata Dios. ³⁶ A'hua pariente qui' lu' Elisabet enne' reya ca niula huètsia nna, chi dia para xuppa biú' nùà' bi huatsa to' màsqi'ba chi ná bi enne' gùla. ³⁷ Porqui'ni labí biỹa té nu ná tàbi para lani Tata Dios. ³⁸ Làniana ra tè Maríaá: Nì ba dua' para ccá' huenitsina qui' Señor Dios, ccá bá lani inte' según bá nu ra cuiã'lu'. Làniana beda' ángelia ru'a lo bi.

³⁹ Bitola nna biria Maríaá na huía chì bi le' ttu yetsi nu ga'nã le' ca i'ya tó' qui' distrito nu lá Judea. ⁴⁰ Gutà'a tè bi litsi' Zacarías nna beni bi Elisabet saludar. ⁴¹ Tiémpua de biyénini Elisabet saludo qui' María nna, huatsa to' nùà' bíá nna bitsiániã lè'e bi por la' redacca' latsi'. Làniana Elisabet, de beni bi recibir la'huacca qui' Espíritu Santo nna, ⁴² gunne bi idìtsa nna ra bi María: De lo iyaba ca niula nna adila bendecir beni Señor lu' a'hua huatsa to' nùà' lù'a'. ⁴³ Ti'ani modo acca rídíá' tanto favor hasta qui'ni lu' nàna qui' enne' gunna salvaciòn quia' nna tanèl·le' lu' inte'. ⁴⁴ Porqui'ni beni diba lu' inte' saludar nna, huatsa to' núá' yì'ì nna bitsiáni bi lí'a'. ⁴⁵ Ica'rubà lu' porqui'ni ríalatsi' lu'; porqui'ni huacca cumplir nu chì ra Señor Dios qui' rí'ua. ⁴⁶ Làniana gunne María nna ra bi:
Lani itute látsa'a' rudálianía' Señor,

- 47 A'hua tanto la' redacca' latsi' té lo lóstu'a',
porqui'ni lèe nna née Dios enne' gunna sal-
vación quia'.
- 48 Chi gulèqqie inte' cuenta para gunia' servir ru'a
lúe, màsqui'ba labí dacca'a'.
- A'hua dèsdeba anna iyaba ca enne' nna gá çà inte':
Ica'rubà lu'.
- 49 Porqui'ni Tata Dios enne' té itute la'huacca qui'e
nna, chi benie ca cosa yñenitse' para inte',
yala santo ná nombre qui'e.
- 50 Tulidàni té la' retúalatsi' qui'e
para lani iyaba canu runi ti'na nu calatsi'e.
- 51 Ca cosa nu chi benie nna rulue'ní qui'ni yala
la'huacca té qui'e. Gùtue la'huacca qui' canu
yala rebatta', benie çà vencer.
- 52 Gùtue la' huacca qui' canu rigú'ubia' nna bete tie
la' dàliani qui' ca enne' yñenlatsi'.
- 53 Canu ritùni nna guthel·le'e la' tsè' qui' qui, hàstaá
qui'ni labiru biyã reyàtsani çà.
Pero canu rico nna, de una vez tení bequètsie ná
qui'.
- 54 Benie ri'u cualani porqui'ni ná ri'u yetsi qui'e
Israel para guni ri'u e servir nna labí betu
la' retúalatsi' qui'e lani ri'u,
- 55 Tì'a nu benie prometer lani ca ta' tàta qui' rí'ua,
dèsdeba lani Abraham, a'hua lani iyaba ca
descendencia qui' bi tulidàni.
- 56 Gudua tè María lani Elisabet ttú tsunna biú' ti'gá.
Bitola nna beyéqqia bi litsi' bi.
- 57 Bi'yu bá tsá ná qui'ni itsina' huatsa to' qui'
Elisabet nna beditsina' tè bi ttu nubeyu' to' qui' bi.
- 58 De bina ca vecínua a'hua ca pariente qui' Elisabet
qui'ni beni Tata Dios bi bendecir lani ttu nubeyu'

to', yala bedacca' latsi' quì nna huía cạ litsi' bi. ⁵⁹ De uccuani huátsáa xunu' ubitsa nna huía cabi para ccá huátsáa circuncidar de beni cabi ạ presentar lani Tata Dios. Uccua latsi' cabí gata' láa huátsáa Zacarías ti'ba lá tàta qui' bía. ⁶⁰ Pero Elisabet nàna qui' huátsáa nna ra bi: Alàa ạ', sino Juan la gata' líj. ⁶¹ Ra tè cạ bi: Bianicca ni'i, lanú pariente qui' lu' té lá ạ'. ⁶² Làniana gunàba titsa' cạ tàta qui' huátsáa lani seña biỹa calatsi' bi gata' líj. ⁶³ Gunàba tè bi ttu bereta nna bedia bi lúj: Juan té líj. Iyaba cạ nna yala biquila' latsi' quì. ⁶⁴ Lànìa taá nna benne Zacarías nna gudulo bi bedàliani bi Tata Dios. ⁶⁵ Iyaba ca vecino qui' bía nna yala biquila' latsi' quì. Làniana le' ituba lugar i'ya tó' qui' distrito nu lá Judea gudà titsa' de iyaba nu uccua. ⁶⁶ Iyaba canu bina nu uccua nna yala belaba latsi' quì ạ'hua gunàba titsa' luetsi quì nna ra cạ: Núgani i'yu' huátsíj quée cá. Anía ra cạ porqui'ni Señor Dios nna hualigani benie huátsáa bendecir.

⁶⁷ Zacarías enne' uccua tàta qui' huátsáa nna guỹi' bi la'huacca qui' Espíritu Santo nna gunne bi ca titsa' nu beni Tata Dios latsi' bi inne bi nna ra bi:

⁶⁸ Bendito Señor Dios qui' ca enne' Israel, porqui'ni chi due entre ri'u nu ná ri'u yetsi qui'e nna, chi bedilèe ri'u.

⁶⁹ Chi guthèl-le'e ttu enne' té la'huacca qui'e para gudilèe ri'u nna dé'e le' familia qui' siervo qui'e David.

⁷⁰ Anía benie prometer por nu gunne ca enne' uccua profeta qui'e dèdèba chía gutsa.

⁷¹ Rèe qui'ni gudilèe ri'u latsi' ná' ca contrario qui' rí'ua, ạ'hua latsi' ná' iyaba canu ruyudí' cạ ri'u.

- 72 Ra huée qui'ni éxalatsi'e nu benie prometer lani ca ta' tàta qui' rí'ua porqui'ni retúalatsi'e cabi nna labí iýul·lanie promesa lígani nu benie lani cabi.
- 73 Nui nna ná titsa' tsè'ni nu gunne Tata Dios lani ta' tàta qui' ri'u Abraham chia gutsa loti' rée
- 74 qui'ni gudilèe ri'u latsi' ná' ca contrario qui' ri'u, para qui'ni guni ri'u e servir sin la' rátsilatsi',
- 75 Para qui'ni tsé'e ri'u ru'a lúe lani ttu losto' nàri de runi ri'u nu rú'ulatsi'e itúýiani ca tsá ccabàni ri'u.
- 76 Lu' nna nító' quia', ccá lu' profeta para quixa'a lu' ca titsa' qui' Tata Dios enne' dua ýiabara'. Porqui'ni ya'la la lu' tsía para guni lu' preparar ca néda para qui'ni guni ca enne' Señor recibir.
- 77 Anía modo nna quixá'ani lu' yetsi què'e titsa' nu gunna salvación qui' quí, para qui'ni eyuniýén latsi'e ca tul·la' qui' quí.
- 78 Por tántuani la' retúalatsi' qui' Tata Dios lani ri'u nna, chi benie qui'ni huàni' ttu tsá cubi para ri'u.
- 79 Para qui'ni canu tsè'e le' chul·la, a'hua canu tsè'e le' ýula qui' lù'utia nna gudani' ràbani la'yani' lo losto' quí. A'hua íchi'e ri'u lo néda lígani nu runna la'ýeni.
- 80 Conforme dia ba Juáan riýeni bi nna guta' huá adí fuerza espiritual qui' bi. Gureni tè bi fuera yétsiá hàstaá qui'ni bi'yu tsá cca bi presentar lani ca enne' Israel.

2

¹ Tiempo lània nna beni Augusto César orden qui'ni ituba làti rigú'ubia'ą nna ichìtha cą censo.

² Primer cénsuį nna uccuą loti' Cirenio ną gobernador qui' nación láą Siria. ³ Iyaba ca enni'a nna ná qui'ni eyya ttu ttu tsa çą le' yetsi qui' qui para qui'ni gute cuenta láa quį. ⁴ Acca beria tè Joséa le' yetsi Nazaret de Galilea nna beyya bi attu distritu huaya' láą Judea hàstaá ttu yetsi láą Belén, la'a mísmuba yetsi làti bitsina' David. Joséa nna huía bi Belén porqui'ni ná bí descendiente lígani qui' David nna, ⁵ huía bi nía para gute cuenta láa bi. María enne' chì' nábabáni bi para ccá bi niula qui' bi nna huía bi lani bi. María nna chi nùà' bi huatsa to'. ⁶ Le' yetsi Belén bá tsè'e cabí nna, gùl-la' tiempo nu ná qui'ni itsina' huatsa to' qui' Maríaá. ⁷ Bitsina' tè ttu nubeyu' to' ýi'ni neru bi nna, betetsí tè bi e lari' nna gutixa bi e le' ttu yú'u làti ro ca gù'na bia', porqui'ni labí lugar té le' yú'u posádaá para làcabi.

⁸ Tsè'e tè tuchùppa ca pastor exa gáabá yetsi Belén, rappa çą ca carnero qui' caniá de réla. ⁹ De repente taá nna bitsina' ttu ángel por mandado qui' Señor nna gùdu bi làti tsè'e canaá. La'yani qui' Señor nna bedàni'e ìta'lùba làti tsè'e canaá nna yala gutsini çą. ¹⁰ Angelia nna ra tè bi çą: Bittu gátsini le, porqui'ni annana quixa'ánia' le ca titsa' de la' redacca' latsi' para iyaba ca enne': ¹¹ Porqui'ni annana le' yetsi Belén méruani yetsi qui' ta' tàta qui' le David nna chi gùlia ttu nito' enne' quée Salvador qui' le nna née CRISTO enne' cu'úbia' lo iyate. ¹² Iį modo nna etseláni li e: Taxacca' le nítú'a túbie lári' tíe le' ttu yú'u làti ro ca gù'na bia'.

¹³ De repente tabá nna bitsina' adí iýé mili' ca ángel qui' ýiabara' làti du ángelia nna, bedàliani cabi Tata Dios nna ra cabi:

¹⁴ La' dàliani para Tata Dios enne' dua le' ýiabara',

Para yétsiloyu nna voluntad tsè' nna la'ÿeni lo losto' iyaba ca enne'.

15 Bedà' bá ca ángelia deyya cabi ÿiabara' nna, làniana ra luetsi ca pastor: Léya' xìatsánna hàstaá Belén para ilá'ni ri'u nu uccua nu chi gutixa'áni Señor ri'u. 16 Deyya tè ca quèthani nna betseláni ca María nna Joséa nna, nítú'a nna tíe le' ttu yú'u làti ro ca gù'na bia'. 17 De bila'ni ca huátsáa nna gutixa'áni ca cabi tì'a chi ra ángelia nu cca qui' huátsáa. 18 Iyaba canu biyénini nna biquíla' bá latsi' qui' por nu ra ca pastor. 19 María nna yala belaba latsi' bi nna tulidàba bexa latsi' bi ca così. 20 Bedà' tè ca pastor nna deyya ca attu làti tsè'e ca carnero qui' caníá nna bedàliani ca Tata Dios nna bè' ca ne gracia por iyaba ca cosa nu chi biyénini ca nna bilá'ni ca nna, porqui'ni uccua cumplir tì' taání gutixa'áni ca ángelia ca.

21 De uccuani huátsáa xunu' ubitsa nna, beni cabi e circuncidar nna gutixa cabi lée JESUS, tì'a chi ra ángelia ántescala huá' Maríaá huatsa tú'a. 22 María nna Joséa nna gulèda cabi gutè tiempo señalado tì'ba ga'na escrito lo ley qui' Moisés para ccá cabi purificar de chi beditsìna' bi ttu huatsa to'. Bitola nna huía cabi lani huátsáa Jerusalén para guni cabi e dedicar lani Tata Dios, 23 tì'a ga'na bá escrito lo ley qui' Señor: Iyábani ca nubeyu' néru to' nna ná qui'ni ccá ca yà'latsi' para guni ca Señor servir. 24 A'hua huía cabi para guni cabi ofrecer nu beni Señor mandado lo ley qui'e: chuppa ca tortolita o chuppa ca becha to'. 25 Gùdua tè ttu ènne'yu' le' Jerusalén lá bi Simeón, tulidàba beni bi nu rú'ulatsi' Tata Dios nna beni bi e adorar. Por iÿé

ida nna gulèda bi íl·lani enne' gúnná bendición qui' ca enne' Israel. La'huacca qui' Espíritu Santo nna gùdue lani bi; ²⁶ acca uccua bi saber qui'ni labí gatti bi sin qui'ni làa ilá' yáni bi Cristo enne' ná qui'ni ithèl·la' Señor Dios. ²⁷ Espíritu Santo nna benie latsi' Simeón tsía bi le' templua. Loti' Joséa nna Maríaá nna bitsina' cabi lani Jesús le' templua para guni cabi e presentar según nu ná bá costumbre nu ra lo ley, ²⁸ guỹi' tè Simeón nitú'a nna gul·láni bi e nna bedàliani bi Tata Dios nna ra bi:

²⁹ Annana Señor, bedi' bá cuią'lu' inte' siervo qui' cuią'lu' porqui'ni chi guta' la'ỹeni quia' de chi bì'yu tsá uccua cumplir titsa' qui' cuią'lu' lani inte'.

³⁰ Porqui'ni lani propio gani íyyalua' chi bilá' te' Enne' gudilèe intu'.

³¹ Guthèl·la' cuią'lu' e para iyáỹianica enne'.

³² Porqui'ni ná huée la'yani' para ca enne' qui' adí ca nacitn.

Por lèe nna tháliani yetsi qui' cuią'lu' Israel.

³³ Joséa nna Maríaá nna biquila' bá latsi' cabi por nu ra Simeón qui' huatsa to' qui' cabía. ³⁴ Simeón nna gunàba bi bendición para làcabi lani Tata Dios. Làniana ra tè bi nàna qui' huátsáa: Huátsíi nna née destinado para qui'ni nuỹetse' ca enne' Israel nitti cą porqui'ni labí tsíalatsi' qui; ą'hua para qui'ni adí cą nna eyacca cą arrepentir nna l·lá cą. Lèe nna née ttu señal nu guthèl·la' Tata Dios atsi'íni nuỹetse' ca enne' inne cą mal còntre; ³⁵ ą' modo nna telini iyaba nu rulaba latsi' ttu ttu ca enne'. Nui nna ccą ttu tristeza tì'a ttu espada nu ttíą latsi' lo losto' lu'.

³⁶ Gùdua huá ttu niula nía lá bi Ana, yí'ni Fanuel, díátia' bi familia qui' ta' enne' gùla qui' cabi Aser

enne' gùdua chĩa gutsà. Enne' lá Anaá nna gutixà'a huá bí ca títsa' qui' Tata Dios. Yala enne' gùla chi ná bi. De uccua bi cuítì'a nna bettsa gálaaná' bi, pero gàtsi ida teruba guýua cabi nna gùtti tsèlà bíá. ³⁷ Ochenta y cuatro ìdani bi, a'hua ituba tiempo de ná bi viúdaá nna tulidàba huía bi templua nna beni bi Tata Dios adorar réla rítsaní nna gutua bi labí gutò bi nna, yala enne' de oración uccua bi. ³⁸ Méruani hóraá bitsina' bi le' templua nna yala gracia bè' bi Tata Dios nna gunne bi qui' nu cca qui' nítú'a lani iyaba canu ribeda huá çá íl·lani enne' gudilèe iyaba ca enne' Jerusalén.

³⁹ Joséa lani María nna beni diba cabi cumplir iyaba nu ra lo ley qui' Señor nna beyeqquia cabi yetsi qui' cabi Nazaret región qui' Galilea. ⁴⁰ Conforme dia ba huátsáa riýenie nna, guta' huá adí la'huacca qui'e, a'hua yàlani la' riyeni tsè' gutà'nie. Tata Dios nna yala uccuatsí'ínie bi.

⁴¹ Ttu ttu ìdani nna huía Joséa nna María nna ciudad Jerusalén para guttè cabi nía fiesta láa Pascua. ⁴² De uccuani Jesús tsì'nu ida nna, huía cabi Jerusalén attu para guttè cabi fiéstaá tì'a ná bá costumbre qui' cabi. ⁴³ Gutè bá fiéstaá nna beda' tè cabi nía. Huátsáa nna beyà'na bée Jerusalén, pero Joséa nna nàna qui'áa nna labí gutébe'ni cabi. ⁴⁴ Rulaba tè latsi' cabi qui'ni látsi'e ca enne' ýétse'á. De chi guda' cabi ttu tsá nna gudulo cabi beyíla cabi e entre ca pariente qui' cabía nna a'hua entre adí canu nabia'ni cabi. ⁴⁵ Pero labí betseláni cabi e, acca beyéqquia cabi Jerusalén nna beyíla cabi e. ⁴⁶ Guttè diba tsunna ubitsa gutsé'e cabi hueyíla Jesús nna, betseláni cabi e le' templua, ri'e làhui' ca

maestro nu nabia' tsè'gani itúbani nu ra lo ley, rudà nàgue'e qui' qui' nna gunàba titsa' huée ça nna. ⁴⁷Iyaba canu biyé'nini nu rée nna yala biquila' latsi' qui' de tántua la' riyeni tsè' té qui'e, ą'hua de tántua tsè' becàbinie ça. ⁴⁸Bilá' báni Joséa nna María nna yala uccuaýi' latsi' cabi. Acca nàna qui'áa nna ra bi e: Ýi'nia', bianicca bethácca' lu' intu' ą' ni'i. Tata qui' lù'į nna inte' nna yala lani la' rehuini' latsi' chi beyila tu' lu'. ⁴⁹Jesús nna rée cabi: Bianicca beyila le inte' ni'i. Tsílàa yù huá le qui'ni lo tsina qui' Tata qui'a nna té qui'ni thúa' cá. ⁵⁰Pero làcabi nna labí gutéelni cabi biýa nuá rée cabi. ⁵¹Làniana deyya tie lani cabi nna betsina' cabi le' yetsi Nazaret. Yala obediente benie seguir lani cabi. Nàna qui'áa nna liú'u losto' ba bi yala belaba latsi' bi iyaba ca coş. ⁵²Jesús nna conforme riýeni bée nna rata' huá adí la' riyeni tsè' qui'e, ą'hua Tata Dios nna yala guyú'u latsi'e nu benie; ą'hua iyaba ca enne' nna beni ça ne estimar.

3

¹ De uccua tsìnu' ida rigú'ubia' Tiberio César itúbani yétsiloyua, loti' Poncio Pilatua nna uccua gobernador qui' Judea, Herodes nna uccua tią gobernador qui' Galilea. Bettsi'į Felipe nna uccua tią gobernador qui' Iturea ą'hua distrito nu lá Traconite nna. Lisantias nna uccua gobernador qui' región nu lá Abilinia. ²Anás lani Caifás nna uccua ça huexána' qui' ca sacerdotea. Làniana gureni Juan ýi'ni Zacarías fuera ca yetsi nna, gutelí tsè'ni bi mensaje nu uccua latsi' Tata Dios quixá'a bi. ³Acca huía tè Juáan itúbani región luítta' yò Jordán nna gutixa'áni bi ca enne' qui'ni dani ça eyacca

ca arrepentir lani Tata Dios para qui'ni eyuniñen latsi'e ca tul'la' qui' quì nna ccá tè ca bautizar.

⁴ Anía uccua cumplir nu ga'na escrito lo libro nu bedia Isaías enne' uccua profeta nna ra bi:

Rùyeni ttu enne' fuera yetsi nna ra bi: Lítsé'e leda porqui'ni chi da' Señor;

Liutha' lí ca néda qui' la' labàni qui' le para lèe.

⁵ Iyaba ca lithá' nna étsa' ca.

Iyaba ca i'ya nna ca làttsa nna èxxa ca.

Ca néda cuàl'la nna elí ca.

Ca néda tabi nna lappatsùni eyacca ca.

⁶ Iyaba ca enne' nna ilá'ni ca salvación nu runna Tata Dios.

⁷ Ca enne' ýétse' nna biria tè ca para ccá ca bautizar, acca Juáan nna ra bi ca: Yala mañoso ná le tì'a ca bèl'là. Nuni rą le qui'ni huaccani le ucuittani le la' tsialatsi' qui' Tata Dios nu chì' da'la cá. ⁸ Liulue'

lani ca hecho tsè' qui' le canchu là hualigani chi beyacca le arrepentir. Alàa chì' gutsia la le pretexto nna ína le: Ná tu' descendiente qui' ta' tàta qui' tu' Abraham acca yala enne' tsè' chi ná tu'.

Pero inte' nna nia' le qui'ni hàstaá ca íyya anta' nì nna huaccani Tata Dios gunie qui'ni eyacca ca ýi'ni Abraham. ⁹ A'hua chi du leda yèttè para íchuą ca yaga dèsideba l-lú quì; a'hua iyaba ca yà nu labí

runna fruto tsè' nna chú ca tsía ca lo yi'. ¹⁰ Ca enne' nna gunàba titsa' tè ca bi nna ra ca: Biala dani tu' guni tu' cá. ¹¹ Becàbi Juáan nna ra bi ca: Nu té chuppa cue' ýúj nna danią gutią ttu qui' nu labí té qui'j. A'hua nu té gúą nna dà huanią gutią qui' nu labí té gúą. ¹² Bitsina' tehuá tuchùppa canu ruquiya qui' impuesto para guni bi ca bautizar nna ra ca

bi: Maestro, biani dani tu' guni tu' cá. ¹³ Juáan nna

ra bi cą: Bittu gutèbia' telá le guquiŷa le ca enne', sino guni le de acuerdo nu ra lo ley qui' gobierno. ¹⁴ Làniana tuchùppa ca soldado nna gunàba titsa' huá cą bi nna ra cą: Intu' chù na, biala dani tu' guni tu' ni'í. Ra te bi cą: Bittu cúani le ca enne' biŷa té qui' qui, nihua làa gúniatsinì le cą nna gá le cą qui'ni guni le cą castigar canchu labí gunna cą biŷa qui' le màqui'ba labí biŷa beni cą; sino leyà'na tè conforme lani nu ráŷa le.

¹⁵ Iyáŷiani ca ènni'a nna tsè'e ba cą ribèda cą nna yala rulaba latsi' qui canchu xiaba Juáan nna ná bi Cristo enne' ná qui'ni ìta le' yétsiloyu. ¹⁶ Acca becàbi Juáan nna ra bi cą: Inte' nna hualigani runia' le bautizar lani inda, pero dá' attu enne' té adí la'huacca qui'e tì'chu inte', lèe nna gunie le bautizar lani Espíritu Santo nna la'huacca tì'a fuego nna; acca nìdirubani làa dàcca'a' para ithátsiá' correa qui' ca guarachu yù'u nì'e. ¹⁷ Aŷ'hua dènie pala para gúthúe ŷua' nu re' lo tsinà' qui'e; ŷua'xtíla nna gunie na seguro le' yú'u, pero ttébáŷua nna gudàl·lee na lo yi' làti nunca labí eyòlą. ¹⁸ Lani ca enseñánzaá aŷ'hua lani iŷétse'éru adí ca consejo nna gutixa'a bi ca titsa' de la'labàni lani ca enne' yétsiá. ¹⁹ Làniana gutìl·la Juáan gobernador Herodes porqui'ni guŷi'í Herodías niula qui' betsi'í Felípea para ccą niula qui'í, aŷ'hua por iyaba adí ca mal nu benią nna. ²⁰ Làniana bedàni telá Herodes attu mal nu benią nna: bedàl·lą Juáan litsi' iyyà.

²¹ Antesca cca añía nna, loti' runi Juáan bautizar iyaba ca ènni'a nna, aŷ'hua Jesús nna uccua huée bautizar. Miéntraste runie oración nna biyàlia

ỹiabara'. ²² Làniana bilá'ní huadi Espíritu Santo tì'a ttu becha to' nna bitsine'e iqquia Jesús. Biyeni tení tsì'i ttu enne' gunne de ỹiabara' nna rèe: Lu' ná lu' ỹì'nia', yala catsi'í te' lu'; por lu' nna yala la' redacca' latsi' té quia'.

²³ Ttú tsii érua' ida tì'gani Jesús nna, gudulue benie tsina nu dé'e gunie. Ca enne' ra cã qui'ni Jesús nna née ỹi'ni José. Joséa nna ỹi'ni Elí. ²⁴ Elí, ỹi'ni Matat. Matat, ỹi'ni Leví. Leví, ỹi'ni Melquì. Melquì, ỹi'ni Janai. Janai, ỹi'ni José, ²⁵ José, ỹi'ni Matatías. Matatías, ỹi'ni Amós. Amós, ỹi'ni Nahum. Nahum, ỹi'ni Esli. Esli, ỹi'ni Nagaí. ²⁶ Nagaí, ỹi'ni Maat. Maat, ỹi'ni Matatías. Matatías, ỹi'ni Semei. Semei, ỹi'ni Josec. Josec, ỹi'ni Judá. ²⁷ Judá, ỹi'ni Joanán. Joanán, ỹi'ni Resa. Resa, ỹi'ni Zorobabel. Zorobabel, ỹi'ni Salatíel. Salatíel, ỹi'ni Nerí. ²⁸ Nerí, ỹi'ni Meljí. Meljí, ỹi'ni Abdí. Abdí, ỹi'ni Cosam. Cosam, ỹi'ni Elmadam. Elmadam, ỹi'ni Er. ²⁹ Er, ỹi'ni Josué. Josué, ỹi'ni Eliezer. Eliezer, ỹi'ni Jorim. Jorim, ỹi'ni Matat. ³⁰ Matat, ỹi'ni Leví. Leví, ỹi'ni Simeón. Simeón, ỹi'ni Judá. Judá, ỹi'ni José. José, ỹi'ni Jonán. Jonán, ỹi'ni Eliaquim. ³¹ Eliaquim, ỹi'ni Melea. Melea, ỹi'ni Mainán. Mainán, ỹi'ni Matata. Matata, ỹi'ni Natán. ³² Natán, ỹi'ni David. David, ỹi'ni Isaí. Isaí, ỹi'ni Obed. Obed, ỹi'ni Booz. Booz, ỹi'ni Salmón. Salmón, ỹi'ni Naasón. ³³ Naasón ỹi'ni Amidadab. Amidadab, ỹi'ni Aram. Aram, ỹi'ni Esrom. Esrom, ỹi'ni Fares. Fares, ỹi'ni Judá. ³⁴ Judá, ỹi'ni Jacob. Jacob, ỹi'ni Isaac. Isaac, ỹi'ni Abraham. Abraham, ỹi'ni Taré. Taré, ỹi'ni Nacor. ³⁵ Nacor ỹi'ni Seruc. Seruc, ỹi'ni Ragau. Ragau, ỹi'ni Peleg. Peleg, ỹi'ni Heber. Heber, ỹi'ni Sala. ³⁶ Sala

ÿi'ni Cainán. Cainán, ÿi'ni Arfajad. Arfajad, ÿi'ni Sem. Sem, ÿi'ni Noé. Noé, ÿi'ni Lamec. ³⁷ Lamec, ÿi'ni Matusalá. Matusalá, ÿi'ni Enoc. Enoc, ÿi'ni Jared. Jared, ÿi'ni Mahalaleel. ³⁸ Mahalaleel, ÿi'ni Cainán. Cainán, ÿi'ni Enós. Enós, ÿi'ni Set. Set, ÿi'ni Adán enne' uccua ÿi'ni Tata Dios.

4

¹ Jesús nna benie recibir itute la'huacca qui' Espíritu Santo nna bede'e yò Jordán. Làniana por medio de Espíritu nna huíe idittu' la làti lanú enne' té. ² Nía nna gùdue chua' ubitsa nna chua' yèlà nna, beni tè numalua ne prueba canchu hua rialàniã gunie nu calatsi'ì. Labí biÿa gutúe, guttè diba chua' ubitsa nna gutùnie. ³ Làniana ra tè numalua ne: Canchu hualigani ná lu' ÿi'ni Tata Dios nna, gùtsi íyya té nì qui'ni eyaccã ettaxtíla. ⁴ Becàbi Jesús nna rée na: Escrituba ga'na qui'ni alàa tsua' teruba lani ettaxtíla ccabaniní ca enne', sino a'hua lani iyábani ca titsa' qui' Tata Dios. ⁵ Guche' tè numalua ne lo ttu i'ya ÿeni tsè'ni; ttu tsastitó' ní nna beluè'niã ne itúÿiani yétsiloyu nna, ⁶ ra ne: Latsi' ná' bá lu' gunna' itute la'huacca nna itute riqueza qui' ca nación nì, porqui'ni quíba' ná ca a'hua guté ya' ca lani nuÿa bá calátsa'a'. ⁷ Canchu gudu teruba ÿibi lu' ru'a lua' nna, entonces iyáÿiani ca nui nna qui'ba lu' ccá ca. ⁸ Becàbi Jesús nna rée na: Becuitta ru'a lua' Satanás, porqui'ni Tata Dios nna rée lo Escritura: Beni adorar ttu teruba Señor Dios qui' lu', a'hua là terubée guni lu' servir. ⁹ Làniana numalua nna guche' tiã ne le' Jerusalén nna beduã ne iqquia torre qui' templua nna ra tiã ne: Canchu hualigani

ná lu' Ýi'ni Tata Dios nna bittsía tsanna de nì para loyu nna, ¹⁰ porqui'ni escrituba ga'na qui'ni: Tata Dios nna ithèl·le'e ca ángel qui'e para hué' çà lu' cuidado. ¹¹ Ra huá lo Escritura qui'ni: Ca ángel nna gudàxu' çà lu' lo ná' qui' para qui'ni làa itsina' nì'a lu' lo íyya nna ccadí' qui' lu'. ¹² Becàbi Jesús nna rèe na: Ga'na huá escrito làti ra qui'ni: Bittu guni lu' tentar Tata Dios qui' lu'. ¹³ Làniana labiru betseláni numalua ti'iyà modo cu'á Jesús prueba, acca becuitta sabá ru'a lúe.

¹⁴ Bitola nna beyeqquia Jesús para Galilea lani la'huacca qui' Espíritu Santo. Gudàa tè titsa' qui'e itúbani región qui' nía nna ti'iyà iýeni ná la'huacca qui'e. ¹⁵ Gutixè'e titsa' qui' Tata Dios le' ca sinagoga làti retuppa ca enne' Israel. Iyaba çà nna bedàliani çà ne.

¹⁶ Jesús nna betsine'e Nazaret làti biýeni áa. Tì'ba ná bá costumbre qui'áa nna gutà'a tìe le' sinagoga ttu tsá redi' latsi' ca enne' Israel nna guduli tìe para gúl·lee Escritura. ¹⁷ Bè' tè çà ne libro nu bedia Isaías enne' uccua profeta qui' Tata Dios nna guthàlia bée librua nna taxáqqe'e lugar làti ra:

¹⁸ Espíritu enne' guthel·la' Señor Dios nna runne la'huacca quia', porqui'ni chi benie inte' nombrar para quíxa'a' ca titsa' tsè' cubi lani ca enne' pobre.

Chi guthèl·le'e inte' para gútià' la'ýeni lo losto' canu tsè'e lani la' rehuiní' latsi', para guyénia' qui'ni hua té libertad para ca preso, a'hua para qui'ni ca ciego nna ilá'ni çà nna gudilá'a' canu ridácca'tsi'i.

¹⁹ A'hua para quíxa'a' qui'ni chi gúl·lani tsá retúa latsi' Señor ca enne'.

20 Làniana betùbi Jesús ìttsia nna bete tìe na lani nu ga'na encargado qui' nía nna bebé' teníe. Iyaba canu tsè'e le' sinagógaá nna betsia tsìttsi ba lo qui ne. 21 Gudulo tìe gunnie nna rèe ça: Annana chi uccua cumplir nu chi biyénini le ga'na escrito. 22 Iyaba ça nna yala biquíla' latsi' qui' por ca titsa' tsè'gani gutixè'e, acca ra ça: Tsí álahua làbi nuá ÿi'ni José cá. 23 Jesús nna rèe: Segúruni nna gá le inte' díchu: Lu' médico, beyúni la'a lù'ba; iyaba nu bina tu' beni lu' le' yetsi Capernaum nna, beni huá ça látsi lu'. 24 Beni ba Jesús seguir nna rèe: Hualigani te' riquixa'ánia' le qui'ni nidi ttu profeta nna labí ruyu tsè' ça na látsi. 25 A'hua nia' le qui'ni hualigani gutsé'e iÿetse' ca niula viuda entre ca enne' Israel tiempo qui' Elías enne' uccua profeta loti' labí uccua iyya por tsunna ida xuppa biú' nna uccua ttu bina' fuerte le' ituba lugar nía. 26 Pero Tata Dios nna labí guthel·le'e Elías lani nuÿa ttu ca enne' Israel para gudilàa bi ça bina', sino làteruba lani ttu niula viuda le' yetsi Sarepta región qui' Sidón. 27 A'hua gutsé'e iÿetse' canu huì'ni yetsu' yùtsù' entre ca enne' Israel tiempo qui' Eliseo enne' uccua profeta, pero ni ttu ça labí beyúni bi, sino làteruba Naamán enne' attu nación huaya' láa Siria. 28 Biyeni báni canu tsè'e le' sinagógaá ca tìtsi'ì nna bitsa'áláni ça. 29 Gùduli chì ça nna gulèqqquia ça ne yetsi nna guche' ça ne ru'a bèl·la'a qui' i'ya làti re' yétsiá para uquìnnia ça ne lo íyyatù'a. 30 Pero labí birialàni ça gùttí ça ne porqui'ni lèe nna bettie lahui' qui' nna déyyee.

31 Betsina' tè Jesús le' yetsi Capernaum región qui' Galilea. Gutixa'ánie ça enseñanza nu cca qui'

Tata Dios ca tsá redi' latsi' quì. ³² Yala biquila' latsi' quì de biyénini cã ca enseñanza quì'e porqui'ni gùnnie lani poder de ÿiabara'. ³³ Le' sinagógaá nna re' ttu nubeyu' cca padecer por ttu espíritu malo. De repente taá yala idìtsa guretsiyà'ã nna, ³⁴ ra: Be'él·la' intu', biani té qui' lu' lani intu' acca dá' lu', Jesús enne' Nazaret. Tsí da' chì lu' para gul·lùÿa lu' latsi' tu' acca. Hua nabia' ba te' lu', ná lu' Enne' Santo guthèl·la' Tata Dios. ³⁵ Gutìtsa' tè Jesús na rèe na: Bèthia rú'a lu' nna beria lo losto' nubéyu'ì. De ra Jesús anía nna, làniana bedàl·la chìa nubéyu'a loyu ru'a lo iyaba canu tsè'e nía nna beria tiã lo lostu'ì, pero bíttuá biÿa guÿacca' nubéyu'a. ³⁶ Iyaba cã nna uccuaÿí yà'aba latsi' quì tsè'e cã nna ra luetsi quì; Biagani titsa' ní nui acca tanto lani la'huacca nna valor nna runiã mandado ca espíritu malo qui'ni rútsè'e latsi' quì ca enne'. ³⁷ Làniana itúbani lettia nna gudàa titsa' nu cca qui' Jesús.

³⁸ Gùduli tè Jesús nna berie le' sinagógaá, bitsina' bée litsi' Simón. Suegra qui' Simón nna tiã yi'bél·laníã ÿìl·lá. Gutta'yúni cã ne qui'ni eyúnie na. ³⁹ Biyèchu tè Jesús ru'a lo niulaa nna gutìtse'e ÿìl·láa. Làniana beyacca chì latsi'ì nna luégutaá beyathã nna beníã cabi servir.

⁴⁰ Benia bá bìtsa nna tahua' cã ru'a lo Jesús iyaba canu ra'ni biÿa tediba itsahue' ní. Lèe nna betsia né'e iqquia ttu ttu tsa canu rà'nia nna beyacca taá latsi' quì. ⁴¹ A'hua iÿetse' ca enne' beria ca espíritu malo lo losto' quì, yala ribétsi yà'ani cã nna ra cã Jesús: Lu' ná lu' Ýi'ni Tata Dios. Pero lèe nna gutìtse'e cã, nihua labí be'él·le'e cã inne cã adí, porqui'ni hua yù bá cã qui'ni lèe Enni'a Cristua.

⁴² Attu yu'u dílaá nna biria Jesús hué ttu lugar yà'latsi'. Ca enne' nna biria tehuá çà reyìla çà ne. Bitsina' bá çà làti ri'e nna gutta'yúni çà ne qui'ni bíttuúru tsíe gaÿa. ⁴³ Pero lèe nna rée çà: Náduel·la' qui'ni adí ca yetsi nna guna huá çà mensaje nu cca qui' la' rigú'ubia' qui' Tata Dios, porqui'ni para nui lá chi guthèl·le'e inte'. ⁴⁴ Beni tìe predicar le' ca sinagoga qui' ituba región qui' Galilea.

5

¹ Ttu vuelta nna du Jesús ru'a indatò' qui' Gene-saret, bitùppa tè enne' ÿétse'ní ru'a lúe hàstaá qui'ni chi ruquini çà ne para gudà naga' quì titsa' qui' Tata Dios. ² Bilá' tènìe chuppa ca barco to' dàa çà ru'a indatù'a. De chi beyàdi ca enne' yù'u le' ca bárcuá nna tsè'e tè çà huì ca exxa nu rudàxu' ní çà bél·lá. ³ Gutà'a tè Jesús le' ttu bárcuá nna. Bárcuá nna uccuà qui' Simón. Jesús nna gutìnanìe Simón favor qui'ni gutsíga' bi bárcuá áti' tó' tè le' indaá. Gure' teníe nna gutixa'ánìe ca enne' ÿétsi'á titsa' qui' Tata Dios dèsdeba le' bárcuá. ⁴ Beyacca diba gunnie nna rée Simón: Betsíga' bárcuì lahui' indì lá nna liudàl·la ca exxà' para gudàxu' le bél·lá. ⁵ Becàbi tè Simón nna ra bi e: Maestro, betù èlà ba gutsé'e tu' chi betsaníni tu', ni ttú bél·la ni'ì gudàxu' tu'; pero de acuerdo lani titsa' qui' cuiq'lu' nna, gudál·la'a' exxi. ⁶ De beni cabi nu reáa nna bedàxu' cabi ttu cantidad ÿéniní bél·la hàstaá qui'ni chi reyatsiní éxxaa. ⁷ Làniana lani seña ba gutàÿi cabi ca compa' qui' cabi yù'u le' attu bárcuá para qui'ni tsía çà cualani cabi. Bitsina' çà nna bedítsàa' çà chuppa taá ca bárcuá hàstaá qui'ni áti'tó' taá làa binétsi çà por tántua la' idì'i qui' ca bél·laá. ⁸ De

bilá'ni Simón Pedrua nu uccua nna, bedu ÿibi bi ru'a lo Jesús nna ra tè bi e: Adilatsa' betse'e latsi' cuiã'lu' inte', Señor, porqui'ni yala nu tul-la' ná'.
 9 Anía ra Pedrua porqui'ni guta' ttu la' rátsilatsi' lo losto' bi, a'hua iyaba canu tsè'e lani bía, por nu uccua. 10 Anía tehuá guỹàcca' Jacóbua nna Juáan nna ca ÿi'ni Zebedéua, porqui'ni gutsé'e cabi júntubá lani Pedrua. Jesús nna rée Simón Pedrua: Bittu gátsini lu'. Dèsdèba annana, ca enne' la guni le pescar. 11 Betsina' bá cabi lani ca bárcuá ru'a yúbitsiá nna, bethà'na taá cabi iyábani nna denó tè cabi e.

12 Loti' re' Jesús le' ttu yetsi nna bitsina' ttu nubeyu' itúỹianiã ra'ni yetsu' yùtsù'. De bilá'niã Jesús nna beduỹibì ru'a lúe bedètta' lúj loyu nna gutta'yuniã ne nna rã: Senor, canchu calatsi' cuiã'lu' nna huaccani cuiã'lu' eyuni lu' inte'. 13 Làniana becàa tè né'e beláppe'e na ra tìe: Huacca látsa'a', beyàcca nàri. Lànìaataá nna betua ch̀ it-sahue' qui' niá. 14 Lèe nna benie na recomendar qui'ni nú ttu tehuá nuỹa quixá'aniã nna ra lée na: Huía ru'a lo sacerdotèa para qui'ni ilá'ni bi lu', bete tè ofrenda qui' lu' tì'a nu beni Moisés mandado, muestra de qui'ni chi beyacca lu' nàri, para qui'ni ccáye latsi' qui'. 15 Pero adila uccua ca enne' saber nu cca qui' Jesús, hàstaá qui'ni ca enne' ÿetse' betùppa para gudà naga' qui' qui'e a'hua para eyunie cã de iyaba ca itsahue' qui' qui'. 16 Pero lèe nna huía bée ca lugar yà'latsi', benie oración.

17 Ttu tsá nna re' Jesús ruquixa'ánie ca enne' ca enseñanza nu cca qui' Tata Dios. Nía nnu ÿùa huá canu gulàni religiòn nu lá Fariseo, a'hua ca maestro canu nabia' tsè'gani nu ra lo ley qui' caniá. Lacã

nna da' cã de iyaba ca yetsi to' qui' ituba regi3n qui' Galilea nna Judea nna Jerusal3n nna. Bilá'ni cã qui'ni Jesús nna reunie ca enne' por la'huacca qui' Tata Dios lani e. ¹⁸ Bitsina' t3 tuch3ppa ca enne' n3à'ni cã ttu nubeyu' tíã lo ttu tá'a rà'niã parálisis, n3dirubani làa cca ttã. Beyla cã gaã la tt3 cã para gá'a cã le' yú'u nna quixa cã na ru'a lo Jesús. ¹⁹ Pero de tántua ca enne' ý3tse'á nna, labí betseláni cã gaã la gá'a cã, acca huappi chía cã iqquia yú'u la nna guthàlia cã na guch3da cã nu rà'nia tsa'tsela taá camilla qui' niá tulíỹiani làti du Jesús le' yú'a. ²⁰ De bilá'ni Jesús qui'ni yala fe té qui' qui' lani e nna r3e nu rà'nia: Lu' nubeyu', ch3ba beyuniỹ3n látsa'a' ca tul·la' qui' lu'. ²¹ Làniana ca maestro de la ley lani ca fariséua nna gudulo cã belaba latsi' qui' qui' nna uccuani cã: Bianicca rinne nub3yu'í ca titsa' nu ná qui'ni làteruba Tata Dios innie luetsi ca t3tsa'ã' ni'í. Nuni ccani gunittiluã ca tul·la' qui' ca enne' canchu álahua tsua' teruba Tata Dios cá. ²² Pero Jesús nna gutelí taánie ti'íỹa ná la' rulábalatsi' qui' qui', acca r3e cã: Biani la' rulábalatsi' ní nua' té lo losto' le cá. ²³ Tsí adí ýá ná bá épa'a' nub3yu'í: Chi beyuniỹ3n látsa'a' ca tul·la' qui' lu', o tsí épa' telá ya' ã: Beyatha nna g3da' acca. ²⁴ Pues annana gulué'nia' le qui'ni inte' Nubeyu' de Ýiabara' nna té la'huacca quia' le' y3tsiloyuí para eyuniỹ3n látsa'a' ca tul·la'. Làniana bel·lúitse'e nu rà'nia nna r3e na: Beyatha nna, bedi' camilla qui' lù'ã' nna beyya litsi' lu'. ²⁵ Nubeyu' paralíticua' nna luegu taání beyatha chía ru'a lo taá iyaba canu ts3'e níã, bedi' tíã camilla nu n3à'níní cã na tahua' cã na níã nna, deyya tíã litsi'í nna yala rudàlianiã Tata Dios. ²⁶ Iyaba cã nna uccuaỹí yà'aba

latsi' qui nna bedàliani huá cạ Tata Dios nna yala la' rátsilatsi' guta' lo losto' qui nna ra cạ: Annana chi bilá'ni ri'u ca cosa nu dacca' iquíla'ní latsi' ri'u.

²⁷ Gutè diba ca cosị nna beria Jesús nía nna bilá'nie ttu nubeyu' láạ Leví nạ empleado qui' gobierno nna ri'ạ ru'a meỹa làti ría ca enne' huỹa qui' impuesto. Jesús nna ra tìe na: Gutà, tanó inte'.

²⁸ Levía nna bethà'na taạ iyábani nna guduli tiạ nna díạ lani Jesús. ²⁹ Làniana beniạ ttu banquete yénitse' para Jesús le' litsi'ị. Tsè'e huá iyétse'ní canu ruquiỹa qui' impuesto, ạ'hua adí bá ca enne' yũa cạ lo méỹaá lani cabi. ³⁰ Ca maestro de la ley nna ca fariséua nna yala betìtse'él·la' cạ ca enne' ruthète'ni Jesús nna ra cạ: Bianicca rì'ya ro ba le lani canu ruquiỹa qui' impuesto ạ'hua lani adí canu fuera ni'ị. ³¹ Becàbi Jesús nna rèe cạ: Canu bihua ra'ni nna, pues bihua riquína'ni cạ méđico, sino làteruba canu ra'ni. ³² Labí daya' para gáyia' ca enne' tsè' sino canu tul·la' la para eyacca cạ arrepentir.

³³ Làniana ra tè cạ Jesús: Bianicca ca discípulo qui' Juáan nna yala ayunar runi cạ, ạ'hua puro oración bá runi cạ, ạ'hua ca discípulo qui' ca fariséua nna. Atsi'íni ca discípulo qui' lù'ạ' nna gù'ya ba nna go ba nna runi cạ. ³⁴ Lèe nna rèe cạ: Tsí gá le canu tsè'e thá'a qui'ni gúchia cạ làa go cạ miéntraste du ba nubeyu' ruttsaná'a lani cạ cá. ³⁵ Pero i'yu tsá qui'ni ítua ènne'yu'a lahui' qui, lànialá nna guni cạ ayunar.

³⁶ Ạ'hua gutixa'ánie cạ attu comparación nna rèe: Lanú nuỹa richu ttu pedazo vestido cubi para éguá'ạ remiendo ttu vestido viejo. Canchu anía runiạ nna, alàa rulá richèda'ạ nu cúbía sino ạ'hua

pedazo lari' nu gùrúa nna labí retóniã lani nu viéjuá. ³⁷ Nìhua lanú nuỹa rigá'ã vino cubi le' bolsa viejo nu de yéti, porqui'ni cáalá anía runiã nna, entonces ca bolsa yétiã nna itsu' telá çã nna ilàlia vínuá, ã'hua ca bolsa yétiã nna labiru iỹu' çã. ³⁸ Pero vino cubi nna íta'ã le' ca bolsa nu de yéti cubi; ã' modo nna tulappa bá gúchia bolsa yétiã lani vino cúbia. ³⁹ ã'hua nu ri'ya vino viejo nna labí catèhua latsi'j nu cubi, sino ina lã: Bittu gunixia' vino cubi porqui'ni viéjuã' la nna adila tsa' nã.

6

¹ Ttu tsá sábadu nna gutè Jesús làti té ÿua'. Ca enne' ruthète'niáa nna hua dia canna bá cabi guchèccu' cabi tuchùppa ÿua' nna guỹubi tè cabi çã lani ná' cabi nna gutó cabi. ² Tuchùppa ca fariséua nna ra tè çã cabi: Biecca runi le nu labí ná qui'ni guni ttu enne' tsá redi' latsi' ri'u ni'i. ³ Becàbi Jesús nna rèe çã: Tsí bihua ni'i gul'la le làti riquixá'a biỹa beni rey David loti' gutùni bíã, ã'hua adí canu tsè'e lani bíã cá. ⁴ Gutà'a David le' templo qui' Tata Dios nna guỹi' bi ca ettaxtíla nu ná ofrenda para Tata Dios nu lanú nuỹa dàniã gúã na sino làteruba ca sacerdotèa. Gutò bi nna bete huá bi gutò canu tsè'e lani bíã. ⁵ Làniana rèe çã: Ccá le saber qui'ni Nubeyu' de Ýiabara' nna rigú'ubi'e iyaba ca tsá ã'hua tsá redi' latsi' ri'u.

⁶ Attu tsá redi' latsi' ca enne' judíua nna gutà'a Jesús le' sinagógaá nna gudulue gutixa'ánie ca enne' titsa' qui' Tata Dios. Nía nna re' tè ttu nubeyu' nu gubitsi yà'aba ná' bànj. ⁷ Ca maestro de la ley nna ca fariséua nna betsia tsittsi ba lo qui Jesús canchu hueyúnie nu rà'nia tsá sábadu,

para gappa cą néda biỹa causa ni gutsia cą quì'e.
⁸ Pero lèe nna nabia' bánie la' rulaba latsi' qui' qui,
 acca ra tìe nubeyu' nu rà'nia: Lu' nna gùduli nna
 gùdu làhui' la. Lą nna gùduli taą nna gùduą làhui'.
⁹ Làniana Jesús nna rèe cą: Ttu cosa teruba inába
 tìtsa'a' le: Según nu ra lo ley qui' Tata Dios nna,
 tsí hua ná qui'ni guni ri'u nu na tsè' ca tsá redi'
 latsi' ri'u, o tsí guni la ri'u mal áccá. Tsí hua ná
 qui'ni gudilà ri'u ttu enne' de ca sufrimiento quì'ì
 màsqui'ba ná tsá redi' latsi' ri'u, o tsí hue'él·la' ba
 ri'u ą gattią áccá. ¹⁰ Làniana gùnne'e iyáỹiani canu
 tsè'e ìta'lùbani nía nna ra tìe nubéyu'a: Bèl·lì ná' lu'.
 Lą nna bèl·lì taá ní'ì, làniana tì'a viva beyacca chì
 ná' niá. ¹¹ Làcą nna yala bitsa'áni cą nna gunne tè
 entre labácą contra Jesús nna abícca'lání guthácca'
 cą ne uccuani cą.

¹² Tiemplo lànìa nna huía Jesús lo ttu i'ya huèni
 oración. Ituba yèlèa nna puro taá oración bá bènìe
 bel·lùitse'e Tata Dios. ¹³ Huani' bá nna gutàỹie ca
 enne' ruthète' qui'áa nna becuí'e tsì'nu cabi para
 ithèl·le'e cabi huenitsìna qui' Tata Dios, acca gutixà
 huée lá cabi apóstol: ¹⁴ Simón enne' gutixa huée
 láa bi Pedro ą'hua bettsi' bi Andrés, ą'hua Jacobo
 nna Juan nna, ą'hua Felipe nna Bartolomé nna,
¹⁵ Mateo nna Tomás nna, Jacobo ÿi'ni Alfeo nna,
 ą'hua Simón enne' lá huá bi Zelote, ¹⁶ Judas bettsi'
 Jacobo nna, ą'hua Judas Iscariote nu ná qui'ni gutiá
 ne cuenta.

¹⁷ Beyadi bá Jesús lani cabi lo i'yaá nna gulèdee
 làti ná ttu làttsi' lani ca discípulo qui'áa. Tsè'e huá
 ca enne' ÿétse'ní lani cabi porqui'ni ca enne' qui'
 itúbani Judea nna Jerusalén nna, ą'hua ca enne'
 da' le' chuppa ca yetsi Tiro nna Sidón nna anta'

ca exa ba ru'a indatò' nna, huía ca para iyénini ca qui' Jesús, a'hua para eyacca latsi' qui' de iyaba ca itsahue' nu ra'ni ca. ¹⁸ A'hua canu cca padecer por ca espíritu malo nna beyacca huá latsi' qui'. ¹⁹ Iyaba ca ènni'a nna beni ca duel·la' gulappa' ca Jesús porqui'ni yala la'huacca té lani lèe nna beyúnie iyaba ca.

²⁰ Gunna' tè Jesús ca discípulo qui'áa nna rèe: Ica'rubà lebi'ì canu ná pobre, porqui'ni qui'ba le ná iyate nu runna Tata Dios enne' rigú'ubia'nie le. ²¹ Ica'rubà lebi'ì canu ritùni anna, porqui'ni huacca yelia ba le. Ica'rubà lebi'ì canu ribétsi, porqui'ni bitola nna yala edácca'ni latsi' le. ²² Ica'rubà lebi'ì canchu chi guyudí' ca enne' le nna cueqquia ca le fuera nna guduadí' ca le nna yala quiniyu ca le ti'atsi runi le nu ná mal, porqui'ni tanó le Nubeyu' de Yiaba'. ²³ Bittu ehui'ni le, sino adila edácca'ni le porqui'ni ÿiabara' la gata' nu gunna Tata Dios qui' le. Porqui'ni a'hua bethacca' ca ta' tãta qui' qui' ca enne' uccua profeta gutsé'e tiempo antigua. ²⁴ Pero ica'rútsi'íru lebi'ì canu ná enne' rico, porqui'ni chi guttè tiempo de la' redacca' latsi' qui' le. ²⁵ Ica'rútsi'íru canu labí caliãtsà qui' le anna, porqui'ni huàl·lani tiempo ubina' qui' le. Ica'rútsi'íru canu ruÿitsi anna, porqui'ni yala élenini le nna gubètsi ba tsè'e le bitola. ²⁶ Ica'rútsi'íru le canchu guni le permitir qui'ni iyaba ca enne' nna gudàliani ca le, porqui'ni ca ta' tãta qui' canu tsè'e annana a'hua bedàliani ca ca profeta falso gutsé'e ttu cuaÿa nuá.

²⁷ Pero lebi'ì canu riyénini nna nia' le: Licàtsi'íni ca contrario qui' le. Lígúni tsè' lani canu ruyudí'

ca le. ²⁸ Línne tsè' qui' canu rinne ca mal contra le. Lígúni oración por canu richìtha ca mal contra le. ²⁹ Nuỹa tediba huí'ạ xága' lu' nna, bedàa tè attu lado. Nuỹa tediba calatsi'ị thí'ạ mata qui' lu' nna, be'él·la tehuá thí'ạ camisa qui' lù'ạ'. ³⁰ Nuỹa tediba rinàbaniạ lu' biỹa nna, bete tènì ạ. Nu thí'ạ biỹa té qui' lu' nna, bittu enàba lu' ạ. ³¹ Ti'iyà ba rú'ulatsi' le qui'ni guni ca enne' lani le nna, ạ'hua lígúni lani ca. ³² Porqui'ni canchu gápatsi'i le làteruba canu catsi'í báni ca le nna, biani cosa tsè'ni nua' runi le cá. Tsí álahuá ạ'hua runi ca enne' malo cá. ³³ Canchu runi le tsè' lani làteruba canu runi huá tsè' lani le nna, biani cosa tsè'ni nuá runi le cá. Porqui'ni hàstaá ca enne' malo nna ạ'hua runi ca. ³⁴ Canchu gutèsa lu' lani làteruba canu catèhua latsi' lu' otèaà huá ca lu' nna, biani cosa tsè'ni nua' runi le cá. Porqui'ni ca enne' malo nna rute sahuá ca lani adí canu runi mal para gudèqquia huá ca qui' quị attu tsánía huá. ³⁵ Lebi'ị nna dani le cátsi'ini ca contrario qui' le nna lígúni tsè' lani ca; líútesa ca biỹa té qui' le nna bittu cani le qui'ni eyuni huá ca le favor. Canchu guni le anía nna, entonces ccá huá le y'i'ni Tata Dios enne' dua y'iabara' nna yala gudàlianie le. Porqui'ni lèe nna née enne' tsè' lani ca enne' ingrato ạ'hua lani canu runi mal nna. ³⁶ Acca lícca enne' de la' retúalatsi' tì'ba Tata Dios qui' lía née enne' retúalatsi'.

³⁷ Bittu guyu le la'ditsi qui' ca enne', para qui'ni Tata Dios nna làa guni huée le juzgar. Bittu guni le ca enne' condenar, para qui'ni làa guni Tata Dios le condenar. Leyuniyén latsi' qui' ca enne'; Tata Dios nna eyuniyén latsi'e qui' le. ³⁸ Líúte para adí ca enne'; Tata Dios nna adila gúnnée qui' le hàstaá

ttu medida tsè'ni nna guquènie nna gudua thúáníe nna gúnnée qui' le. Porqui'ni ti'íyã ba gurixibía' le gúte le qui' ca enne' nna, a'hua orixibí'e gúnnée qui' le. ³⁹ Ra huée cabi attu enzeñanza: Tsí huaccani ttu ciego quél·lá'ã ná' attu ciego cá. Tsí álahua chuppa taá çã ìnnia le bèl·là'a cá. ⁴⁰ Ttu nu ruthète' nna labí dâcca'ã adiru tì'chu maestro qui'ì màsqui'ba irialàniã ca estudio qui'ì, pero ccã tì'a maestro qui' niá. ⁴¹ Biecca rinna' lu' yíyí to' nu yù'u lo attu enne', atsi'íni labí runi lu' duel·la' ebèqquia lu' nicuà' nu yù'u íyyalo lu' ni'í. ⁴² Miéntraste yù'u ttu nicuà' íyyalo lu' nna, biecca gá lu' attu enne': Gulèda qui'ni ebèqquia' yíyí nu yù'u íyyalo lu'. Yala huethacca'ýí ná lu'. Bétse'e latsi' lu' ca tul·la' qui' la'a lu' ba, lànialá nna huaccani lu' inèni lu' ca enne'.

⁴³ Labí yà fruto tsè' té nu ribia fruto mal lúj; nihua labí gaýa du ttu yà mal nu runna fruto tsè'. ⁴⁴ Porqui'ni ttu ttu ca yà nna redacca' rábani çã por ca fruto nu runna çã. Pues labí redi' ri'u exxuhuí nihua betsulí' ýixi lo ca yèttse'. ⁴⁵ A'hua ttu enne' tsè' nna runi huã nu ná tsè', porqui'ni puro nu ná tsè'ba riguã lo lostu'ì. Pero ttu nu ná mal nna runi lã nu labí ná tsè', porqui'ni yù'u mal lo lòstu'ì. Porqui'ni por ca titsa' nu rinne ttu enne' nna, a' modo nna rulue'ní ti'íyã ná ca la' rulábalatsi' nu riguã lo lòstu'ì.

⁴⁶ Biecca reya le inte': Señor, Señor, ti'atsi yala titsa' rappa le inte', atsi'íni labí runi le nu nia'.

⁴⁷ Nuýa tediba da' lani inte' nna gudà nàgui'ì ca titsa' quíy'ì nna runiã çã nna, ⁴⁸ inte' nna guni ya' a' comparar tì'a ttu ènne'yu' bedua bi ttu yú'u. Primérute gutàni bi itéttianí nna gulèqquia bi cimientu tsè' nu púruani íyyaá. De biria yò nna

gutsé'e inda yú'a lani itute fuerza què'ì, pero nìdi làa gutá yú'a porqui'ni duą tsìttsì lo íyyaá. ⁴⁹ Pero nu riyénini ca titsa' quíyí'ì atsi'íni labí runiá nu ríquixa'a' nna, ccá comparar ttu nubeyu' bedua yú'u què'ì lo gùnà' ba nna labí gúl·lidą cimientu. Acca de biria yò nna gutàttsa'ą yú'a lani itute fuerza què'ì nna gubixi chì yú'u qui' niá nna, de una vez tení bil·lùya latsi'ì.

7

¹ Beyacca ba gunne Jesús lani ca enne' tsè'e nía titsa' qui'áa nna, gutè'e le' yetsi Capernaum. ² Nía nna dua ttu capitán enne' romano dua tè ttu mozo què'ì nu yala catsi'íniá, pero mózuá nna yala fuerte rà'niá nna lo lù'uti taá chi tíá. ³ Bina bá capitáan nu cca qui' Jesús nna guthèl·la' tíá tuchùppa canu rigú'ubia' qui' ca judíua para gata'yúni cą ne qui'ni tsíe eyúnini mozo qui' niá. ⁴ Làcą nna huía cą ru'a lo Jesús nna yala favor gutínani cą ne nna ra cą: Hua ná bá qui'ni guni cuią'lu' favor lani nubéyu'a, ⁵ porqui'ni catsi'íniá nación qui' rí'u' nna chi hua beduą ttu sinagoga qui' ri'u. ⁶ Jesús nna huía tìe lani cą, pero álateérugá idittu' gá reyatsa para itsina' cabi nna guthèl·la' capitáan ca amigo què'ì para tattsa' cą Jesús nna gá cą ne: Señor, bittu ccá cuią'lu' molestar porqui'ni labí ná' nu dacca' para gá'a cuią'lu' le' litsá'a', ⁷ acca nìdi làa beyaýa te' ita' propio tegani inte' ru'a lo cuią'lu', pero ina teruba cuią'lu' qui'ni hueyàcca mozo quíya'a nna, eyàcca taá latsi'ì, ⁸ porqui'ni inte' nna dua huá' bajo la' rigú'ubia', ą'hua tsè'e huá ca soldado bajo la' rigú'ubia' quia' nna. Canchu épa'a' ttuą qui'ni tsíá nna pues huíya. A'hua canchu gáýia' áttuą nna pues

huìta. A'hua mozo qui'a nna épa' ya' a: Beni nui nna, entonces guni bą na. ⁹ De biyénini Jesús nui nna yala biquila' latsi'e. Bedèqquia tè lúe nna rèe ca enne' denó cą néa: Hualigani nia' le qui'ni nìhua entre ca enne' Israel nna labí chi bilá' te' iŷeni fe tì'a té qui' nubéyu'ì. ¹⁰ Làniana ca enne' guthel·la' capitáan nna deyya cą nna, de betsina' cą le' yú'u nna chi beyacca latsi' mozo qui' niá.

¹¹ Bitola nna huía Jesús ttu yetsi láą Naín. Dia tehuá ca discípulo qui'áa lani e a'hua ca enne' yétse'ní nna. ¹² De bitsina' Jesús ru'a yétsiá nna, méruá ribèqquia cą ttu nu yatti nna dia cą gucàttsi' cą na, uccua ttu rùbani ŷi'ni niula viúdaá. Iŷetse' ca enne' yétsiá nna dia huá cą hueni niuláa acompañar. ¹³ Señor nna bilá' bánie niuláa nna yala betua latsi'e na acca rèe na: Bítuúru cuetsi lu'. ¹⁴ Gubiga' tìe nna beláppe'e yí'na yàttia. Gulèda tè canu nùà'ni yí'naá, làniana ra tìe nu yàttia: Nubeyu' cuìti', lu' rinénia', beyátha. ¹⁵ Làniana beyacca bāni chĩa nna bebé' teniá nna, guduluą bènnèą. Jesús nna betie na cuenta lani nàna qui' niá. ¹⁶ Iyaba ca enni'a nna biquila' yà'ani latsi' qui' nna bedàliani cą Tata Dios nna ra cą: Ttu profeta lani la'huacca de ŷiabara' chi gul·lani lani ri'u. Ra huá cą: Chi gul·lani Tata Dios le' yetsiloyu para gunie ri'u ca enne' qui'e cualani. ¹⁷ Làniana itúbani Judea a'hua ìta'lùbani ca yetsi canu anta' nía nna gudà titsa' nu cca qui' Jesús.

¹⁸ Bina tè Juan el Bautista iyaba ca milagro nu runi Jesús, porqui'ni ca discípulo qui' bía nna gutixa'áni cabi bi. Acca gutàyi tè Juáan chuppa cabi. ¹⁹ Guthel·la' tè bi cabi para inàba titsa' cabi

Jesús canchu lèe Enni'a Cristo enne' ná qui'ni ìta, o canchu cueda cabi attu enne' huaya' áccá. ²⁰ De bitsina' cabi ru'a lo Jesús nna ra cabi e: Juan el Bautista nna guthel·la' bi intu' para inàba titsa' tu' cuiã'lu': Tsí cuiã'lu' ènni'ã' Cristo enne' ná qui'ni ìl·lani, o, tsí cueda tu' attu enne' huaya' áccá. ²¹ Lótaá bitsina' ca enne' qui' Juáan ru'a lo Jesús nna, chi reyúnie iỹetse' ca enne' ra'ni de biỹa tediba itsahue' ní canu bíỹaáruá dolor ní rappa çã l·le, ã'hua rebèqqie ca espíritu malo lo losto' ca enne', ã'hua iỹetse' ca ciego nna beni huée qui'ni bilá'ni çã. ²² Becàbi Jesús nna rèe ca enne' guthel·la' Juáan: Léyya líúte razón lani Juáan de nu chi bilá'ni le nna biyénini le nna. Quixá'ani le bi qui'ni ca ciego nna rilá'ni çã; ca cojo nna rida' çã, canu ra'ni yetsu' yùtsù' nna chi reyacca nàri çã; canu cuètsu nna riyénini çã; canu yatti nna reyaccabàni çã; ã'hua canu ritè la'dí' nna chi runa çã ca titsa' de la'labàni nna, ²³ ica'rubà canu labí rudu chùppaniã çã denó çã inte'. ²⁴ Bedà' diba ca discípulo qui' Juáan nna gudulo Jesús riquixé'e nu cca qui' Juáan lani ca enne' nna rèe: Biani nua' calatsi' le úhuia' le acca biria le fuera yetsi cá. Tsí huía le táanna' le ttu nubeyu' nu ná variable tì'a ttu yíi làthi to' nu rutá titti bá be'. Pues, nia' le: Labí. ²⁵ Biani biria le táanna' le. Tsí ttu enne' nu yala tsè' du yúi áccá. Pues canu raccu' yó fino qui' nna ã'hua canu redi' bá nna, pues le' ca yú'u tsè'la hua yúa çã tì'a ca rey. ²⁶ Acca, biani biria le táanna' le áccá. Tsí ttu enne' ná profeta áccá. Hualigani qui'ni biria le iyénini le ttu mensajero nu adírlá enne' yēni tì'chu ca profeta. ²⁷ Qui' bi nua' ga'na escrito làti ra Tata Dios: Nì rithél·la'a' yà'la mensajero quia', denéru bi lo lu',

Para ithàlia bi néda para guni çà lu' recibir.

²⁸ Riquixa'ánia' le qui'ni de lo iyábani canu chi gùlia nna, lanú profeta chi gùdua uccuà adiru enne' ýeni tì'chu Juan el Bautista. Pero nu huaýia' la dacca' le' reino qui' Tata Dios nna adila enne' ýeni ná tì'chula Juáan.

²⁹ Iyaba ca enni'a nna de biyénini çà ca titsa' qui' Jesús nna beyacca çà arrepentir hàstaá tuchùppa canu ruquiya qui' impuéstua nna uccua huá çà bautizar por Juáan, porqui'ni bennia çà cuenta qui'ni ttu teruba Tata Dios née Enne' Tse' para lani iyaba clase de ca enne'. ³⁰ Pero ca fariséua à'hua canu rethàtsilà'na nu ra lo ley nna labí guyú'u latsi' quí nu uccua latsi' Tata Dios gunie para làçà, à'hua labí huía çà para guni Juáan çà bautizar. ³¹ Raá ruhuá Señor Jesús çà: Núní tì'na gunia' comparar ca enne' tsè'e anna cá. ³² Ná çà tì'a ná ca huatsa cuíti' nu rul·la çà instrumento qui' quí lo néda nna rul·luítsa' çà idítsa ca luetsi huatsa quí rena çà: Chi bìl·la tu' pieza alegre nna pero labí bedácca'ni le. Chì hua bìl·la tu' qui' enne' yatti nna, pero ñihua làa gurètsi le. ³³ Anía nia' le porqui'ni bìta Juan el Bautista nna gurèni bi bechia bi labí gutò bi bìttì' di, pero rena la le qui' bi: Ttu espíritu malo du lani à. ³⁴ Gul·lani tehuá Nubeyu' de Ýiabara' ri'ya ro bée nna pero redena le: Nui nna puro go bá nna gù'ya bá nna runia nna yala ccá tsè'á canu ruquiya qui' impuesto à'hua adí canu hueni tul·la' nna. ³⁵ Pero inte' nna nia' le qui'ni cca declarar nu ná lí, porqui'ni iyaba canu hualigani té la' riyeni tsè' qui' quí nna rulue' rábani çà por ca hecho tsè' qui' quí.

³⁶ Ttu fariséua nna gutta'yúniã Jesús tsíe litsi'ì gúe lani a. Gutà'a bée le' yú'u qui' niá nna gudua teníe lo méyaa. ³⁷ Le' yétsiá nna dua ttu niula yala nu tul·la' ná nna bina bá qui'ni Jesús nna ri'e litsi' fariséua, acca bitsina' tiã nu'ã ttu frasco nu tá'a ttu aceite nu rilàa' iỹixi. ³⁸ Guduluã ribétsiã nna huíã ru'a meya làti re' Jesús nna beduỹibì ru'a lúe nna indahuina' qui'ì nna binnia lo nì'e, lani ittsa' iqquì nna bedibìtsiã ca. Bettsa'lúì ca nì'e nna bedua acéiteá lo ca nì'e. ³⁹ Fariseo nu gutãyiã Jesús litsi' niá nna bilá'niã nu runi niuláa, làniana belaba latsi'ì lo lostu'ì: Cálala nubéyu'ì hualigani ná profeta nna, entonces hua nabia' lánia nuỹa clase de niula ní nua' rulappa'ã na, a'hua ti'iỹa ná là' dua qui' niulã', pues ttu niula perdida tè ná. ⁴⁰ Làniana ra tè Jesús na: Simón, ttu cosa té qui'ni épa'a' lu'. Lã nna rã ne: Gunàba cuiã'lu' Maestro. ⁴¹ Jesús nna rée na: Ttu nu rutèsa bel·liu nna gutsé'e chuppa ca enne' gudaa ca qui' bi. Ttuã nna gudã gayu' gayua' denario qui' bi. Attuã nna gudã tsieyóna' denario qui' bi. ⁴² Pero làca nna labí té qui' qui' quiỹa ca, acca beniỹén bá latsi' bi qui' chuppa taá qui. Annana ina lu', núlá canuá adiru catsi'ini ca bi cá. ⁴³ Becàbi Simón nna rã: Inte' nna cate' qui'ni nu beniỹén latsi' bi qui'ì adiru iỹeniá. Jesús nna rée na: Làtegani ná la' rulába latsi' qui' lu'. ⁴⁴ Raá ruhuá Jesús na acerca de niuláa: Simón, tsí hua rilá'ni lu' niulí. Hua yù lu' qui'ni loti' gul·lânia' litsi' lu' nna labí benna lu' inda para quíini ca nì'a', pero niulí nna chi gutiã ca nì'a' lani indahuina' qui'ì nna bedibìtsi tiã ca lani ittsa' iqquì. ⁴⁵ Labí bettsa'ló lu' lua' de runi lu' inte' saludar, pero niulí nna

dèsdeba gul·lânia' le' litsi' lu' nna labí ni'i gudùtsiá ruttsa'lúì nì'a'. ⁴⁶ Labí bedua lu' aceite iqquia', pero niulí nna chi bedua aceite lo nì'a'. ⁴⁷ Acca nì riquixa'ánia' lu' qui'ni niulí nna porqui'ni chi rului'á qui'ni yala la' tsì'ilatsi' té lo lòstu'ì, acca ritelíni rì'u qui'ni ca tul·la' yétse'ní qui'ì nna chi ná cã perdonado. Pero nuÿa tediba labí nabia'niã iÿeni perdón qui' Tata Dios nna, nuá nna ti'to' ba la' tsì'ilatsi té lo lòstu'ì. ⁴⁸ Làniana rèe niuláa: Chiba beyuniÿén látsa'a' iyaba ca tul·la' qui' lu'. ⁴⁹ De biyénini canu ÿùàni júntuba lani e lo méÿaá ca tìtsa'a' nna, gudulo cã ra luetsi qui: Núní ná nui acca reyuniÿén latsi'ì ca tul·la' cá. ⁵⁰ Jesús nna rèe niuláa: Por fe nu té qui' lu' lani inte' nna, acca chi gulàa lu', beyya ba lani la' redácca' latsi'.

8

¹ Gutè ba nna huía Jesús le' iyaba ca ciudad nna ca yetsi nna benie predicar evangelio nna gutixe'e ca enseñanza nu cca qui' reino qui' Tata Dios. Tsì'nu ca discípuluá nna dia huá cabi lani e. ² Dia hua tuchùppa ca niula canu huí'ni por ca espíritu malo á'hua por bíÿaáruá itsahue' ní nna, chi beyuni Jesús cã. Entre ca niuláa nna laní María nu yetsi Magdala nu beria gãtsi ca espíritu malo lo losto' niá, ³ á'hua Juana niula qui' Chuzá nu ná jefe le' palacio qui' gobernador Herodes, á'hua Susana nna, á'hua iÿé tse'éruhuá adí ca niula canu beni cã Jesús cualani nna bete cã lani e biÿa té qui' qui' nna.

⁴ Làniana bitùppa tè ca enne' yétse'ní da' cã le' iyaba ca yétsiá nna bitsina' cã ru'a lo Jesús. Lèe nna gutixa'ánie cã ca enseñanza tsè' por medio de ttu comparación nna rèe: ⁵ Ttu campesino nna

díã huedàl·la ÿua'. De chi yu'á huedàl·la ÿú'a nna binnia tí' ÿú'a lo néda. Gutè tè ca enne' nna bel·lia cã ca semíllaá, huadi tè ca binni to' nna bedíga' cã na. ⁶ Ati' ÿú'a nna binnia le' íyyarrúe. Gul·lani bã nna gubitsi taã porqui'ni labí lùppa' re'. ⁷ Ati' ÿú'a nna binnia làti yù'u huá l·lú ca yèttse'. Ca yètti'a nna gul·lani tehuá cã nna bedibàga' taá cã lo ÿú'a. ⁸ Ati' ÿú'a binnia le' loyu tsè', gul·lani bã nna benna tiã lenà' hàstaá gayua' ttu ttuã. Gunne te Jesús attu adiru idítsa nna rèe: Nu calatsi' ttélinia nna gudà tsè' nagui'ì.

⁹ Ca discípulo qui' Jesús nna gunàba titsa' cabi e nna ra cabi: Biani enseñanza ni nua' gutixa'a cuiã'lu' lani comparación nà'. ¹⁰ Jesús nna rèe cabi: Lebì'ì teruba ná qui'ni ttélini le ca secreto acerca de reino qui' Tata Dios, pero adí ca enne' nna, puro lani ejemplo ba rinéni ya' cã, para qui'ni màsqui'ba hua rinna' cã pero labí ilá'ni cã, à'hua màsqui'ba hua rudà naga' quí, pero labí ttélini cã.

¹¹ Annana ethàtsilà'na' comparación nu beni ya'a para qui'ni ttélini lí ã. Semillaá nna nã titsa' qui' Tata Dios. ¹² Ttu te ca enne' nna ná cã tì'a ÿua' nu binnia cuitta' néda, porqui'ni de riyénini cã tìtsà'a nna ril·lani taá numalua nna runia qui'ni iÿùl·lani cã na, anía modo nna labí tsíalatsi' quí para l·lá cã. ¹³ Attu te ca enne' nna ná cã tì'a ÿua' nu binnia le' íyyarrúeá pero labí dia gá l·lú quí itettia, porqui'ni de riyénini cã ca titsa' qui' Tata Dios nna ría tegáláa latsi' quí. Pero canchu chi ril·lani ca prueba nna, cca taá cã apartar porqui'ni labí fuerza té qui' quí. ¹⁴ Attu te ca enne' nna ná cã tì'a ÿua' nu binnia le' yètti'a; porqui'ni ca tsina

qui' qui' nna ca riqueza qui' qui' nna ca vicio qui' qui' nna ruthàga' taá cã lo qui; acca reyà'na cã sin fruto. ¹⁵ Pero attu te ca enne' nna ná cã tì'a ÿua' nu binnia le' loyu tsè'a, porqui'ni lani ttu losto' tsè'ni nna lani gusto ní nna rigua cã ca titsa' nu riyénini cã nna runi cã seguir lani paciencia; làcanuá nna runna cã fruto tsè'.

¹⁶ Lanú nuÿa rugàl·la' ttu yi' nna rutòthe' tiã ttu yethu' lúì ñihua làa rudua na ÿarèe' lònà qui'ì, sino qui'ni rudua lã na ttu lugar làti gudàni'ã qui' iyábani canu gá'a le' yú'a. ¹⁷ A'hua labí biÿa secreto ní té qui'ni làa guna ri'u a, ñihua labí biÿa nu gàttsi' té sin qui'ni làa cca ri'u a saber nna ilá'niã nna. ¹⁸ Acca liudà tse'éruhuá naga' le, porqui'ni nuÿa tediba té la' ritelíni qui'ì nna entonces thí' lã adí; pero nu labí té qui'ì nna, pues hàstaa ti'to' nu rulaba latsi'ì qui'ni chi té qui'ì nna ítua telã.

¹⁹ Làniana bitsina' nàna qui'áa nna ca bettsi' áa nna, pero de tántua ca enne' ÿetse' nna labí uccua ibiga' cabi làti dùe. ²⁰ Guixa'áni cã ne nna ra cã: Nàna qui' cuiã'lu'a nna a'hua ca bettsi' cuiã'lu'a nna tsè'e cabi fuera calatsi' cabi ilá'ni cabi cuiã'lu'. ²¹ Becàbi Jesús nna rèe: Canu rudà naga' qui' titsa' qui' Tata Dios nna runi cã nu rèe nna, làcã nna ná cã nàna quia' nna ca bèttsi'a' nna.

²² Attu vuelta nna gutà'a Jesús le' ttu barco lani ca discípulo qui'áa nna rèe cabi: Tté ri'u attu ládulá indatù'ì. Làniana dia tè cabi. ²³ Mientras tè dia cabi lo indatù'a nna guta'áthi Jesús. Ttùba là' gul·lani taání ttu iyyabe' fuerte ní lo indatu'a, rà'a chì indaá le' bárcuá nna, lo peligro taá chi dàa cabi. ²⁴ Gubíga' cabi ru'a lo Jesús nna bedibàni cabi e nna ra cabi e:

Maestro, Maestro, chi rinetsi ri'u. Huàtha taá Jesús nna gutìtse'e iyyabe'á nna indatù'a nna, gudu tsi taá cą nna, tsi diruba ùccua taá. ²⁵ Jesús nna rèe cabi: Tsí labí fe té qui' le lani inte' cá. Ca discípulá nna uccuaŷí yà'aba latsi' cabi nna gùtsini cabi nna ra luetsi cabi: Núgani ènni'ì, acca hàstaba be' nna indatù'ì nna gutìtse'e cą nna biyeni taáni cą quì'e.

²⁶ Bitsina' tè cabi terreno qui' ca enne' gadareno, ga'ną attu ládulá indatò' qui' Galilea. ²⁷ Huàdi bée ru'a yúbitsi nna bitsina' tè ttu nubeyu' qui' yétsiá nna tattsa'ą Jesús. Nubéyu'a nna chi gutsàni cą padecer por ca espíritu malo nna labí raccu' ŷúì ñihua labí riduą le' yú'u, sino gurèni bá làti rigàtsi' canu yatti. ²⁸ Bilá' báníą Jesús nna guretsi yà'anią nna bedu tè ŷibì ru'a lúe, gunnią idìtsa nna rą: Biani té qui' lu' lani inte' acca da' lu' Jesús ŷi'ni Tata Dios enne' dua ŷiabara'. Ratta'yúnia' lu' bittu guni lu' inte' castigar. ²⁹ Anía rą porqui'ni beni Jesús espíritu malua mandado qui'ni eria lo losto' nubéyu'a. Chi gutsàni naxu'ą nubéyu'a. Iŷé vuelta tsè' chi beŷìga' ca enne' na lani cadena, pero guchù tì'nią cą. La'a mísmuba espíritu malua nna benia latsi' nubéyu'a cuenią fuera yetsi. ³⁰ Gunàba titsa' Jesús na, nna rèe: Biani lá lu'. Becàbią nna rą: Legión lá'. Anía becàbią porqui'ni iŷetse' ca espíritu malo chi gutà'a lo lòstu'ì. ³¹ Ca espíritu malua nna gutta'yú tèni cą Jesús qui'ni bittu gudàl·lee cą le' lugar chul·la. ³² Bilá'ni ca espíritu malua qui'ni tsè'e iŷetse' ni ca cùttsi huila go cuitta' i'yaá. Acca gutta'yúni cą ne qui'ni hue'él·le'e cą gá'a cą lani ca cùttsia. Lèe nna bete bée permiso qui' quì. ³³ Beria bá cą losto' nubéyu'a nna gutà'a tè cą lani

ca cùttsia. Ca cùttsia nna uccua litsiani cą nna beduyú iqquia quı lo ttu bèl·la'a, binnia tè cą le' indatù'a nna gutti cą. ³⁴ Canu rappa ca cùttsia nna bilá' bání cą nu uccua nna beyya cą quètha tatixá'a cą le' yétsiá nna ca rancho tú'a nna. ³⁵ Biria tè ca enni'a tanna' cą biỹa nuá uccua. Bitsina' cą làti du Jesús nna bilá'ni cą nubeyu' nu beria ca espíritu malo lo losto' niá qui'ni tsè' tabá chi ri'ą ru'a lo Jesús naccu' ýúı Làniana làcą nna yala gùtsini cą. ³⁶ Canu bilá'niá nna gutixa'áni cą ca enne' ti'ỹa uccua lani nubéyu'a de gulà latsi' ná' ca espíritu malua. ³⁷ Làniana iyáyiani ca enne' qui' ituba región Gadara nna gutta'yúni cą Jesús qui'ni ucuitta bée lani cą porqui'ni yala rátsini cą. Jesús nna beyàppie le' barcuá nna déyyeé. ³⁸ Làniana nubeyu' nu beria ca espíritu malo lo losto' niá nna gutta'yúniá Jesús qui'ni hue'él·le'e na tsíą lani e, pero Jesús nna bechu títse'e na, nna rèe: ³⁹ Beyya ba litsi' lu' nna bè'ni ca enne' titsa' ti'ỹa ná ca cosa ýeni nu chi beni Tata Dios lani lu'. Lą nna deyya tią nna rudà titsa' le' itúbani yétsiá ti'ỹa ná ca cosa milagrosa nu chi beni Jesús lani ą.

⁴⁰ Betsina' ba Jesús attu lado indatù'a nna yala redácca'ni ca enne' de bilá'ni cą ne, porqui'ni iyaba cą nna ribèda cą ne. ⁴¹ Làniana bitsina' ttu enne' láą Jairo nubeyu' principal le' sinagógaá, beduỹıbı ru'a lo Jesús nna gutta'yúniá ne qui'ni tsíe litsi'ı, ⁴² porqui'ni dua turuba ýi'ni niulıı, ttú tsì'nu ida ti'gániá nna chì' tení rattıą. Dia tè Jesús ą'hua ca enne' ýétse'nía hàstaá qui'ni ruquini cą ne. ⁴³ Entre ca enne' ýétse'á nna dia huá ttu niula nu chi dia tsì'nu ida rà'niá riduá réni ttu parte qui' cuerpo

quì'ì. Chi benittiluà iyate nu té quì'ì lani ca médico, pero nì ttú cã labí uccuani cã eyuni cã na. ⁴⁴ Lã nna gubiga' tiã cuè'e la Jesús nna beláppa'ã ru'a ýúeá. Làniateá nna beyacca latsi'ì. ⁴⁵ Jesús nna ra cã: Núní nua' beláppa'ã inte'. Iyaba cã nna ra cã: Labí yù tu'. Làniana ra tè Pedrua ã'hua adí canu tsè'e lani bía: Maestro, ca enne' ýetse' nui da' nì ruquìni cã cuiã'lu' nna rihuàttsa'ní cã cuiã'lu', atsi'íni ra cuiã'lu': Núní nua' beláppa'ã inte'. ⁴⁶ Pero Jesús nna ra tìe: Nuýa nua' chi beláppa'ã inte' porqui'ni gutebe' te' qui'ni biria la'huacca lani inte' para eyacca latsi' nuýa ttu enne'. ⁴⁷ Niuláa nna de benniã cuenta qui'ni labiru igàtsi'ã nna guduluã biýitti'niã nna gubíga'ã nna beduýíbì ru'a lúe. Gutixa'ániã ne ru'a ló iyáyiateá ca enne' tsè'e nía biýa qui' acca beláppa'ã ne, ã'hua ti'íýa tsàtiní beyacca latsi'ì. ⁴⁸ Jesús nna bechu tìtse'e niuláa nna rèe na: Ýì'nia', por fe nu té qui' lu' lani inte', acca chi beyacca latsi' lu'; bíttuúru nùyue cani lu' sino gappa lu' la'ýeni. ⁴⁹ Atsaba rinne Jesús nna, bitsina' tè ttu enne' da' le' litsi' Jairo nu ná principal qui' sinagógaá nna rã Jaíruá: Ýì'ni lù'a nna chi gùttiã, bíttuúru uquìtsi'ni lu' Maéstruã'. ⁵⁰ Biyeni báni Jesús nna ra tìe Jaíruá: Bittu gátsini lu', huía teruba latsi' lu' nna hueyacca bá latsi' ýì'ni to' lù'a. ⁵¹ Làniana gutà'a Jesús le' yú'a. Lanú nuýa be'él·le'e gá'a le' yú'a sino làteruba Pedrua nna Jacóbua nna Juáan nna, ã'hua tàta nàna qui' niula cuìti'a nna. ⁵² Iyaba cã nna yala ribétsi cã nna, yala lani la' rehuiní' latsi' tsè'e cã por niula cuìti'a. Jesús nna rèe cã: Bittu cuetsi le, porqui'ni bihua nã nu yatti, sino ti'éthibã. ⁵³ Làcã nna burla lá beni cã Jesús porqui'ni hua yù ba cã qui'ni chi

gùttià. ⁵⁴ Pero lèe nna gutèl·le'e ní'ì nna gunnie idìtsa nna rèe: Niula cùiti', beyátha. ⁵⁵ Beyaccabàni chià nna beyátha tià. Lèe nna rèe cạ qui'ni hué' cạ na nu gúà. ⁵⁶ Tàta nàna qui' niá nna uccuaỹí yà'aba latsi' qui. Jesús nna gunènie cạ qui'ni nú ttú tehuá nuỹa quixá'ani cạ.

9

¹ Betùppa ba Jesús tsì'nu ca discípuluá qui'áa nna, betie la'huacca qui' cabi para ineni cabi ca espíritu malo qui'ni eria cạ lo losto' ca enne', ạ'hua para eyuni cabi biỹa tediba clase de itsahue' nu ridácca' ca enne'. ² Guthel·la' tìe cabi hueni predicar acerca de la' rigú'ubia' qui' Tata Dios, ạ'hua para eyuni cabi canu rà'ni. ³ Ra tè Jesús cabi: Bittu biỹa huá' le para lo néda; nìda ttu yà to' làa theni le, nìhua bolsa, nìhua etta bittu huá' le, nìhua bel·liu nna. Bittu huá' le chuppa camisa, sino ttu teruba nu naccu' le dia le. ⁴ Nuỹa litsi' ní itsina' le nna, níabá ccá lugar qui' le hàsta'na gal·la' tsá éda' le le' yétsiá. ⁵ Gaỹa tediba lugar ní làa guni cạ le recibir nna, eria le le' yétsiá, pero gucuíbi bestè nì'a le, para ttéliní qui'ni bíttuúru ná le responsable qui' qui. ⁶ Làniana biria cabi nna dia cabi iyábani ca yetsi. Itú lettia bání gutixa'áni cabi ca enne' ca titsa' qui' Tata Dios ti'iyà modo l·lá cạ, ạ'hua beyuni cabi canu ra'ni.

⁷ Bina tè gobernador Herodes iyaba nu runi Jesús nna bedu chùppanià porqui'ni ttu te cạ nna ra cạ: Juan el Bautista nua' chi beyáthạ de lo lù'uti. ⁸ Attu te cạ nna ra cạ: Elías nua' chi gul·lani. Adí cạ nna ra cạ: Ttu profeta gùdua tiempo antigua nua' beyáthạ de lo lù'uti. ⁹ Laniana ra Herodes: Inte' benia' mandado ichu cạ yáni Juáan. Pero núlá

nui iÿetse' ca milagro riyeni te' quì'ì cá. Acca yala uccua latsi' Herodes ilá'niã Jesús.

¹⁰ De bitsina' ca apóstol nna bè'ni cabi Jesús titsa' iyaba nu beni cabi. Làniana guchi'e cabi ttu lugar yà'latsi' exataá yetsi Betsaida. ¹¹ Bina bá ca enne' qui'ni nía bá re' Jesús, acca huía tè çã ru'a lúe. Lèe nna benie çã recibir nna gutixa'ánie çã nu cca qui' la' rigú'ubia' qui' Tata Dios, a'hua beyúnie canu huía para eyacca latsi' quì. ¹² De chi da' ràl'làa nna gubíga' tsì'nu ca discípulo qui' Jesús ru'a lúe nna ra cabi e: Bechu titsa' dí cuiã'lu' ca enne' para qui'ni tsía çã le' ca yetsi to' a'hua ca rancho to' canu anta' ita'lùba, para tatila çã làti eyà'na çã nna gó'o çã nu go çã, porqui'ni labí biÿa té làti tsè'e rí'uì para làçã. ¹³ Jesús nna rèe cabi: Lebi'i ba, líhue' çã go çã. Làcabi nna ra cabi e: Labí biÿa té qui' tu' sino làteruba gayu' ettaxtíla nna chuppa bél'la tó' nna. Solamente canchu tsá' gu' gó'o tu' nu go iyaba ca enni'ì huaccani tu' úgo tu' çã. ¹⁴ Hua ná ttú gayu' mili' tì'ga ca nubeyu' lània. Làniana ra tè Jesús ca discípulo qui'áa: Líúxuaní çã por grupos de tsieyóna'. ¹⁵ Aníabá beni cabi, bexuaní cabi iyaba çã. ¹⁶ Làniana guÿi' tè Jesús gayu' ca ettaxtílaá nna chuppa ca bél'la tú'a nna, guchìtha lúe ÿiabara' nna gunábèe bendición lani Tata Dios Làniana gùl'le'ée çã nna bete tìe lani ca discípulo qui'áa para qui'ni quthia cabi lani ca enni'a. ¹⁷ Iyaba çã nna gutó çã tì'ÿa ba ùccuaní qui' quì. Bitola nna betùppa cabi átsì'nu ÿa tsùmmi tsà'ti'ni ca pedazo nu bexàni ca enni'a.

¹⁸ Ttu tsá lània nna huía Jesús ttu lugar yà'latsi' lani ca discípulo qui'áa nna benie oración. Bitola nna beyéqque nna rèe cabi: Núní rena ca enne'

qui'ni ná inte' cá. ¹⁹ Becàbi cabi nna ra cabi: Ttu te cą nna rena cą qui'ni ná cuią'lu' Juan el Bautista. Attu te cą nna rena cą qui'ni ná cuią'lu' Elías. Adí cą nna rena cą qui'ni ná cuią'lu' ttu profeta gùdua tiempo antigua nna beyátha bi de lo lù'uti. ²⁰ Jesús nna rèe cabi: Lebi'ì chúná, núlá rulaba latsi' le ná' ni'i. Becàbi Pedrua nna ra bi e: Cuią'bálu' enni'a Cristo enne' chi nani Tata Dios ithel'le'e yétsiloyu. ²¹ Pero Jesús nna rèe cabi qui'ni nú ttú tehuá nuỹa quixá'ani cabi nui.

²² Làniana rèe: Nubeyu' de Ỹiabara' nna té qui'ni quée padecer iỹetse' ca cosa, ą'hua ca sacerdote principal lani adí canu rigú'ubia' entre ca enne' judío nna ca maestro de la ley qui' caniá nna guyudí' cą ne hàstaá qui'ni gutti cą ne, pero bitola de tsunna ubitsa nna eyáthee de lo lù'uti. ²³ Làniana rèe iyaba cabi: Nuỹa calatsi'ì thá'ą lani inte' nna, té qui'ni iỹùl'lania ła'a labą ttu ttu tsá bá nna ga'ną dispuesto guchia curutsi'ìdi'i qui'ì nna tanuą inte'. ²⁴ Porqui'ni nuỹa tediba dua iqquì etúa latsi'ì la'labàni qui'ì nna, pues gunitti lą na. Pero nuỹa tediba ga'ną dispuesto tanúą inte' màsqui'ba gutti cą na, entonces ccabàni lą. ²⁵ Canchu ttu enne' nna gúniní qui'ì itúbani yétsiloyu, pero bitola nna ccą vencer nna nitti bá. Biani gana ni benia cá. Labí biỹa. ²⁶ Porqui'ni nuỹa tediba ettu'nią quixá'ą nu cca quia' ą'hua ca titsa' quíyi'ì nna, entonces ettu' huáni Nubeyu' de Ỹiabara' na canchu chi el'lanie lani la'yani' qui' Tata Dios nna ca ángeli qui'e nna para cu'úbie. ²⁷ Hualigani te' nia' le qui'ni tuchùppa canu tsè'e nì lani inte' nna labí gatti cą hàstaá qui'ni ilá' ỹáni cą ti'iỹa ná reino qui' Tata

Dios.

²⁸ Xunu' ubitsa tì'ga bitola de ra Jesús ca tìtsa'a' nna, guchi'e Pedrua nna Juáan nna Jacóbu nna huíe lo i'yaá huèni oración. ²⁹ Miéstraste runie oración nna bettsiání la' rinna' quì'e nna, a'hua ÿúe nna beyacca tsíttsì tùni nna uccua tittiní. ³⁰ Làniana de repente tabá nna gùdu chuppa ca ènne'yu' ru'a lúe nna rue' cabi tìtsa' lani e. Ca enni'a nna ná cabi Moisés nna Elías nna. ³¹ Gutsé'e cabi làhui' la'yáni'a nna bè' cabi tìtsa' ti'ÿa ccá Jesús padecer le' Jerusalén. ³² Pedrua lani áchuppa ca discípulo tsè'e lani bía nna, demasiado bétsiàla da' qui' cabi, pero ténnà' bá cabi nna bilá'ni cabi la'yani' nu cca tittiní cuerpo qui' Jesús lani áchuppa ca ènne'yu' tsè'e cabi lani e. ³³ Chi deyya taání Moisés nna Elías nna, gunne tè Pedrua nna ra bi Jesús: Maestro, yala tsè' canchu eyà'na ri'u nì nna guni tu' tsunna yú'u l-la' tó': ttu para cuiá'lu' nna, áttu para Moisés nna, attu para Elías nna. Pero Pedrua nna nìhua làa yù bi biÿa nuá ra bía. ³⁴ Atsaba rinne bi ca tìtsa'a nna gul·lani ttu bía nna bedibàga'a' cabi. Làniana yala gùtsini cabi porqui'ni gutebé'ni cabi chi yù'u cabi le' bía. ³⁵ Làniana biyénini ttu tsi'i dèsdeba le' bía nna rèe: Là enni'ì enni'a' ÿì'nia', yala catsi'í ti' e, liudà naga' le qui'e. ³⁶ Biyeni dibáni cabi ca tìtsa'a nna bilá'ni cabi qui'ni álatèruba Jesús du. Ca discípuluá nna uccua taá tsi qui' cabi nna, nú ttú tení nuÿa gutixa'áni cabi nu bilá'ni cabi.

³⁷ Attu yu'utsá nna de beyàdi cabi lo i'yaá nna, iÿétse'ní ca enne' dia cã tattsa' cã Jesús. ³⁸ Ttu nubeyu' entre ca enne' ÿétse'á nna gunne tiã idìtsani nna rã: Maestro, ratta'yúnia' cuiá'lu' qui'ni

thá' lu' inna' lu' ÿì'ni ya'a, pues turubã dua quia'.
 39 Porqui'ni ttu espíritu malo nna rudàxu'ã na, de repente taá ribétsiya'ã nna ruxitti' tsa'tsa'niã na, betsina' ní ruduã rú'ĩ nna runiã na mal-tratar, nibàni rúts'e latsi'ĩ na. 40 Chi gunábania' ca discípulo qui' cuíã'lu'ã qui'ni gudàl·la cabi espíritu malua fuera, pero labí uccuani cabi. 41 Becàbi Jesús nna rèe: Lebi'ĩ descendiente qui' canu labí ríalatsi' nna ca rebelde nna, atsáliacà'a itsá dâa te' cuénia' lani le nna gúchía' le cá. Tahua' ÿi'ni lù'ã nì. 42 De gubíga' nubeyu' cuìti'a lâti du Jesús nna, berixi betetsíní espíritu malua na bexitti' tsa'tsa'niã na, pero Jesús nna gutìl·lée espíritu malua nna beyuni tìe nubeyu' cuiti'a, bete tìe na cuenta lani tàta qui' niá. 43 Iyaba cã nna biquila' yà'ani latsi' quĩ de bilá'ni cã ti'ĩã ná la' retúalatsi' qui' Tata Dios.

44 Miéntraste rulaba latsi' quĩ acerca de iyaba ca milagro nu beni Jesús nna ra tìe ca discípulo qui'áa: Liudà tsè' naga' le nu équixa'a', bittu iÿùl·lani le na: I'yu tsá qui'ni gute cã cuenta Nubeyu' de ÿiabara' lâtsi' ná' ca enne'. 45 Pero làcabi nna labí gutelíni cabi ca tìtsi'ĩ, porqui'ni labí ná qui'ni ennia cabi cuenta, ã'hua labí beyáÿani cabi inàba titsa' cabi e acerca de ca tìtsa'a.

46 Làniana gudulo ca discípuluá huèni discutir sobre de nũyala cabí ccá adiru enne' ÿeni. 47 De gutelíni Jesús la' rulaba latsi' nu té lo losto' cabi nna, gũÿi'e ttu huatsa to' bedue na luítte'é. 48 Làniana rèe cabi ttu ejemplo: Nuÿa tediba guniã recibir huátsíĩ porqui'ni ríalatsi'ĩ inte' nna, entonces tì'atsi inte' bá nuá runiã recibir. Ã'hua nu

runiã inte' recibir nna, álahua tsua' teruba inte' runiã recibir sino hàstala enne' guthel·le'e inte' runiã ne recibir. Porqui'ni canu rulaba latsi' qui' qui'ni labí dacca' ça entre lebi'ì nna, làça nna adila enne' ÿeni ná ça.

⁴⁹ Làniana becàbi tè Juáan nna ra bi Jesús: Mae-stro, bilá'ni tu' enne' qui'ni lani nombre qui' cuiã'lu' nna runiã mandado ca espíritu malo qui'ni eria ça lo losto' ca enne', pero gunèni tu' a qui'ni bíttuúru guniã na porqui'ni labí láníã ri'u. ⁵⁰ Jesús nna rèe bi: Bittu guthàga' li a, porqui'ni nu labí ná contrario qui' ri'u nna, pues parte ri'u ba dúã.

⁵¹ De chi bì'yu tiempo qui'ni ccá Jesús recibir le' ÿiabara' nna, gulèqquia tsittsì taá latsi'e éyyeé Jerusalén. ⁵² Beneru tìe tuchùppa ca discípulo qui'áa. Làcabi nna huía cabi hàstaá ttu yetsi qui' región láã Samaria; le' yétsiá nna gunàba cabi ttu lugar para Jesús. ⁵³ Pero canu Samáriá nna labí beni ça ne recibir porqui'ni née ttu enne' de raza judío nna déyyeé Jerusalén. ⁵⁴ De beyu ca discípuluá qui'ni betsibi bá ça ne nna, acca Jacóbua nna Juáan nna ra tè cabi e: Señor, tsí hua calatsi' cuiã'lu' qui'ni inàba ri'u qui'ni chadi yi' qui' ÿiabara' para gul·luÿã latsi' qui' de una vez tení tì'a beni Elías tiempo antigua. ⁵⁵ Gunna' tè Jesús cabi nna gutìtse'e cabi nna rèe: Lebi'ì nna nìdi làa yù le biÿa clase espíritu ní té qui' le. ⁵⁶ Porqui'ni inte' nna labí daya' para guniã' qui'ni gul·lúÿa taá' latsi' ca enne', sino para gudilàa lá ya' ça. Làniana huía cabi attu yetsi to'. ⁵⁷ Néda bá yù'u cabi nna ra tè ttuã: Señor, hua tanua' cuiã'lu' gaÿa tediba tsía cuiã'lu'. ⁵⁸ Becàbi Jesús nna rèe na: Ca beda' nna hua tsìa

bèlia qui' qui, a'hua ca bìnni to' ridàa lo be' nna hua tsìa huá xcu'ni to' qui' qui, pero Nubeyu' de Ýiabara' nna labí té gaÿa quixa iqquie. ⁵⁹ Ra tè Jesús áttuq: Gutà tanó inte'. Lq nna becàbiq nna rã ne: Señor, be'él·la' ýá inte' éya'a' tacáttsi'a' tàta qui'a. ⁶⁰ Jesús nna rèe na: Be'él·la' canu yàttia' gucàttsi' luetsi nu yatti qui, pero lu' nna huía taquixá'a nu cca qui' reino qui' Tata Dios. ⁶¹ Làniana ra huá áttuq ne: Tanó huá' cuiq'lu' Señor, pero be'él·la' ýá inte' táchú tìtsa'a' canu tsè'e le' litsá'a'. ⁶² Jesús nna rèe na: Nu nudàxu' nì'a yarátu nna canchu gudèqquia lúj para inna'q cuè'e líj nna, entonces labí ttùli rida' nàa qui'j. A' tehuá nu calatsi'j tánúq inte', porqui'ni canchu dua ba iqquj nu té yétsiloyu nna entonces labí iÿu'q para reino qui' Tata Dios.

10

¹ Gutè ba nuá nna, beni Señor nombrar á setenta ca ènne'yu' nna guthel·le'e chuppa chuppa cabí para neru çabi tsía cabi iyaba ca yetsi nna ca rancho to' nna làti ná qui'ni tsíe. ² Ra tìe cabi: Hualigani iÿeniní lènà' chi té para éÿu', atsi'ini tuchùppa rúbani ca obrero tsè'e. Acca linàbani Tata Dios enne' ná Xana' lóyúj qui'ni ithel·le'e adí ca obrero gutùppa çq lènà' qui'e. ³ Hué' le cuidado, porqui'ni làti tsía le nna hua té peligro, tì'a canchu tsè'e ca carnero to' entre ca lobo. ⁴ Bittu huá' le bolsa nìhua bel·liu. Bittu cu'ú nì'a le biÿa. A'hua nú ttú tehuá nuÿa gul·luítsa' le lo néda. ⁵ Gaÿa tediba yú'u ní gá'a le nna, primérute ina le: La'ÿeni para lo losto' ca enne' tsè'e le' yú'j. ⁶ Canchu tsè'e nía canu rú'ulatsi' qui' ca tìtsa' de la'ÿeni nna, làniana gata' huá la'ÿeni lo losto' qui'. Pero canchu gutsìbi çq le

nna, entonces labí la'ÿeni egà'nà lani làçà, sino lani lebi'i ba eyà'nà. ⁷ Canu guni çà le recibir nna, nía bá ccá lugar qui' le; iyate nu gunna çà qui' le nna pues go ba le çà, í'ya ba le çà nna, porqui'ni ttu obrero nna cca b́ mererer th́ láyĭ. Bittu eyá'na le ttu ttu yú'u bá. ⁸ Gaÿa tediba yetsi ní gá'a le nna, canchu guni çà le recibir nna, go ba le nu gutsia çà ru'a lo le. ⁹ Eyuni huá le canu rà'ni nía. Gá tè le çà: Calatsi' Tata Dios qui'ni hue'èl·la' li e qui'ni quée enne' cu'úbia'nie le. ¹⁰ Pero canchu itsina' le ttu yetsi làti labí tsú'ulatsi' quĭ ca titsa' nu inne le lani çà nna, eria le lo ca néda nna ina le: ¹¹ Hàstaá bestè qui' yetsi qui' líĭ nu chi uccua nì'a tu' nna rucuíbi tu' a por ttu seña contra lebi'ĭ, pero ccá le saber qui'ni gul·lani reino qui' Tata Dios ru'a puerta qui' le. ¹² Riquixa'ánia' le qui'ni adila fuerte ccá la' tsialatsi' qui' Tata Dios nu ch̀ da'la lani yétsiá t̀ chula lani ca enne' Sodoma.

¹³ Ica'rútsi'Íru lu' yetsi Corazín. Airu lu' yetsi Betsaida. Porqui'ni cáalá le' ca yetsi Tiro nna Sidón nna uccua ca milagro canu chi uccua lani lebi'ĭ, pues cuando lání ch̀ gucu' çà lári' corriente nna gurè'ni çà lo tte, seña de qui'ni reyacca çà arrepentir por ca tul·la' qui' quĭ. ¹⁴ Acca canchu chi íl·lani juicio nna, huaÿia' lá castigo tsía canu yetsi Tiro nna Sidón nna t̀ ca'la lebi'ĭ. ¹⁵ Lu' nna yetsi Capernaum, tsí rulaba latsi' lu' qui'ni cca lu' mererer tsía lu' ÿiabara'. Pero hasta rúbani infierno èxxa lu'. ¹⁶ Raá ruhuá Jesús ca discípulo qui'áa: Nuÿa tediba gudà nàgui'ĭ qui' le nna, t̀ atsi quíba' nuá rudà nàgui'ĭ. Nuÿa tediba rutsibią le nna, t̀ atsi inte' ba nuá rutsibią. Nuÿa tediba rutsibią inte' nna, rutsibi huá Enne' guthel·le'e inte'.

17 Beyeqquia setenta ca enni'a lani la' redacca' latsi' nna ra cabi: Señor, hàstaá ca espíritu malo nna riyénini çá qui' tu', porqui'ni rinèni tu' çá lani nombre qui' cuiã'lu'. 18 Jesús nna rée cabi: Làchu. Bilá' huá te' Satanás huàdiã de ÿiaba tì'a ttu éthá. 19 Liúda naga' le. Inte' nna chi benna' la'huacca lani le para gúl·lia le iqqquia ca bèl·là nna iqqquia caÿareyí' nna, a'hua guni le vencer itute fuerza qui' nu ná contrario qui' rí'ua nna, pero labí biÿa mal ni thacca' le. 20 Pero inte' nna nia' le: Bittu edácca'ni le de qui'ni té la'huacca qui' le sobre ca espíritu malo, sino lédácca' láni de qui'ni nombre qui' le nna tsia çá lo lista qui' ÿiabara'.

21 Làniataá nna bitsina' ttu la' redacca' latsi' lo losto' Jesús por Espíritu Santo, acca gunnie nna rée: Tata Dios quia', runia' cuiã'lu' adorar tulidàba nna cuiã'bálu' ná Señor qui' ÿiabara' a'hua qui' yétsiloyu. Inte' nna ruí'a' cuiã'lu' gracia porqui'ni canu yala la' riyeni té qui' qui' nna labí be'él·la' cuiã'lu' qui'ni gunibia' çá ca enseñanzì, nìhua lani canu rulaba latsi' qui' qui'ni yala ritelíni çá nna, pero lani ca huatsa to' la nna chi beni cuiã'lu' çá declarar. A' ba beni cuiã'lu' porqui'ni anía guyú'u latsi' cuiã'lu'. 22 Làniana ra Jesús canu tsè'e nía: Iyaba ca cosa nna chi benna Tata quí'a latsi' nàya'. Lanú nuÿa nabia'niã ÿi'ni áa sino làteruba Tata Dios nna nabia'nie bi. Lanú nuÿa nabia'niã Tatáa sino ÿi'ni áa tètuba a'hua nuÿa ba cálatsi' ÿi'ni áa gunie Tata qui'áa declarar lani çá. 23 Làniana gunna' Jesús ca discípuluá nna gunènie cabi nna rée: Ica'rubà canu rilá'ni luetsi ca cosa nu rilá'ni le. 24 Riquixa'ánia' le qui'ni iÿetse' ca enne' uccua profeta tiempo antigua nna a'hua ca rey nna yala

gudà latsi' cabi ilá'ni cabi nu rilá'ni le, pero labí bilá'ni cabi ạ. Uccua huá latsi' cabi iyénini cabi nu riyénini le pero labí biyénini cabi ạ.

²⁵ Làniana guduli ttu nu rethàtsilà'na nu ra lo ley qui' Tata Dios nna uccua latsi'ị ccạ saber ti'iyà ecàbi Jesús, acca rạ ne: Maestro, biani ná qui'ni gunia' para gata' la'labàni nu labí ttiạ quia' cá. ²⁶ Lèe nna rèo na: Biani ga'na escrito lo ley. Biani ritelíni lu' làti rùl·là lu'. ²⁷ Becàbiạ nna rạ: Cấtsi'íni lu' Señor Dios qui' lu' lani itute losto' lu', lani itute latsi' lu', lani itute fuerza qui' lu', ạ'hua lani itute la' rulaba latsi' qui' lu'. Cấtsi'í huáni lu' iyaba ca luetsi enne' lu' ti'atsi la'a lu' ba. ²⁸ Jesús nna rèo na: Tsè'ba becàbi lu'. Beni ba nua' nna huacca bani bá lú'. ²⁹ Pero lạ nna uccua latsi'ị iria nàriạ, acca rạ Jesús: Nú tegá nua' dà te' cấtsi'í te' ni'i. ³⁰ Becàbi Jesús nna rèo: Ttu nubeyu' nna beda'ạ ciudad Jerusalén nna deyyạ para yetsi Jericó. Bedàxu' ca ubànà na, gutua tè cạ iyaba nu nù'ạ hàstaá ca yó niá, yala idí' bè' cạ na, bètti tsaliáti taání cạ na becuitta tè cạ. ³¹ Dia tè ttu sacerdote néda nía nna bilá'niạ nubéyu'a nna, pero gutè taạ ttu lado la. ³² Anía tehuá beni ttu descendiente qui' Leví. Exa tegáabá nía chi díạ nna bilá' baniạ nubéyu'a nna, pero gutè tehuá ttu lado la. ³³ Làniana ttu nubeyu' samaritano nna yù'u huá néda nna gul·lani bậ exa taá làti té nubéyu'a nna bilá' baniạ na, yala betúa latsi'ị na. ³⁴ Gubíga' tiạ, gutàbiạ aceite nna vino nna lo ca huè' qui' niá nna be'iga' tiạ lári'. Làniana beduạ na cuè'e bia' qui' niá nna, guche'ạ na le' posada nna yala cuidado bè'ạ na. ³⁵ Attu yu'utsá nna de dia enne' samaritanuá éda'ạ nna,

gulèqquią chuppa moneda nna bete tią lani nu ná xana' posádaá nna rą na: Beyu bal·la tsàtè' ą nna, iyaba nu gúniíru lu' gasto nna, hua yíyá bá ya' ą canchu chi eyèqquia'. ³⁶ Annana, biani rulaba latsi' lu'. Núlá canu nubéyu'a uccuatsi'íni nu beni dí' ca ubànàa cá. ³⁷ Lą nna rą ne: Nu gúta' la' retúalatsi' qui'į lani nubéyu'a. Làniana ra tè Jesús na: Beyya nna beni huá seguir luetsi ejemplo nu bedua enne' samaritanuá.

³⁸ De yù'u tè Jesús néda nna, gutà'a tìe le' ttu yetsi to'. Nía nna dua ttu niula láą Marta nna benią ne recibir litsi'į. ³⁹ Marta nna dua ttu ýlį ląą María. María nna gure' taą ru'a lo Jesús nna bedà nągui'į ca titsa' qui'e. ⁴⁰ Pero Marta nna yala purari cą de runią lo sìnį. Gubíga' tią ru'a lo Jesús nna rą ne: Señor, tsí bihua biyā cani cuią'lu' qui'ni ýlį y'į nna ruxèba latsi'į qui'ni ttùba' gunia' servir. Gútsí tsàtè' cuią'lu' ą qui'ni guni tí'ą inte' cualani. ⁴¹ Becabi Jesús nna rēe na: Marta, Marta, yala nųyue cani lu', ą'hua yala purari cca lu' lani iųetse' ca tsina, ⁴² pero tturuba cosa adiru caduel·la'. Ýlį lu' Marį nna chi becu'ą nu adiru dacca' nna, labí ná qui'ni nuyā enne' ní guthąga'nią na.

11

¹ Ttu tsá lanía nna huía Jesús ttu lugar yà'latsi' para gunie oración. De belųyā oración qui'áa nna, gunne tè ttu discípulo qui'áa nna ra bí e: Señor, beluè'ni cuią'lu' intu' guni tu' oración, tì'a beluè'ni Juáan ca discípulo qui' bía. ² Làniana ra tè Jesús cabi: Canchu chi guni le oración nna ina le į:

Tata Dios qui' tu' enne' dua ýiabara', rinàba tu':

Qui'ni nombre qui' cuią'lu' nna ccą nombre
sagrado lo losto' ca enne',
A'hua qui'ni ìta la' rigú'ubia' qui' cuią'lu' le' yétsiloyu
nna,
Ccá bá nu rú'ulatsi' cuią'lu' tì'ba ÿiabara' ą'hua le'
yétsiloyu.

³ A'hua qui'ni gunna cuią'lu' nu go tu' ttu ttu tsá.

⁴ Beyuniyén latsi' cuią'lu' ca tul'la' qui' tu',
porqui'ni ą'hua intu' nna reyuniyén latsi' tu' qui'
iyaba ca luetsi enne' tu' biyā ruthácca' cą
intu'.

Bittu guthàna ná' cuią'lu' intu' ccá tu' tentar,
sino gudilà la cuią'lu' intu' le' iyaba canu ná mal.

⁵ Ra huá Jesús cabi: Canchu dua ttu amigo qui' le
nna tsía le le' litsi'ì ríluela yèlà nna gá li ą: Amigo,
gulèqquia sàni inte' tsunna ettaxtíla, ⁶ porqui'ni
gul'lani ttu amigo quia' déda'ą de viaje nna labí
biyā té hué' ya' ą gúą. ⁷ Pero nuá nna ecàbią
dèsdeba liú'u nna iną: Bittu uquitsí'ni lu' inte'
porqui'ni puertą' nna chi yáya ą'hua chi tía' lani
ca huatsa to' quíyi'ì nna labí ccá chatha' gunna'
nu rinàba lu'. ⁸ Beni Jesús seguir nna rèe: Labí
chathą gunną nu rinàbą màsqui'ba ną amigo qui'ì,
pero nia' le: porqui'ni bihua rudutsią rinàbą nna,
acca huayàtha amigo qui'ì nna gutią iyaba nu
riquìna'nią. ⁹ Inte' nna nia' le: Línaba nna huadi'
ba le. Leyíla nna huetsèla báni le. Linne ru'a
ttu puerta nna huathàlia báni cą le. ¹⁰ Porqui'ni
nuyā tediba rinàba nna huadi' bą. Nu reyíla nna
huetselá bánią. Nu rinne ru'a ttu puerta nna
huayàlia bą. ¹¹ Lebi'ì nu ná tàta, canchu ttu yì'ni le
inàbą ttu ettaxtíla gúą, pues labí hué' li ą ttu íyya
álá. O canchu inàbą ttu bél'la to' gúą nna, pues aya

labí ná le capáz gute le ttu bèl·là la quì'ì álá. ¹² A'hua labí hué' li ą ttu ŷareyí' canchu inàbanią le ttu tsitta gúą álá. ¹³ Acca canchu lebi'ì màsqui'ba ná le enne' tul·la', pero hua yù ba le gute le ca cosa tsè' qui' ca ŷi'ni le, tsí álahuá adí telá Tata qui' le enne' dua ŷiabara' gutie Espíritu Santo lani gusto ní qui' canu rinàbani cą ne álá.

¹⁴ Ttu tiempo lània nna dua ttu nubeyu' uc-cuą mudo por ttu espíritu malo. Jesús nna benie mandado espíritu malua qui'ni gútse'e latsi'ì nubeyu' mudua. Beria bą nna gunne chì nubéyu'a. Canu bilá'ni nna uccuaŷí yà'aba latsi' qui'. ¹⁵ Pero tuchùppa cą nna ra lá cą: Lani nombre qui' Beelzebú nu ná huexána' qui' ca espíritu malo runią mandado qui'ni eria cą. ¹⁶ Attu te cą nna, para guni bá cą ne prueba nna, gunàba cą qui'ni gunie ttu milagro de ŷiabara'. ¹⁷ Pero lèe nna gutebé' taánie la' rulaba latsi' mal qui' qui' nna rèe cą: Canchu nuŷa ttu gobierno lá'aní la' rigú'ubia' qui'ì nna til·la tè contra la'a labi' nna, entonces l·luŷa taá latsi'ì. A'hua ttu familia nna, canchu lá'aníą por biŷa ca disgusto ní nna, entonces labí itsáagá gúchią. ¹⁸ A'hua Satanás lani ca espíritu malo qui'ì nna, canchu lá'a huání luetsi qui' nna, entonces ti'ala modo cue' tsittsi' la' rigú'ubia' qui'ì cá. Anía nia' le porqui'ni rena le qui'ni por cualani qui' Beelzebú acca rudál·la' fuera ca espíritu malo. ¹⁹ Cáalá por medio de Beelzebú runia' mandado ca espíritu malo qui'ni eria cą, entonces nú lá por la'huacca qui'ní rudàl·la ca discípulo qui' le fuera ca espíritu malo cá. Acca por nu runi la'a mísmuba ca ŷi'ni le nna rulue'ní qui'ni yala equivocado ná

le. ²⁰ Pero lani la'huacca qui' Tata Dios runia' mandado qui'ni eria ca espíritu malo, acca ccá le saber qui'ni chi gul·lani la' rigú'ubia' qui'e lani lebi'ì. ²¹ Runia' le attu comparación: Canchu chi ttu nubeyu' valiente rue' cuidado litsi'ì lani yèrìa nna entonces bihua nùyue caniā por ca interés nu té qui'ì porqui'ni rue' tsì'ą cą cuidado. ²² Pero canchu attu enne' adiru valiente íl·laniā nna guniā nubéyu'a vencer, entonces cúa tiā iyate ca yèrìa qui'ì nna quithia huą iyate nu té le' litsi'ì lani ca compa' qui'ì, màsqui'ba nubéyu'a nna yala confianza gùppą lani ca yèrìa. ²³ Acca nia' le qui'ni nu labí du lani inte' nna, entonces contra lá inte' duą. A'hua nu labí rutùppą lani inte' nna runittilo lá.

²⁴ Canchu chi reria ttu espíritu malo lo losto' ttu enne' nna, làniana ribèni lo be' bą ca lugar bitsi hueyìla gaỹa edi' latsi'ì, pero labí ritaxácca'ą, acca caniā: Eyèqquia ca'á' litsá'a' làti gudáyá ya'a. ²⁵ Canchu chi etsina'ą nna ilá'nią qui'ni enni'a nna ná tì'a ttu yú'u nu nettia bą nna chi lúba ràba le' yú'a nna yala tsè'ni chi ná arreglado. ²⁶ Làniana tsíą táxi'ą ágàtsi ca espíritu adila mal tì'chu lą nna gá'a tè iyaba cą lo losto' enni'a nna xúa cą nía. Làniana adí teérulá peor ccá la' tté qui' enni'a tì'chula antes.

²⁷ Loti' ra Jesús ca tìtsa'a nna, idìtsa tsè' gunne ttu niula làhui' ca enne' yétse'á nna rą: Ica'rubà niula beditsina' bi cuią'lu' nna begàtsi' bi cuią'lu'. ²⁸ Jesús nna ra tìe: Adítelá ica'rubà canu riyénini titsa' qui' Tata Dios nna runi cą nu rèe.

²⁹ Hua diala ritùppa ca enne' yétse'ní làti du Jesús, làniana gudulo tìe gunnie nna rèe: Ca enne' tsè'e annana yala mal ná la' rulába latsi' qui' qui,

acca rinàba cą qui'ni gunia' ttu milagro, pero labí biŷa cosa milagroso ní ilá'ni cą, sino làteruba nu chí uccua lani Jonás tiempo antigua. ³⁰ Porqui'ni tì'a Jonás uccua bi ttu señal para ca enne' Nínive, a'hua Nubeyu' de Ýiabara' nna quée ttu señal para ca enne' tsè'e tiempo anna. ³¹ A'hua niula nu gulú'ubi'ą itute pais sur tiempo antigua nna eyátha huą lani ca enne' tsè'e tiempo anna canchu chi gal·la' tsá juiciuá nna gútsiá falta qui' quį para thí' cą castigo; porqui'ni idittu' tsè'ni huíą para iyéninią la' riyeni tsè' qui' rey Salomón. Atsi'ini entre lebi'į nna du ttu enne' adila sabio tì'chula Salomón, pero labí caso runi le quì'e. ³² Canchu chi gal·la' tsá juiciuá nna, eyátha huá ca enne' qui' ciudad Níniveá para gútsia cą falta qui' ca enne' tsè'e tiempo anna para qui'ni ccá cą condenar. Porqui'ni ca enne' qui' ciudad Níniveá nna betsiá bání la'labàni qui' quį de biyénini cą titsa' qui' Tata Dios nu gutixà'a Jonás. Pero entre lebi'į nna du ttu enne' adila dacca' tì'chula Jonás.

³³ Lanú nuŷa rugàl·la' ttu yi' para gúduą na làti gàttsi', nìhua ŷareé' ttu cajón, sino qui'ni rudua lą na ttu lugar latí gudàni'ą qui' iyábani ca enne' gá'a le' yú'a. ³⁴ Iyyalo ri'u nna ná tì'a ttu lámpara para ri'u. Acca canchu íyyalo lu' ná tsè'bá, entonces labiru biŷa la'yani' reyàtsani lu'. Pero canchu íyyalo lu' labí yùą biŷa nua' la'yani', entonces tál·lią qui'ni reqquia bá lu' le' chul·la. ³⁵ Acca bè' cuidado la'yani' nu dua lo losto' lu' qui'ni làa tálią lu la' chul·la. ³⁶ Acca canchu labí biŷa la'yani' reyàtsani lu' nna nìhua nìdi tí' chul·la bíttuúru té qui' lu' nna, entonces itute ccá la'yani' tì'a ttu lámpara tsè'

canchu chi rudàni'ą qui' lu' lani itute la'yani' quì'ì.

³⁷ De beyacca gunne Jesús ca tìtsa'a nna, ttu enne' fariséua nna benią ne invitar gúe lani ą. Gutè'e le' yú'u qui' nuá nna gure'níe lo meýa. ³⁸ Bilá'ni fariséua qui'ni labí gutii né'e ántesca gúe tì'a costumbre qui' caniá para ccá ą purificar nna, acca yala uccuaýí latsi'ì. ³⁹ Señor nna ra tie na: Lebi'ì ca fariseo nna reyìi le tsua' teruba fuera la qui' ttu taza nna plato nna, pero liú'u lá nna ná rùą cùttsi, tì'a ná losto' le porqui'ni tsá'tí'níą la' ubàna nna la' huèni maldad nna. ⁴⁰ Yala necio ná le. Tsí bihua yù le qui'ni Tata Dios enne' beni nu rilá'ní lo ra' nna, beni huée lado liú'u lá cá. ⁴¹ Líute losto' le lani Tata Dios, làniana itúbani le eyacca nàri hàstaá la' rulábalatsi' qui' le nna ą'hua ca hecho qui' le nna. ⁴² Ica'rútsi'íru lebi'ì ca enne' fariseo, porqui'ni ribèqquia le qui' diezmo hàstaá ca semilla lathi to' tì'a ná menta nna ruda nna iyaba clase de legumbre nna; pero ca cosa nu ná adírlá importante tì'a ná lu'uxticia tsè' nn la' tsi'ilatsi' nna labí runi le ą. Ca nua' lá náduel·la' guni le, pero ñihua làa guxùl·la latsi' le gúte le qui' diezmo. ⁴³ Icarútsi'íru lebi'ì ca enne' fariseo, porqui'ni nu catíppá bá runi le para gal·la' le ca asiento nu dàa íqquiará' tè le' ca sinagoga, ą'hua yala ribèni le làti cca i'yya para qui'ni iýtse' ca enne' nna gappa ą le tìtsa'. ⁴⁴ Ica'rútsi'íru lebi'ì ca maestro de la ley religioso nna ca fariseo nna, porqui'ni ná le tì'a ca bà nu labiru rulue'ní lo quì; rida' tè ca enne' lo quì sin qui'ni làa ritebé'ni ą; ą' tení ná le porqui'ni yala enne' tsè' rulue' le, pero álahuá hua líni le. ⁴⁵ Làniana gunne ttu maestro de la ley qui' caniá nna rą Jesús: Maestro, hàstaá intu' nna yala chi riyenidí'ni tu' por ca tìtsa'

qui' cuiã'lu'. ⁴⁶ Jesús nna rèe na: A'hua ica'rútsi'íru lebi'ì ca maestro de la ley, porqui'ni ca costumbre nu rutsia le iqquia ca enne' nna ná tì'a ttu yuà' idi'iní nu lanu nuña ridàã huá'niã na, pero lebi'ì nna nìdi tito' làa calatsi' le cúa li ã. ⁴⁷ Airu lebi'ì, porqui'ni rilìtha le ca monumento xeni lo bà qui' ca profeta ca enne' betti ca ta' tàta qui' lía. ⁴⁸ Anía modo nna ritelíní qui'ni tsè'e hua le de acuerdo lani nu beni ca ta' tàta qui' lía, tulappa tsí'ní ná lé lani çã. Pues làcã nna hualigani betti çã ca profétaá, pero lébi'i nna rilìtha tè le monumento lo bà qui' cabi. ⁴⁹ Por nua' nna la' riyeni tsè' qui' Tata Dios nna rèe: Ithél·la'a' ca profeta nna ca apóstol nna lani çã. Ttu te cabi nna gùtti lá çã cabi, áttu te cabi nna gútsia latsi' quì cabi. ⁵⁰ Pues, lani ca enne' tsè'e tiempo annana enàba ÿíiyá' Tata Dios réni qui' iyaba ca profeta ca enne' bétti çã dèsdeba loti' uccua yétsiloyu, ⁵¹ dèsdeba réni qui' Abel hàstaá réni qui' Zacarías enne' bétti le le' lí'a qui' templua èxabá làti du altar. Attu vuelta nia' le qui'ni lani ca enne' tsè'e tiempo annana enàba ÿíiyá' Tata Dios réni qui' cabi. ⁵² Airu lebi'ì canu rethàtsilà'na nu ra lo ley nna té làtsi' ná' le llave nu ithàlia puerta de la' ritelíniá, pero la'a lebi'i ba nna labí rá'a le, nìhua làa rue'él·la' le canu uccua latsi' gá'a.

⁵³ Beyacca ba gunne Jesús ca enseñánzaá lani çã nna, entonces ca maestro nu rulue' ley religioso qui' caniá ã'hua ca fariséua nna yala bitsa'áni çã ne nna gudulo çã bequìtsí'ni çã ne nna nuýé tsè'ni gunàba titsa' çã ne. ⁵⁴ Bedà tsìttsì tení naga' quì tì'íyã ecàbie nna gulèda çã canchu xiaba uquìnnia çã ne lani ttu titsa' para gappa çã néda biyã caúsani

gútsia cą còntre.

12

¹ Bitola nna bitùppa tè iỹé mili' ní ca enne' hàstaá qui'ni rùl·lianí ló nì'a luetsi quí de tántuani iỹé cą. Làniana gudulo Jesús gutixa'ánie ca discípulo qui'áa adí ca enseñanza nna rée: Guyu le qui'ni làa thí' yeé'ni ca fariséuą' le, porqui'ni yala enne' tsè' rulue' cą pero álahuá hualíni cą. ² Pero labí ttu cosa nu gàttsi' té sin qui'ni làa ilá'nía, nihua biỹa ttu secreto ní té sin qui'ni làa guna ri'u ą. ³ Acca iyaba ca cosa nu chi gunne le le' chul·la nna, pues ccą declarar le' la'yani'. A'hua nu chi gunne lànà le le' yú'u nna, ccą declarar dacca'ló taá.

⁴ Lebi'į amigos quia': Bittu gátsini le canu calatsi' quí gutti cą le, porqui'ni cuerpo teruba ccani cą gutti cą. ⁵ Inte' nna innia' nuỹa dani le gátsini le: Lígátsi láni enne' huaccanie cúeé la'labàni qui' le, bitola nna té la'huacca qui'e gudàl·lee le lo yi'bél·laá. Acca nia' le qui'ni là enni'a nna ná qui'ni gátsini le. ⁶ Tsí álahua ritò'o gayu' ca bìnni to' por chuppa moneda to' rúbá làti cca i'yya cá. Pero labí riỹùl·lani Tata Dios nuỹa la ttu cą. ⁷ Pues, hàstaá ittsa' iqquia le nna báabànie iyáỹiani cą. Acca bittu gátsini le, porqui'ni lebi'į nna adítelá dacca' le tì'chula iỹetse' ca bìnni to'.

⁸ Inte' nna nia' le qui'ni nuỹa tediba gudàlianią inte' ru'a lo ca enne' nna, entonces ą'hua inte' Nubeyu' de Ỹiabara' nna inne huá' nu cca qui' le ru'a lo ca ángel qui' Tata Dios. ⁹ Pero nu labí thí'chí'ą qui'ni ną enne' quia' ru'a lo ca enne'

nna, entonces a'hua inte' nna labí guni ya' a' presentar ru'a lo ca ángel qui' Tata Dios. ¹⁰ Nu'ya tediba inne contra inte' Nubeyu' de Yíabara' nna huatta' bá perdón qui'ì. Pero nu inne titsa' mal contra Espíritu Santo nna labí perdón gata' qui'ì. ¹¹ Canchu chi iche' ca le le' ca sinagoga nna gute ca le cuenta làtsi' ná' canu rigú'ubia' nna ca uxtícia nna, pues bittu nùyue cani le ti'iyá o bi'ya ecàbi le o bi'ya gá le ca. ¹² Porqui'ni la'a mísmutaá hóraá nna guni Espíritu Santo latsi' le nu dàni le inne le.

¹³ Làniana biria ttuà entre ca enne' yétsi'á nna ra ne: Maestro, gùtsi' bál·la bèttsi' yà'á' qui'ni íl·la'áníq' interés qui' ta' tàta qui' tù'a nna gunnà tsal·lue' quia'. ¹⁴ Jesús nna rèe na: Lu' nubeyu', núní chi beduà inte' para ccá' juez qui' le, or para íl·la'áníá' bi'ya té qui' le ni'i. ¹⁵ Ra tiè iyaba ca: Lihue' cuidado de iyaba clase de la' dàlatsi', porqui'ni masqui'ba i'ÿeni ní ca cosa chi guta' qui' ca enne', pero bel·liu qui' qui' nna bihua runnà la'labàni qui' qui'.

¹⁶ Gutixa'a huánie ca attu comparación nna rèe: Loyu qui' ttu nubeyu' rico nna yala lènà' chi bedi'á lì'ì. ¹⁷ Lã nna gure' tià yala belaba latsi'ì nna uccuanià. Biagani gunia', qui'ni lagáru ná cu'á' adí ca lènà' qui'yi'ì. ¹⁸ Làniana uccuanià: Chi yúá' bi'ya gunia': adila tsa' gutáppa'a' ca cùrrali qui'ya'a nna gunia' canu adiru xeni, nía nna cu'ú' tià' iyaba ca lènà' quia', a'hua adí bíyaáru té quia' nna, ¹⁹ làniana edilátsa'a' nna épa'a' la'a mísmuba inte': Yala i'ÿeni lènà' chi túani lu' para i'ÿetse' ni ida, acca bedi' bá latsi' lu' nna gù'ya gutò bá nna bedacca' báni nna. ²⁰ Pero Tata Dios nna rèe na: Enne' necio ná lu', porqui'ni nèlà nna gatti lu'; iyaba nu chi túani lu'

para la'a lu' ba nna, núlá qui' ccá cá. ²¹ Ra huá Jesús: A' tení ná nu rudàni ríqueza qui'ì, pero lani Tata Dios nna yala pobre ná.

²² Bitola nna ra tè Jesús ca discípulo qui'áa: Acca nia' le qui'ni bittu nùyue ga tsé'e le por ti'iÿa ccá le nu go le nna, nihua ti'iÿa ccá le nu gaccu' le nna. ²³ Pues, la'labàni qui' ri'u nna adila dàcca' a' ti'chula nu ri'ya ro ri'u; a'hua cuerpo qui' ri'u, ti'chula nu raccu' ri'u. ²⁴ Liuyuúruhuá ca bèqquà. Pues bihua rada ca ñihua labí rutùppa ca lènà', nihua làa rudua ca cùrrali làti cu'ú ca yeda qui' qui'. Pero Tata Dios nna ruì'e ca ro ca. Tsí álahuá adíruhá dacca' le ti'chula' làca cá. ²⁵ Núni le ccani itùnì á tsàtsità de tántua nùyue cania cá. ²⁶ Acca, canchu bihua ccani le guni le ttu cosa xcuichu to' rúbá nna, biala cca cathùtini le nùyue por bíyaáru adí ca cosa cá. ²⁷ Liuyuúruhuá ca ìyyà nu anta' i'yatò' ti'iÿa riÿeni ca, pues labí biÿa tsina ní runi ca nihua labí rul-la ca tùu. Pero riquixa'ánia' le qui'ni nihuani rey Salomón lani iyátení ca lári' fino nu guccu' bi nna, pero labí bilá' bi latsitè gani ti'a ca ìyyà tú'a'. ²⁸ Yala tsè'ni rugàccu' Tata Dios ca ixi' to' átsi'ini anta' ca ttu tsá teruba le' yétsiloyu nna guxtíla taá dia chì ca lo yi' le' horno. Lebi'ì nna, tsí álahuá adila dispuesto ga'na Tata Dios para gugàccu'e le cá. Pero labí rialatsi' le qui'ni iÿeni la'huacca té qui'e. ²⁹ Acca lebi'ì nna, bittu nùyue ga tsé'e le por ti'iÿa ccá le nu í'ya go le, bittu gulaba xàtagá latsi' le qui'ni làa etù la'ÿeni qui' le. ³⁰ Porqui'ni iyaba ca così dua iqquia canu labí fe qui' qui' té. Pero lebi'ì nna dua Tata Dios qui' le enne' hua yù bée qui'ni riquína'ni le ca così. ³¹ Acca adila tsa' líúdua iqquia

le nu cca qui' reino qui' Tata Dios; làniana iyábani adí ca cosa nna, ni nada bá íl·lani ça. ³² Lebi'ì ca carnero to' quia', ttu grupo xcuichu to' teruba ná le, pero bittu gátsini le, porqui'ni Tata Dios qui' lía nna chi rappée gusto gúnnée qui' le iyate nu rigú'ubi'e. ³³ Acca, ligùtti' iyate nu té qui' le nna líúte qui' ca enne' ritè là'di'. A' modo nna gáta'ni le ca bolsa nu labí güé, quiere decir ttu tesoro qui' le le' ÿiabara' nu labí tté qui'ì, làti lanú ubàna té nìhua làa runittilo bèl·là dìl·la' nna. ³⁴ Porqui'ni làti té ca cosa nu dacca' qui' lía nna, nía huá du la' rulábalatsi' qui' le.

³⁵ Lítsé'e listo, liugàl·la' léda taá ca lámpara qui' le, ³⁶ para qui'ni ccá le tì'a canu rue' cuidado ru'a puerta ribeda ça qui'ni él·lani xana' caniá huía bi thá'a. Para qui'ni cuantu taání él·lani bi ìnne taá bi ru'a puértaá nna, luégutaá ithàliani ça bi. ³⁷ Ica'rubà ca siérvuá, porqui'ni canchu chi él·lani xana' caniá nna, taxácca' bi ça tsè'e ça al tanto. Hualigani te' nia' le qui'ni la'a làbabi nna gudu mandil ru'a lo bi nna gúxuani bi ça lo méyaá nna gute bi nu go ça. ³⁸ Màsqui'ba él·lani bi ttú ríluela yèlà o màsqui'ba él·lani bi ttú ritì tsunna díla, pero yala ica'rubà ca siérvuá porqui'ni gulèda ça hàstaá qui'ni el·lani bi. ³⁹ Lítelíni attu ejémpluj: ttu tàta nna cáalá yùà biÿa hora íl·lani ubana litsi'ì nna, entonces labí gá'athia, anía modo nna labí hue'él·la'á nuÿa cuanà biÿa té le' yu'u qui'ì. ⁴⁰ Acca, a'hua lebi'ì nna lítsé'e al tanto, porqui'ni méruání hora nu nìdi làa rulába latsi' le nna, de repente taá él·lani Nubeyu' de ÿiabara'.

⁴¹ Làniana Pedrua nna ra bi e: Señor, tsí gùnne

cuiã'lu' comparación nì para intu' teruba o tsí para iyaba ca enne' áccá. ⁴² Becàbi Señor nna rèe: Nuni nua' ná siervo fiel nu té la' riyenitsè' qui'ì acca bethà'na tè xana' niá na le' yú'u qui' bíá para huí'ã na cuidado nna gútiã nu go qui' adí canu runi tsina hora ná qui'ni go çá cá. ⁴³ Ica'rubà siérvuá canchu chi étsina' xana' niá nna ilá'ni bi ã qui'ni runiã voluntad qui' bi. ⁴⁴ Hualigani te' nia' le qui'ni gute bi làtsi' ní'ì iyate nu té qui' bi para cu'úbi'ã. ⁴⁵ Pero canchu siérvuá gulaba latsi'ì nna cániã: Alahuá anna tè él'lani xana' ya'a, làniana thulo chiã huí'ã ca mózuá nna ca criádaá nna, ã'hua í'ya gúã hàstaá qui'ni ttáaniã. ⁴⁶ Làniana nìyalatsi' siérvuá nna él'lani xana' niá tsá nu nìdi làa ribedã bi, hora nu labí yúã nna. Acca xana' niá nna idí'ni guni bi ã castigar, làniana gudàl'la tè bi ã lanì adí canu labí runi tsè'. ⁴⁷ Siervo nu hua yù bã biã nuá rú'ulatsi' xana' niá qui'ni gúniã, atsi'íni labí beniã duel'la' guniã nu náni bi ã mandado, entonces lã nna thí'ã iÿetse' castigo. ⁴⁸ Pero siervo nu labí nabiã'ni nu rú'ulatsi' xàni'ì nna beniã nu dacca' ccáníã castigar nna, lã nna huaÿia' lá íyaá'ã. Acca nia' le qui'ni nuÿa tediba thí' iÿeni nna, entonces iÿeni huá enàbani çá na. ã'hua nuÿa tediba gute çá làtsi' ní'ì adí iÿeni nna, entonces adila iÿeni enàba ÿíya'ni çá na.

⁴⁹ Inte' nna daya' para thulua' ttu tsina nu gál'lá'ã le' yétsiloyu tì'a ttu yi' nna guniã vencer iyaba ca cosa mal. Demasiado rú'ulátsa'a' qui'ni gál'lá'ã pruntu taá. ⁵⁰ Náduel'la' ttía' por ttu sufrimiento nna yala sufrir canilátsa'a' hàstaá qui'ni i'yu tsá ccã cumplir. ⁵¹ Tsí rulaba latsi' le qui'ni daya' para qui'ni bíttuúru ccã chuppa la' rulábalatsi' cá.

Labí, sino íl·lá'a lánia' la' rulábalatsi' qui' ca enne'.
⁵² Porqui'ni dèsdeba nna làti tsè'e gayu' enne' le'
 ttu familia nna, la'ání luetsi qui; tsunna cą con-
 tra chuppa cą nna, chuppa cą contra tsunna cą
 nna; ⁵³ ttu tàta nna contra ÿi'nì, ą'hua ÿi'ni contra
 tàta qui'ì; ttu nàna contra ÿi'ni niulí, ą'hua ÿi'ni
 niula contra nàna qui'ì; suegra contra ÿolitsi'ì, ą'hua
 ÿolitsi' contra suegra qui'ì.

⁵⁴ Ra ruhuée ca enne' ÿétsi'á: Canchu chi rilá'ni le
 rel·lani bía lado renia bitsa nna, entonces rena taá
 le: Chi da' iyya. Anía ccá nna. ⁵⁵ ą'hua canchu chi
 riria be' lado sur la nna, entonces rena le: Yala ubá
 ccá. Anía ccá nna. ⁵⁶ Hua ritelí báni le ca seña nu
 cca qui' ca tiempo ÿiaba nna yétsiloyu nna. Bialacca
 rena le qui'ni labí télini le ti'iyá ná cosa importante
 nu cca le' yétsiloyu anna dacca'ló taá ni'i. Labí líni
 le.

⁵⁷ Bianicca labí la' riyeni tsè' té qui' le para
 cueqquia latsi' le guni le nu ná tsè' ni'i. ⁵⁸ Canchu
 ttu enne' dia bi hue' parte contra lu' ru'a lo uxtícia
 nna, entonces lu' nna ná qui'ni eyaccatsè' telá lu'
 bi miéntraste yù'u lu' néda lani bi para qui'ni làa
 gute bi lu' cuenta lani juez, porqui'ni enne' ná juez
 nna gute bi lu' cuenta lani ca policia para gudàl·la
 cą lu' làti ccá lu' castigar. ⁵⁹ Inte' nna nia' lu' qui'ni
 labí eria lu' nía hàsta'na quiyá lu' iyate nu ruthítsini
 cą lu'.

13

¹ La'a tiempo làniataá nna tsè'e hua tuchùppa ca
 enne' nía ruè'nì cą Jesús titsa' ti'iyá ná nu beni
 Pilátua, porqui'ni benia mandado gatti tuchùppa
 ca enne' Galilea mérubá tsè'e cą huèni sacrificar,

hàstaá qui'ni réni qui' ca enni'a nna bichixiã lani réni qui' ca animal nu betti cã para sacrificiúá. ² Jesús nna rèe cã: Ca enne' gùtti por mandado nu beni Pilátua nna, tsí rulaba latsi' le qui'ni adiru enne' tul·la uccua cã tì'chu iyaba ca enne' látsi qui' acca guỹàcca' cã anía cá. ³ Inte' nna nia' le qui'ni bihua uccua cã adiru enne' tul·la'. Pero lebi'ĩ nna canchu bihua gúttsiání la' rulábalatsi' qui' le para eyaccatsè' le Tata Dios nna, entonces iyáyiani le nna l·luỹa huá latsi' le. ⁴ A'hua canu tsiyũnu' gùtti le' ciudad Jerusalén loti' biyinnia torre qui' Siloé iqquia caniá nna, tsí rulaba latsi' le qui'ni adiru enne' tul·la' uccua cã tì'chu iyaba ca enne' qui' Jerusalén acca guỹàcca' cã anía cá. ⁵ Inte' nna nia' le qui'ni álahuá là. Pero lebi'ĩ nna canchu bihua eyàcca le arrepentir por ca tul·la' qui' le nna, entonces iyáyia le nna nittí ba le.

⁶ Jesús nna gutixa'a huée ejémluj: Ttu nubeyu' nna du ttu yà exxuhuí qui'ĩ le' loyu qui'niá. Huía tiã huila exxuhuí lúj, pero ni ttú làa taxácca'ã lo yà exxuhuía. ⁷ Làniana ra tiã nu rue' cuidado lóyúa: Ttu ttu ida ní rita' huila exxuhuí lo yaguĩ, atsi'ini chi uccua tsunna ida nidi ttu exxuhuí nì' cuía lúj. Acca adila tsa' guchu telá ã, porqui'ni cuenta du bá le' lóyú. ⁸ Becàbi tè nu rue' cuidado lóyúa nna rã: Señor, be'él·la' bá cuiã'lu' ã màsqi'di attu ida, miéntraste gúlá' tí'a' gùnà' yãni nna gúdál·la'a' bèbè, entonces ⁹ canchu cuía fruta lúj nna, tsè'ba; pero canchu bihua nna, lànialá nna ichù bá cuiã'lu' ã.

¹⁰ Ttu tsá nu labí runi ca judíua tsina nna, du Jesús le' ttu sinagoga làti retùppa cã nna gutixa'ánie cã ca enseñanza nu cca qui' Tata Dios. ¹¹ Le'

sinagógaá nna re' huá ttu niula, chi uccua tsìyúnu' ida rà'niã. Ttu espíritu malo nna chi bechéetsù'niã niuláa, pues nìdi tí' làa cca elíã. ¹² Bilá' báni Jesús niuláa nna gutâyie nna ra tie na: Niula, chi ná lu' libre de itsahue' qui' lu'ã'. ¹³ Betsia tè né'e iqquia niuláa. Lã nna belí chîã nna guduluã bedàlianiã Tata Dios. ¹⁴ Pero nubeyu' principal le' sinagógaá nna yala bitsa'ániã porqui'ni beyuni Jesús ttu enne' tsá ná qui'ni edì' latsi' qui, acca gunniã lo iyaba ca enni'a nna rã: Xuppa ubitsa té para guni ri'u biyã tsina qui' ri'u, acca le' xuppa ubitsa ìta le eyàccalatsi' le, pero alãa tsá yeni qui' ri'u. ¹⁵ Gunne tè Señor nna rèe nubeyu' principal: Quelebíhuá rena lu' ridu lu' conqui' adila lebi'ì nna rethàtsi la le ca gù'na bia' qui' le nna riche' le çã í'ya çã inda, màsqui'ba labí ná tsá tsina. ¹⁶ Atsí'ni niulí nna ná lã descendiente qui' Abraham, chi uccua tsìyúnu' ida yíga'ni Satanás na, tsí bihua ná qui'ni ethàtsi ri'u ã de itsahue' qui' niã' màsqui'ba làa ná tsá tsina ca. ¹⁷ Gunne diba Jesús ca tìtsa'a nna yala bettu'ni canu labí cca guyu çã néa. Pero itúbani yétsiã nna yala bedàcca'ni çã bilá'ni çã ca cosa milagroso nu beni Jesús.

¹⁸ Làniana rèe: Biani tì' ná reino qui' Tata Dios cá. A'hua biani lani guni ya' ã comparar cá. ¹⁹ Nã tì'a ttu bétsi' to' qui' planta mostaza nu guyi' ttu enne' nna gudã na le' yúlali qui'ì. Bétsi' tú'a nna gul·lani díbã nna biyeniã nna uccuã tì'a ttu yã yénitsè' hàstaá qui'ni ca bìnni to' tsè'e lo be' nna radi çã rutsia xcu'ni qui' lúì.

²⁰ Raáruhuá Jesús: Biani lani gunia' comparar reino qui' Tata Dios cá. ²¹ Nã tì'a ná levadura nu

guỹi' ttu niula nna gulù'ą na le' tsunna yà almudo yedia, hàstaá qui'ni beyaỹilo ituba cúa.

²² De yù'u Jesús néda para ciudad Jerusalén nna, gutè tìe ca yetsi nna ca rancho nna, gutixa'ánìe ca enne' iỹetse' ca enseńanza nu cca qui' yĩabara'.
²³ Gunne tè ttu enne' dia nía nna rą ne: Señor, tsí tuchùppa rúbá ca enne' l-láa cá. Becàbie nna rèe: ²⁴ Lígúni duel·la' gá'a le ru'a puerta xcuichu to' miéntraste té tiempo, porqui'ni nuỹetse' cálatsi' gá'a bitola, pero labí irialàni cą. ²⁵ Porqui'ni enne' xana' yú'a nna bitola de chi guduli bí bethàya bi puértaá, pues lebi'į canu tsè'e le fuera nna gúl·labi le ru'a puértaá nna ina le: Señor, Señor, guthàliani cuią'lu' intu'. Ecàbi tè bi nna ina bi: Labí yúá' nuỹa enne' ní ná lé. ²⁶ Làniana ina le: Júntubá guỹua tu' lo meỹa gù'ya gutó bá tu' lani cuią'lu', ą'hua lo ca néda qui' tu' nna biyénini tu' enseńanza nu rulue' cuią'lu'. ²⁷ Pero enne' ná xana' yú'a nna gá lá bi le: Chi nia' qui'ni labí yúá' nuỹa enne' ní ná lé; liucùtta nì iyaba lebi'į canu runi mal. ²⁸ Nía nna cca le sufrir, íditsùni le cuetsi le nna goyà'atsùni laya' le nna, porqui'ni ilá'ni le Abraham nna Isaac nna Jacob nna ą'hua iyábani ca profeta qui'ni tsè'e iyaba cabi le' reino qui' Tata Dios, pero lebi'į nna fuérabá tsé'e le. ²⁹ Tsé'e canu íl·lani lado ril·lani bitsa nna lado renia bitsa nna ą'hua lado norte nna sur nna xúaní cą lo meỹa lani la' redacca' latsi' le' reino qui' Tata Dios. ³⁰ Tsá lània nna ttu te canu ná cą bitó tè annana pues ccá cą nu neru; ą'hua ttu te canu ná cą neru annana pues eyacca cą nu bitó tè la.

³¹ La'a mísmuba tsá lània loti' gutixa'a Jesús ca tìtsa'a nna, bitsina' tuchùppa ca fariséua nna ra

ca ne: Beria nì nna beyya, porqui'ni Herodes nna calatsi'ì gúttíá lu'. ³² Jesús nna ra tìe ca: Lítsía nna lígatsi enne' mañósuá' qui'ni inte' nna rudál·la'a' fuera ca espíritu malo a'hua reyùnia' canu ra'ni, annana guxtíla nna, pero huítsa taá nna irialània' tsina quia'. ³³ Té díhuá qui'ni gunia' seguir tsina quia' áchúppa tsuna ubítsi, làniana etsina'a' Jerusalén, porqui'ni labí gutti ca enne' ttu profeta le' attu yetsi huaya' sino le' ciudad Jerusalén teruba. ³⁴ Lebi'ì canu tsè'e le' ciudad Jerusalén rúttí le ca profeta nna rudua huá le íyya iqquia iyaba ca mensajero nu rithel·la' Tata Dios lani le. Iýé vuelta tsè' uccua látsa'a' gutùppa' le tì'a ttu yìti rutùppa ca ýi'ni to' qui'ì liú'u xilì, pero labí uccua latsi' le. ³⁵ Templo qui' líá' nna chi dua tàttsi bá, labiru la'huacca qui' Tata Dios té lani le, a'hua nía' le qui'ni labiru ilá'ni le inte' hàsta'na qui'ni i'yu tsá inne le tsè' nu cca quia' nna ína le: La' dàliani para cuiá'lu' porqui'ni da' cuiá'lu' por nombre qui' Señor Dios.

14

¹ Ttu tsá redi' latsi' ca enne' Israel nna, huía Jesús litsi' ttu nu ná principal qui' ca fariséua para gúe lani a. Adí ca fariseo tsè'e ca nía nna betsia tsittsi bání lo qui ne. ² Du tè ttu nubeyu' ru'a lo Jesús; fuérteni rà'niá, itú ýíábá té yii. ³ Làniana gunne teni Jesús ca fariséua a'hua ca maestro de la ley qui' caniá nna rèe ca: Tsí hua ná qui'ni eyuni ri'u ttu nu ra'ni tsá ná qui'ni edi' latsi' ri'u cá, o, tsí ra Tata Dios qui'ni ná tul·la' áccá. ⁴ Pero làcã nna labí becàbi ca. Jesús nna bedàxu' tìe ná' nubeyu' rà'nia nna, beyacca taá latsi'ì. Làniana bethèl·le'e na litsi'ì.

⁵ Ra tè Jesús ca fariséua: Canchu nuña ttu le du ttu burro o ttu gù'na qui' le nna innia tè nuña ttu ça le' ttu yèrù nna, tsí bihua igàa le para ebèqquia li ą le' yèrùa màsqui'ba ná tsá yēni cá. ⁶ Làçą nna labí betseláni çą biỹa ecàbini çą ne.

⁷ Ttu vuelta nna, bilá'ni Jesús qui'ni canu nàyi yú'u thá'a nna yala nu catippa ba runi çą para gal·la' çą ca asiento dàa íçquiará' tè lo méyaá. Acca gutixa'ánie çą ttu enseñanza nna rèe: ⁸ Canchu chi nuña gùyią lu' yú'u thá'a nna, bittu cue' tení lu' íçquiará' tè lo meỹa, porqui'ni xiaba íl·lani huá attu enne' nu adila re' cuenta tì'chu lu', ⁹ lániana íl·lani huá nu naỹinią lía, nna gą lu': Guduli canna para qui'ni cue'ni enni'į. A' gą lu', lániana ttú la' rettu'lo bá nna tsía lu' táché' lu' lo xila' nu du bitó yīatiá. ¹⁰ Acca, canchu chi nuña gáyią lu' nna, huía bá nna gure' tení lo xila' nu du bitó yīánía, para qui'ni íl·lani bá nu gutàyią lu'a nna gą lu': Amigo, gutè iqquia meỹa lá. Lániana yala tháliani lu' ru'a lo canu ỹua lani lu' lo meỹa. ¹¹ Porqui'ni nuña tediba rudàlianią la'a labą nna, entonces exél·la' lą; pero nu rulaba latsi'į qui'ni labí nuña ną nna, ccá lą enne' yēni. ¹² Raáruhuá Jesús nubeyu' nu gutàyią néa: Canchu chi gute lu' go ca enne' nna, bittu gaỹi lu' canu cca tsè' lu', ñihua ca bettsi' lu', ñihua ca pariente qui' lu', ñihua ca vecino qui' lu' nu ná enne' rico, porqui'ni iyaba canua' nna guni huá çą lu' invitar go lu' lani çą; anía modo nna labí premio thí' lu' de yīabara', porqui'ni chihua beyunna çą qui' lu'. ¹³ Pero canchu chi guni lu' ttu banquete nna gutàyi lá ca enne' ritè là'di', ą'hua canu ná manco l·le, ca enne' cojo l·le, ca enne' ciego l·le. ¹⁴ Lániana

yala la' redacca' latsi' gata' qui' lu', porqui'ni làcã nna labí té qui' qui para eyíyáni cã qui' lu'. Pero huadi' bá lu' nu gute Tata Dios qui' lu' canchu chi i'yu tsá eyátha iyaba ca enne' beni cã tsè'.

¹⁵ Biyeni báni ttu nu re' lani e lo méyãá nna rã ne: Ica'rubà nu cue' go lo meyã le' reino qui' Tata Dios. ¹⁶ Becàbi Jesús por medio de ttu ejemplo nna rèe: Ttu ènne'yu' beni bi ttu banquete xeni tsè' nna gutãyi tè bi ca enne' yétse'ní. ¹⁷ De gùl·la' hora go cabi nna, guthel·la' bi mandado litsi' canu chi naỹini bía nna ra tè cã: Litàxia le qui'ni iyaba chi tsìa léda lo méyãá. ¹⁸ Pero iyaba canu chi naỹini bía nna bílá bílá bá pretexto bedu cã. Ttuã nna rã: Chì' huí'ibá' ttu loyu nna, caduél·la'ní tsa'á' tanel·le' ya' ă, acca rinábania' lu' qui'ni thí' lu' la' yénlatsi'. ¹⁹ Attuã nna rã: Chì' huí'ibá' gayu' néda gù'na nna dí'a' guni ya' cã prueba, acca rinábania' lu' qui'ni thí' lu' la' yénlatsi'. ²⁰ Attuã nna rã: Chì' bèttsáabá nàya', acca labí cca quia' tháyá'. ²¹ De betsina' nu huía mandáduá nna gutixa'ániã xana' niá nu ra canaá, yala bitsa'áni xana' niá nna ra tè bi mozo qui' bía: Huía xiàtsate' làti cca i'yya nna ă'hua lo ca néda nna taxi' ca enne' ritè là'di' ă'hua canu ná manco l·le, canu ná cojo l·le, ca ciego l·le. ²² Mózuá nna beyéqquiã ru'a lo xana' niá nna rã bi: Señor, chi benia' nu ra cuiã'lu'a, pero hua náru lugar le' yú'í. ²³ Làniana xana' niá nna ra bi ă: Huía lo ca nédayù nna ca néda lathi to', guche' duel·la' taá cã ìta cã para qui'ni itsà' le yú'u quíyi'í. ²⁴ Porqui'ni nia' le qui'ni nì ttu canu gutáỹia' néruá nna labí go cã là'go quíyi'í.

²⁵ Nu yétse'gání ca enne' nna dia tè cã lani Jesús.

Lèe nna gunne'e cą nna rèe: ²⁶ Canchu nuỹa enne' calatsi'ĩ thá'ą lani inte' nna danią catsi'ínią inte' adí tì'chu catsi'ínią tàta nàna qui'ĩ nna ca yĩ'nĩ nna ca bettsi'ĩ nna ca danĩ nna, hàstaá la'a mísmuba lą nna danią guyudí'ą nna catsi'ínią inte', porqui'ni canchu labí nna entonces labí ccánią ccą discípulo quia'. ²⁷ Nuỹa enne' labí ga'ną dispuesto gúchią propio gani curutsi qui'ĩ nna tanuą inte', entonces labí dàcca'ą para ccą discípulo quia'. ²⁸ Por ejemplo, canchu nuỹa ttu le calatsi' gúduą ttu yú'u nna, tsí álahuá priméruỹa cui'ą nna guthácca'bia' latsi'ĩ tsáliáỹa bel'liu gudàl'lą qui' yú'a cá para ccą saber canchu hua té suficiente nu riquina'nią para gulũỹą tsè'taá yú'u qui' niá. ²⁹ Nìcà'chu ichida díbą cimientu nna bíruhuá té qui'ĩ gulũyaníą yú'u qui' niá, làniana iyaba canu ilá'ni cą na nna yala gúyĩtsíni cą na, ³⁰ ina cą: Nubéyu'ą' nna gùduluą ruduą yú'u nna, pero labí suficiente lo sinĩ té para gulũỹą na. ³¹ A'hua ttu enne' rigú'ubia' nna, canchu caduel'la' gunią guerra contra ttu contrario qui'ĩ, tsí álahuá priméruỹa cui'ą nna guthácca'bia' latsi'ĩ ti'ỹa modo lani tsìi mili' ca soldado qui'ĩ nna huadàą lani gəl'lia mili' ca soldado qui' contrario qui' niá cá. ³² Canchu ruthácca'bia' latsi'ĩ qui'ni labí thá, entonces miéntraste huaduúru contrario qui' niá idittu' nna ithel'la'ą noticia gata'yúnią na qui'ni adila tsa' eyaccatsè' bá cą. ³³ Acca lebi'ĩ canchu bihua ga'na le dispuesto gutha'na le iyate nu té qui' le nna, entonces labí posible té para ccá le discípulo quia'.

³⁴ Yala riỹu' dète', pero canchu dèti'a gunittią la' iỹé' qui'ĩ nna, biala lani eyàccanią iỹé' cá. ³⁵ Pues

labiru biyãa íyũ'a, nìdi para tsíã le' ttu loyu para gu-
niã bèbè, sino para irú'na terúbã fuera. Nu calatsi'
teliniã enseñãnzì nna naduel·la' qui'ni gudà tsè'
nãgui'ì.

15

¹ Làniana iyaba canu ruquíyã qui' impuesto nu
redi' gobierno, a'hua adí canu rena ca enne' judíua
qui'ni yala enne' tul·la' ná cã nna gubíga' tè cã
ru'a lo Jesús para gudà naga' quí qui'e. ² Acca
ca enne' judío canu gùlani religiòn fariseo a'hua
ca maestro de la ley nna beyu tè cã la' dítsi qui'
Jesús nna ra cã: Nui nna yala cca tsè'a canu huèni
tul·la' nna ruã lani cã nna. ³ Jesús nna gutixa'ánie
cã ttu enseñanza por medio de ttu comparaciòn
nna rèe: ⁴ Núní ttu enne' ní entre lebi'ì nu tsè'e
gayua' carnero qui'ì, canchu iyàl·la nuyã lá ttu cã
nna, tsí bihua guthà'nã canu noventa y nuéveá
làti ná ìxxì' go cã miéntraste tsíã tatilã nu biyál·láa
hàstaá qui'ni etselániã na cá. ⁵ De chi betselániã na
nna enìta' tiã na por tanto la' redacca' latsi' nu té
qui'ì. ⁶ Etsina' bã le' yú'u nna gaỹiã ca vecino qui'ì
a'hua adí ca amigo qui'ì nna ra tiã cã: Ledacca' huá
latsi' le tì'a inte', porqui'ni chi betsela te' carneru
to' quia' nu biyál·láa. ⁷ Raáruhuá Jesús: Inte' nna
nia' le qui'ni adila la' redacca' latsi' té le' yíaba ra'
por ttu enne' tul·la' reyacca arrepentir, tì'chula por
noventa y nueve ca enne' de respeto canu labí
caduel·la' eyãcca cã arrepentir.

⁸ Raáruhuá Jesús: Ttu niula nu té tsii moneda
qui'ì, canchu iyàl·la ttuã nna, tsí bihua gugàl·la'a
yi' nna thulo tiã tetsùbà eyilã na hàstaá qui'ni
etselániã na, màsqui'ba caduel·la' gulùbã itute le'

yú'u qui' niá cá. ⁹ De chi betselánią moneda nna, lániana rą ca vecina qui' niá ą'hua adí ca amiga qui' niá: Ledácca' huá latsi' le tì'ba inte', porqui'ni chi betselá te' bel·liu quia' nu biyál·láa. ¹⁰ Lániana ra Jesús: Inte' nna nia' le qui'ni ą'hua ca ángel qui' Tata Dios té huá la' redacca' latsi' qui' cabi canchu chi ttu enne' tul·la' nna reyacca' arrepentir.

¹¹ Raáruhuá Jesús adí: Ttu ènne'yu' nna gutsé'e chuppa ŷi'ni bi. ¹² Nu cca nu cuíti'a nna rą tàta qui' niá: Tàa, gùl·la'ání cuią'lu' iyate nu té qui' ri'u para gunna cuią'lu' quia' nu ral·lá'a thí'á'. Lániana gùl·la'á tèni bi herencia qui' bía, bè' bi ca qui' tsàba qui. ¹³ Dia tí'ba tsá nna, entonces nu cca nu cuíti'a nna betùppą iyábani herencia qui' nna guda' tią díą idittu' hàstaá attu nación huaya'. Nía nna benittiluą iyate nu té qui' niá nna gurèni perdido bá. ¹⁴ De chi gutittia el·la'nią itute nu té qui' niá nna, uccua ttu ubina' fuerte ní le' distrito làti rèni naá, lániana gudulo beyàtsa qui' i. ¹⁵ Huía tią ru'a lo ttu nu dua nía huila tsina. Nua nna guthel·la'ą na rancho qui' niá para gappą ca cùttsi qui' niá. ¹⁶ De tántua ritùnią nna ridàa tí'ní latsi' i cayélianią hàstaba nu ro ca cùttsia, pero lanú nuŷa rute gúą. ¹⁷ Lániana bettsiání la' rulábalatsi' qui' i nna uccuanią: Bal·la gání mozo tsè'e le' litsi' tàta qui'a té tsè'eni qui' qui ro ca, atsi'ini inte' nna chi rattia' bìnà' rénią' nì. ¹⁸ Annana edúlia' nna éya'a' ru'a lo tàta qui'a épa' ye' e: Tàa, chi benia' tul·la' contra Tata Dios ą'hua contra cuią'lu' nna, ¹⁹ labiru merecer ccà'a' para eyácca'a' ŷi'ni cuią'lu', acca beni ba cuią'lu' inte' tì'a ttu mozo qui' cuią'lu'. ²⁰ Lániana lą nna beduli tią nna deyyą litsi' tàta qui' niá. Idittu'úruá deyyą nna bilá' chìnì tàta qui' niá

na yàlani betúa latsi' bi ą acca bigaá ch̀i bi nna gunìta' bi yánı̄ nna bettsa'ló bi ą. ²¹ Lą nna ra tią bi: Tàa, chi benia' tul·la' contra Tata Dios ą'hua contra cuią'lu' nna, labiru merecer ccà'a' para eyácca'a' ỹi'ni cuią'lu'. ²² Pero tàta qui' niá nna ra bi ca siervo qui' bía: Licuèqquia ca lári' nu adiru tsè' nna líugaccu' ą. Lícú'u t̀è ttu anillo de oro ní'ı̄ nna ą'hua zapato nì'ı̄ nna. ²³ Litàxì' t̀è gù'na nu adiru riŷenią para gútti li ą nna go ri'u ą nna guni ri'u fiesta, ²⁴ porqui'ni ỹi'ni yì'ı̄ nna ch̀ia gùttią pero beyaccabànią, chi gunittia nna pero chi betselą. Làniana yala bedácca'ni cą. ²⁵ Pero ỹi'ni neru bía nna reqquia bą lo tsina le' campo. De betsina'ą exa gáabá litsi' niá nna biyéninią cca huil·la nna hueyà'a danza nna, ²⁶ gutàyi tią ttu siérvuá nna gunàba t̀itsa'ą na biŷa nuá cca litsi' niá. ²⁷ Siérvuá nna rą na: Chi bel·lani bettsi' lu'a, acca tàta qui' lu'ą' chi beni bi mandado gatti ttu gù'na nu adiru riŷenią para qui'ni guni ri'u fiesta, porqui'ni bettsi' lu'a hua náruą bueno nna sano nna bel·lanią. ²⁸ De biyénini ỹi'ni néruá noticia' nna labí uccua latsi'ı̄ éya'ą le' yú'u. Acca biria ch̀ia tàta qui' niá guta'yúni bi ą qui'ni éya'ą le' yú'u. ²⁹ Becàbią nna rą tàta qui' niá: Hua ỳba cuią'lu' qui'ni iŷé ida tsè' chi runia' cuią'lu' servir nna bihua cabezudo chi ùccua'a' lani cuią'lu', atsi'ini nìdi rúbani ttu chivo to' nì' gunna cuią'lu' quia' para go laniá' ca amigo quia'. ³⁰ Pero de bel·lani ỹi'ni lu'ą' nna, màsqui'ba chi benittilua itute bel·liu qui' lu' lani ca niula pública, atsi'ini ch̀i beni lu' mandado gatti gù'na nu adiru riŷenią para guni lu' fiesta qui'ı̄. ³¹ Tàta qui' niá nna ra t̀è bi ą: Ỹi'nia', tulidàba dua lu' lani inte', ą'hua iyaba

nu té quia' nna qui'ba lu' ná cą. ³² Ti'ani modo làa guni ri'u celebrar ttu fiesta para edácca' latsi' ri'u ni'i. Porqui'ni bettsi' lu'ı̇ nna chĩa gùttiã nna beyaccabàniã, chĩa gunittia nna pero chi betselã.

16

¹ Gutixà'a huá Jesús attu enseñanza lani ca discípulo qui'áa nna rèe: Gùdua ttu nubeyu' rico nna, gùdua huá ttu nu ná encargado qui' bi nna becà'na bi lani ą iyaba nu té qui' bi. Pero betsia cą queja qui' nu ná encargáduá qui'ni runittilo lã nu té qui' xana' niá. ² Acca xana' niá nna beyàyi tè bi ą nna ra bi ą: Biani nua' riyeni te' nu cca qui' lu', beyúnna cuenta tsina qui' lu' porqui'ni labiru ccá lu' nu rigú'ubia' lo iyate nu té quia'. ³ Làniana nu ná encargáduá nna belaba latsi'ı̇ ı̇: Annana biagáni gunia', porqui'ni xána' ya'a nna ebèqquia rúbá bi inte' lo tsina qui' bi, atsi'ını tsina ìdi'i nna labí cca te' gunia'; tsà'a' huenàba caridad nna yala ettu' te'; ⁴ pero chi yúá' biŷa gunia' para qui'ni canchu chi bíttuúru tsina quia' te nna guni cą inte' recibir le' litsi' quı̇. ⁵ Làniana gutàyi tĩa ttu ttu tsa canu ràl·la' cą ŷıyya' qui' xana' niá nna gunàba tıtsa'ą nu primérua: Tsálicà'a ràl·la' lu' qui' xána' ya'a. ⁶ Becàbi nuá nna rą: Gayua' tambo aceite. Làniana nu ná encargáduá nna rą na: Bedi' recibo qui' lu'ą nna, gùre' xianí nna bedua átsıeyóna' terúbá lúı̇. ⁷ Bitola nna gunàba tıtsa'ą áttuą nna rą: Lù'chu nna, tsálicà'a ràl·la' lu' qui' bi. Lą nna, becàbią nna rą: Gayua' beduti ŷua'xtıla. Nu ná encargáduá nna rą na: Bedi' recibo qui' lu' nna bedua ochenta terúbá lúı̇. ⁸ Enne' ná xana' nu ná encargáduá nna gutelini bi qui'ni yala listo uccuą porqui'ni belaba

latsi'ì tsè' màsqui'ba yala enne' mal nâ. Raáruhuá Jesús nna rè: Canu yétsiloyuì nna, pues adila listo runi cã para cca tsè' cã lani iyábani ca enne' tì'chu canu té la'yani' lo losto' qui. ⁹ Acca nia' le qui'ni lígúni duel·la' uquìna' le tsè' bel·liu qui' le, aláa ttu manera malo, sino tsè' taá para qui'ni canchu chi étu bel·liu qui' le nna entonces tsé'é ca amigo qui' le canu edi' cã le le' litsi' qui' làti tsé'é le para siempre. ¹⁰ Nuỹa tediba ná bá enne' cumplido lo nu ti'to' rúbá nna, entonces ccá huá enne' cumplido lo nu iỹeni tsè'. A'hua nu runittilo ti'to' rúbá nna, pues labí nâ enne' de confianza para huí'ã cuidado iỹeni. ¹¹ Canchu labí runi le nu dacca' iỹu' de nu cca qui' bel·liu nna, pues núlá gappã le confianza lani ca riqueza nu adiru dacca'. ¹² A'hua canchu labí rue' le cuidado tse' nu ná qui' attu enne' nna, entonces núlá gunna nu ná qui'ì para ccã qui' tegání lé cá. ¹³ Lanú ttu mozo té ccani thuã bajo la' rigú'ubia' qui' chuppa ca patrón, porqui'ni miéntraste guyudí'ã ttuã nna catsi'í lánia áttuã, a'hua miéntraste nâ cumplido lani ttuã nna riníyú lã áttuã. A'hua lebi'ì nna labí ccani ccá le huenitsina qui' Tata Dios nna tse'e huá le bajo la' rigú'ubia' qui' Bel·liu nna. ¹⁴ De ra Jesús ca títsa'a nna tsè'e huá ca fariséua nía nna biyeni dí'báni cã enseñanzaá nna búrlalá beni cã ne porqui'ni yala nu dàalatsi' bel·liu uccua cã. ¹⁵ Jesús nna ra tìe cã: Lebi'í ná le canu ribèqquia nàri la'a lebi'í ba ru'a lo ca enne', pero Tata Dios nna nabia' ranínié liú'u losto' le nna nìdi tito' làa cca guyue ca cosa qui' yetsiloyu nu yala catsi'íni ca enne'.

¹⁶ Nu ra lo ley nu bethà'na Moisés lani ri'u a'hua

nu bedia ca enne' uccua profeta tiempo antigua nna, pues á' ná nu yù ca enne'. Pero dèsdeba gul·lani Juan el Bautista nna entonces gudulo cca predicar reino qui' Tata Dios. Iyáyïiani ca enne' nna yala duel·la' runi cã para gá'a cã le' reínuá. ¹⁷ Adila fácil ná qui'ni l·lúÿa latsi' ÿiaba nna yétsiloyu nna ca indatò' nna, tì'chula tté ttu letra to' nu ra lo ley qui'ni làa ccã cumplir.

¹⁸ Nuÿa tediba éla'á niula qui'ï nna guttsa tení'ï lani attu niula nna, entonces chi ná adulterio nu runiã; á'hua nu édi'á niula nu béla'á naá nna runi huá adulterar.

¹⁹ Gùdua ttu nubeyu' rico nna yala tsè' gudu ÿúj, á'hua ttu ttu tsá ba beniã banquete lani ca là'go tsè'ni. ²⁰ Gùdua huá ttu enne' pobre rinàbã caridad láã Lázaro nna betuÿiániã uccua huè', tíã ru'a puerta qui' nubeyu' rícuá. ²¹ Yala gudà latsi'ï gúã ca pedazo to' binnia ru'a meÿa qui' nubeyu' rícuá. Ca beccu' nna bitsina' cã gul·le'e cã lo ca huè' qui' niá. ²² Bì'yu bá tsá nna gùtti limosnéruá. Ca ángel nna beche' cabi á hàstaá làti dua Abraham. Gùtti huá nubeyu' rícuá nna becàttsi' cã na. ²³ Lo yi'bél·laá chi ÿuã ccã sufrir nna guchìtha lúj nna bilá'niã Abraham idittu' nna dua tè Lázaruá cuítta' bi. ²⁴ Làniana gùnniã idìtsa nna rã Abraham: Gùppa cuiã'lu' la' retúalatsi' quia' nna guthèl·la' bá cuiã'lu' Lázaruã' qui'ni gulappa' lo ÿubení'ï le' inda nna gudibìtha tí'ã luetsí'a', porqui'ni yàlani dolor chi rappa' de yù'a lo yí'ï. ²⁵ Pero Abraham nna ra bi á: Lu' nna, hua yù lu' qui'ni buenu ba bedi' lu' le' yétsiloyúa; pero Lázaruï nna triste bá ná la' gutè qui'ï. Pero annana yala la' redacca' latsi' chi té

quì'ì, pero lu' nna yala sufrir cca lu'. ²⁶ Además de nui nna ttu bèl·là'a chul·la túniní du entre intu' nna lebi'i nna. Acca nuña calatsi'ì ttíã de nì para íl·laniã làti tsè'e líã' nna, labí irialàniã; ñihua nu da' nà'la para íl·laniã nì nna. ²⁷ Làniana gunne enne' rícuá attu vuelta nna rã: Entonces ratta'yúnia' cuiã'lu' tàta Abraham qui'ni éthel·la' cuiã'lu' Lázaruã' le' litsi' tàta quíya'a ²⁸ para inèniã á gayu' ca bettsi'a' canu tsè'erù nía. A' modo nna làa èta huá çã lugar de sufrimiéntuì. ²⁹ Abraham nna ra tè bí ã: Té bá ca libro nu bedia Moisés nna ca profeta nna, níabá gudà naga' quì qui' cabi. ³⁰ Becàbi nubeyu' rícuá nna rã: Labí tàta Abraham, sino canchu nuña chi gùtti nna eyáthã éyyã taquixá'aniã çã, entonces eyacca çã arrepentir nna tsíalatsi' quì. ³¹ Pero Abraham nna ra bi ã: Canchu bihua gudà naga' quì qui' Moisés ñihua qui' ca profeta nna, tampoco hua làa tsíalatsi' quì canchu nuña eyáthã de lo lù'uti nna quixá'aniã çã.

17

¹ Jesús nna rèe ca discípulo qui'áa: Siémprení íl·lani ca tentación para guni qui'ni guni ca enne' tul·la', pero ica'rútsi'íru nu runi qui'ni rinnia ca enne' le' tul·la', pues ² adila tsa' iỹìqquia yánì ttu ittsi nna gudàl·la tè çã na làhui' indatò', tì'ca'la guniã qui'ni nuña ttu canu xcuichu tú'ì nna ñnnia çã le' tul·la'. ³ Líhue' cuidado por la'a lebi'i bá. Canchu ttu hermano qui' lu' rigú'ã falta contra lu' nna, gutìtsà' ã. Canchu enàbã la' runittilo lani lu' por nu béniã nna, entonces ná qui'ni eyuniỹénbá latsi' lu' quì'ì. ⁴ Canchu gàtsi vuelta ttu tsá guniã mal contra

lu', a'hua gàtsi vuelta enàbaniã lu' la' runittilo nna, eyuniñénbá latsi' lu' qui'ì.

⁵ Ca apóstol nna ra tè cabi Jesús: Señor, benna cuiã'lu' adí fe qui' tu'. ⁶ Ra tè Jesús cabi: Cáalá fe qui' le ná màsqui'di medida ttu bétsi' cuànà nna, huaccani le gá le yà xeni duj: Bilàtsù' nì nna biyàda lahui' indatò' la, entonces yàgã' nna huayéniniã qui' le.

⁷ Raáruhuá Jesús: Núní ttu le dua ttu mozo qui'ì rugà'nã gù'na o rappa ca gù'na bia' qui' le, canchu chi él·laniã de lo tsina nna, tsí gã mózuá: Gùduani lo meya cá. Labíyá. ⁸ Tsí álahuá gá lã mózuá: Bedappayáni ná' míya qui' lu' nna bèni nu go sía' nna guta'a tè quia' hàstaá qui'ni eyacca quia' í'ya gua'; lànialá nna gã mózuá: Guta'a qui' lu' nna gù'ya gutó. ⁹ Tsí ína ri'u qui'ni huã mózuá: Quiyaru lu' porqui'ni chi beni lu' iyaba tsina nu benia' lu' mandar. Ti' cca te' nna labí. ¹⁰ A'hua lebi'ì, canchu chi eyacca qui' le guni le iyate nu ra Tata Dios qui'ni guni le, entonces ná qui'ni ina le: Ttu huenítsina nu labí riyũ' tè ná tu', porqui'ni beni tu' tsua' terúbá nu ná qui'ni guni tu'.

¹¹ Loti' deyya Jesús para ciudad Jerusalén nna bedàxu'e néda dia entre Samaria nna Galilea nna. ¹² Gutà'a bée le' ttu yetsi to' nna biria tè tsìi ca nubeyu' tattsa' çã ne, pero idittu' ba gudàa çã porqui'ni cca çã yetsu' yùtsù'a leproso, yala hue'léte' ná. ¹³ Làçã nna gunne çã idítsa tsè' nna ra çã: Maestro, betúalatsi' cuiã'lu' intu'. ¹⁴ Bilá' báni Jesús çã nna rée çã: Lítsía nna lígúni presentar ru'a lo ca sacerdotea, seña de qui'ni chi beyacca nàri le. Làçã nna de déyu'u çã néda tì'a rée çã nna, beyacca chì latsi' qui'. ¹⁵ Gutebé'báni ttu nuá

qui'ni chi beyacca latsi'ì nna, beyéqquia taq̃ nna bedàlianiq̃ Tata Dios idìtsa ní, ¹⁶ betsina' tìq̃ ru'a lo Jesús, beduỹíbì nna bedètta' lúì loyu nna bè'aq̃ ne gracia. Lq̃ nna uccuq̃ ttu enne' samaritano. ¹⁷ Gunne tè Jesús nna rèe: Tsí álahuá tsii cq̃ nuá beyacca latsi' cá. Adí canu gaã chúná, tì'ala uccua cq̃ nì'i. ¹⁸ Tsí nùhua nuỹa beyéqquiq̃ gudàlianiq̃ Tata Dios sino làteruba enni'ì atsi'ini ná lq̃ enne' idittu' nna. ¹⁹ Làniana rèe nubéyu'a: Bèduli nna beyya ba, pues por fe qui' lu' nna chi beyacca latsi' lu'.

²⁰ Ca fariséua nna gunàba titsa' cq̃ Jesús cuaỹa ìl'lani la' rigú'ubia' qui' Tata Dios yétsiloyu. Becàbi tìe nna rèe cq̃: La' rigú'ubia' qui' Tata Dios nna labí ìl'laniq̃ tì'a ttu cosa nu riria ca enne' inna' cq̃ qui'ni chi dá'aq̃. ²¹ Nìhua labí ccá saber ca enne' para ina cq̃ con tiempo ba: Nì chi dùe o nà' taá dùe, porqui'ni reino qui' Tata Dios nna pues entre la'a lebi'ì ba chi gul'lani q̃'hua lo losto' le. ²² Ra huée ca discípulo qui'áa: Huàl'lani tiempo canchu chi cálatsi' le ilá'ni le Nubeyu' de Ỹiabara' attu vuelta, màsqui'di por ttu bitsa terúbá, pero labí ilá'ni li e. ²³ Aq̃'hua gá cq̃ le: Nì chi dùe, o, nà'la dùe. Pero bittu tsía le nìhua làa tanó le cq̃. ²⁴ Porqui'ni tì'a rappi étha rudàni' rábaniq̃ dèsdeba làti ril'lani bitsa hàstaá làti renia bitsa, q̃' tehuá ccá canchu de repente taá chi ìl'lani Nubeyu' de Ỹiabara'. ²⁵ Pero náduel'la' ỹa qui'ni yala padecer quée nna, q̃'hua nuỹetse' guthacca' ca enne' tsè'e anna ne. ²⁶ Tì'a uccua loti' gùdua Noé, q̃'hua ccá canchu chi i'yu tsá ìl'lani Nubeyu' de Yiabara'. ²⁷ Porqui'ni q̃'hua ca enne' tiempo lània nna gù'ya go bá nna huettsaná' bá nna beni cq̃ hàstaá qui'ni bì'yu tsá gutà'a Noéa le' bárcuá,

làniana de repente taá gul·lani iyya juíciuá nna gùtì iyáỹiate ca enne' gùtse'e lània. ²⁸ A'hua ccá tì'a uccua loti' gùdua sobrino qui' Abraham láa Lot: gù'ya go bá nna hui'i bá nna huètti' bá nna huèni negocio bá nna béni ca enne', a'hua gùda cạ loyu bá nna huèdua yú'u bá nna beni cạ. ²⁹ Pero la'a mísmuba tsá biria Lot le' yetsi máluá lẹ Sodoma nna, làniana de repente taá nna binnia fuego lani azufre de ỹiaba nna bel·lùỹạ latsi' iyáỹiani ca enni'a. ³⁰ Anía tehuá runi ca enne' canchu chi i'yu tsá ilá'ni itute yétsiloyu ril·lani Nubeyu' de Ỹiabara'. ³¹ Canchu chi i'yu tsáa nna, nuỹa tediba dua iqquia azotea qui' yú'u quì'ị nna, eyàdiạ nna uccuitta tabáa, bittu éya'a le' yú'u para thí'ạ biỹa té quì'ị. A'hua nu rèni fuera lo tsina quì'ị nna, bittu eyéqquiạ litsi'ị táyi'a biỹa té quì'ị. ³² Líúrexaáruhuá latsi' le nu uccua lani niula qui' Lot tiempo lània; lẹ nna bedeqquia lúi para inna'ạ cuè'e lí nna beyacca taá ttu estatua dète'. ³³ Acca riquixa'ánia' le qui'ni nuỹa tediba dua iqquị etúalatsi' la'labàni quì'ị por nu cca qui' yétsiloyuị nna, entonces gunitti lẹ na. Pero nuỹa tediba gùtse'e latsi'ị la'labàni nu cca qui' yétsiloyuị nna, entonces ccabàni lẹ. ³⁴ A'hua nia' le qui'ni Nubeyu' de Ỹiabara' nna canchu il·lanie de réla làti anta' chuppa ca enne' lo ttu cama, pues ttuạ nna édi'e, áttuạ nna eyà'na bá. ³⁵ A'hua canchu chuppa ca niula yù'u cạ huèttu, pues ttuạ nna édi'e, áttuạ nna eyà'na bá. ³⁶ A'hua canchu chuppa ca nubeyu' tsè'e cạ tsina, pues ttuạ nna édi'e, áttuạ nna eyà'na bá. ³⁷ De beyacca gunne Jesús ca títisa'a nna, gunàba títisa' tè cabi e nna ra cabi: Gání, Señor. Jesús nna rèe cabi: Gaỹa tediba té ttu nu yatti nna, pues

níahuá itùppa ca bechettu.

18

¹ Gutixa'a huáni Jesús cabi attu comparación para guthète'nie cabi qui'ni caduel·la' guni cabi oración tulidàba nna bittu edùl·la'a latsi' cabi.

² Ree cabi: Le' ttu yetsi nna gùdua ttu juez nu labí gùppa respeto Tata Dios, nìhua ca enne' nna.

³ Gùdua huá ttu niula viuda le' yétsiá nna seguídoní huía ru'a lo juez nna rã na: Beni bál·la cuiã'lu' lu'uxtícia quia' contra nu ná contrario quíya'ã'.

⁴ Pero juez nna labí uccua tè latsi'ì guniã lu'uxtícia qui'ì. Pero bitola nna belaba latsi'ì nna uccuaniã: Màsqui'ba labí rappa huá' respeto Tata Dios nìhua ca enne' nna, ⁵ nada más porqui'ni niulí nna yala ruquitsí'niã inte', acca guni chía' lu'uxtícia qui'ì para qui'ni làa ìta rùã huequitsí'ni látsa'a'. ⁶ Anía ra nu ná juez malua. ⁷ Pero inte' nna nia' le: Canchu Tata Dios nna, tsí bihua dispuesto née para gunie defender ca enne' chi réeé'nie, canu rul·luítsa' cã ne la'réla ritsábá cá. Tsí yala itsá cuédee para gunie cã cualani cá. ⁸ Nia' le qui'ni adila retúa latsi'e cã para gunie lu'uxtícia qui' qui' próntuní. Pero canchu chi íl·lani Nubeyu' de Ýiabara' nna, tsí hua tse'eÿa le' yétsiloyuì canu hua ligani té fe qui' qui' lani e cá.

⁹ Gutixà'a huá Jesús attu comparación, para canu rulaba latsi' qui'ni yala tsè' ná cã, pero bihua cca guyu cã nuÿaáru adí ca enne'. ¹⁰ Reé: Chuppa ca nubeyu' nna huía cã huèni oración le' templua. Ttu nuá nna uccuã ttu fariseo. Attu nuá nna uccuã ttu nu ruquiÿa qui' impuesto. ¹¹ Nu ná fariséua nna du báníã ru'a altar runiã oración nna rã: Quiÿaru cuiã'lu' Tata Dios qui'ni labí ná' tì'a ná adí ca enne',

ubàna nna yélatsi' nna adúltero nna, nìdirubani tì ná nu riquíya qui' impuesto dùa'; ¹² pues inte' nna runia' ayunar chuppa vuelta le' ttu ttu semana, a'hua rutía' qui' diezmo de lo iyaba nu té quia'. Anía uccua oración qui' fariséua. ¹³ Nu ruquíya qui' impuéstua' nna du huá le' templua pero idittu' nna, nìdirubani làa reyáyaniá ichìtha lúj, sino rue' la lòstu'ì porqui'ni yala uccua sentir por ca tul·la' qui'ì nna rã: Señor Dios, betúalatsi' cuiã'lu' inte' porqui'ni yala enne' tul·la' ná'. ¹⁴ Làniana ra tè Jesús: Hualigani te' nia' le qui'ni la nna betsina'ã litsi'ì yala lani la'ÿeni, porqui'ni beyuniyén latsi' Tata Dios ca tul·la' qui'ì; pero attu nuá nna labí beni Tata Dios na aceptar. Acca nia' le qui'ni nu cani qui'ni yala dàlianiã nna, egà'na menos lá; pero nu rulaba latsi'ì qui'ni lanú nuã nã nna, lànua' nna ccá lá enne' ÿeni.

¹⁵ Làniana tahua' tè ca ca huatsa to' ru'a lo Jesús para qui'ni gutsia né'e iqquia qui. Bilá' báni ca discípuluá nui nna gutìl·la la cabi ca enne' dia ritahua' ca huatsa tú'a. ¹⁶ Pero Jesús nna gutàÿie ca nna rèe ca discípuluá: Lihue'él·la' ca huatsa tú'ã' ibíga' ca ru'a lua', bittu' guthàga' le ca; porqui'ni reino qui' Tata Dios nna nã para ca enne' losto' humilde tì'a ca huatsã'. ¹⁷ Hualigani te' nia' le qui'ni nu labí té fe qui'ì tì'a ttu huatsa tó' nna hue'él·la'ã qui'ni Tata Dios nna cu'úbia'nie na, entonces labí gá'ã le' reino qui'e.

¹⁸ Làniana ttu nubeyu' principal gunàba tìtsa'ã Jesús nna rã ne: Maestro bueno, biani gunia' para gata' la'labàni nu labí ttíã quia' cá. ¹⁹ Jesús nna ra tìe na: Biani cca ra lu' inte' bueno nì'i. Nì ttú lanú té ná completamente tse' sino tùteruba Tata

Dios. ²⁰ Hua nabia' báni lu' ca mandamiento: Bittu thualàni lu' nu labí ná tsela lu'. Bittu gutti lu'. Bittu cuána lu'. Bittu ichìtha lu' bela'na qui' ca enne'. Gùppa respeto tàta nàna qui' lu'. ²¹ Becàbi tià nna ra ne: Iyaba ca nuà' runia' dèsdeba ná nu cuìti'. ²² Biyeni báni Jesús nui nna rée na: Hua reyatsaáruni lu' attulo: betti' iyate nu té qui' lu' nna, bète tì à lani ca enne' ritè là'di', ÿiagara' lá nna gata' riqueza qui' riqueza qui' lu'; gutà tè para ccá lu' ttu discípulo quia'. ²³ Biyeni bánià nu rée na, triste tsúbá beyéqquia, porqui'ni yala rico uccuà. ²⁴ Gutebé' báni Jesús qui'ni yala triste uccuanià nna, ra tìe: Yala tàbi ná para canu té iÿeni bel·liu qui' qui' tsíalatsi' qui' nna hue'él·la' cã qui'ni Tata Dios nna quée enne' cu'úbia'nie cã. ²⁵ Adila fácil ná tté ttu camello le' yèrù to' qui' ttu guÿa, tì'chula ttu rico gá'ã le' reino qui' Tata Dios. ²⁶ Làniana canu biyénini ca tìtsa'ã' nna ra cã: Entonces núlá ccani l·lã cá. ²⁷ Lèe nna rée cã: Nu rulaba latsi' ca enne' qui'ni labí ná posible, pues fácil bá nã para lani Tata Dios. ²⁸ Làniana ra tè Pedrua ne: Intu' nna chi bethà'na tu' iyaba nu té qui' tu' nna chi denó tu' cuiã'lu'. ²⁹ Jesús nna rée cabi: Hualigani te' nia' le qui'ni hua tse'e canu chi bethà'na cã litsi' qui' l·le, tàta nàna qui' qui' l·le, ca bettsì' qui' le, niula qui' qui' l·le, ca ÿi'ni qui' l·le por nu cca qui' reino qui' Tata Dios; ³⁰ acca làcã nna thí' cã adírlá bendición annana, à'hua tiempo nu chì' da'la nna gata' huá la'labàni nu labí ttíã qui' qui'.

³¹ Làniana guleqquia Jesús tsì'nu ca discípuhá yà'latsi' nna rée cabi: Annana dia ri'u ciudad Jerusalén. Nía nna ccá cumplir iyaba ca tìtsa' nu bedia ca profeta nu cca qui' Nubeyu' de ÿiagara'.

³² Pues gute cã ne cuenta lani canu dittu' canu rigú'ubia' le' nación qui' ri'u, A'hua guni cã ne burla nna gul·luítsa' cã ne ca titsa' malo nna, gutùtu xèni' qui' ne nna, ³³ hué' díba cã ne lani cuarta, lãniana iche' cã ne para gutti cã ne. Pero tsunna bitsa bitola nna, eyáthee de lo lù'uti. ³⁴ Ca discípulúa nna nìdi tito' làa gutelíni cabi biỹa nuá gutixe'e, porqui'ni beyà'na ba chul·la le' la' riyeni qui' cabi.

³⁵ Loti' chi deyya Jesús exa taá yetsi Jericó nna, re' tè ttu ciego cuitta' nédaá rinàba caridad. ³⁶ De biyéniniã ril·làbì nì'a ca enne' ritè nía, acca gunàba títsa'ã biỹa nuá. ³⁷ Làcã nna ra tè cã na qui'ni da' Jesús enne' nazareno. ³⁸ Lãniana gunne ciéguá iditsa nna rã: Jesús Ýi'ni David enne' uccua rey, betúalatsi' cuiã'lu' inte'. ³⁹ Ca enne' denéruá nna gutil·la tè cã ciéguá qui'ni guthàya rú'j, pero lã nna adila iditsa gunniã nna rã: Cuiã'lu' Ýi'ni David, gùppa cuiã'lu' la' retúalatsi' quia'. ⁴⁰ Gulèda tè Jesús nna benie mandado taxi' cã na ru'a lúe. Bitsina' báã nna gunàba titsa' tè Jesús na, ⁴¹ rèe: Biani calatsi' lu' inte'. Becàbiã nna rã ne: Señor, calátsa'a' elá' te'. ⁴² Jesús nna rèe na: Annana iyàlia ca íyyalo lu' nna ilá'ni lu'; por fe nu té qui' lu' lani inte' nna acca chi té la'yani' qui' lu'. ⁴³ Luégutaá bilá' chiniã nna dia tiã lani Jesús nna rudàlianiã Tata Dios. A'hua iyábani ca enne' dia nía nna, de bilá'ni cã nu uccua nna bè' hua cã gracia Tata Dios.

19

¹ Néda bá chi yù'u Jesús le' yetsi Jericó. ² Le' yétsiá nna dua ttu nubeyu' rico láã Zaqueo nna uccuã jefe qui' iyaba canu riquiỹa qui' impuesto

para gobiérnuá. ³ Lạ nna yala uccua latsi'ị ilá'niạ Jesús nna gunibí'ạ ne. Biria tiạ díạ táttsa'ạ ne; pero de tántua ca enne' yétse'á nna labí uccua ilá'niạ ne porqui'ni uccuạ chaparro to'. ⁴ Acca quèthani beneruạ nna huàppiạ lo ttu yà xeni para ilá'niạ ne, porqui'ni nialá ná qui'ni ttíe. ⁵ Bitsina' bá Jesús nía nna bilá'nie na duạ lo yàgàa nna ra tìe na: Zaqueo, beyàdi xìa, porqui'ni le' litsi' lu' ná qui'ni il'lania' anna. ⁶ Zaqueá nna quèthani beyàdi chiạ, yala lani la' redácca' latsi' beniạ ne recibir litsi'ị. ⁷ Nuá bá bilá'ni ca enne', acca gudulo chì cạ betítse'él-la' cạ Jesús nna ra cạ qui'ni huíe litsi' ttu nu huèni tul-la'. ⁸ Bitola nna guduli Zaqueúá nna rạ ne: Annana Señor, tsal-lue' taá de lo iyaba nu té quia' nna guté ya' ạ lani ca enne' ritè là'di'. A'hua canchu chi bethácca' yía' nuỹa ttu enne' nna gutú'a' biỹa té quì'ị nna, pues annana gudéqquia' átappa tántolá quì'ị. ⁹ Jesús nna rèe: Annana chi gul-lani salvación para ca enne' tsè'e le' yú'ị, yà'ni qui'ni nubéyu'ị nna chi ríalatsi'ị nna ná huá ttu yĩ'ni Abraham. ¹⁰ Por nui nna bítà Nubeyu' de Yĩabara', para hueyìla canu chi gunitti nna gudilèe cạ le' ca tul-la' qui' quì.

¹¹ Exa gáabá Jerusalén chi dia Jesús nna, iyaba ca enne' biyéniini cạ titsa' qui'áa nna belaba latsi' quì qui'ni chi' taání duạ íl-lani la' rigú'ubia' qui' Tata Dios. Acca gutixè'e ttu comparación nna, ¹² rèe: Ttu ènne'yu' tsè' nna huía bi attu país idittu' para thí' bi poder para ccá bi rey, làniana luégutaá eyéqquia bi. ¹³ Pero ántesca thá' bi nna gutàyi bi tsìi canu runi tsina qui' bía nna, bete bi ttu cantidad xeni de moneda qui' ttu ttu tsa quì nna ra tè bi cạ: Gutha' le bél-liuị para guni le gana iqquia quì

miéntraste tsa'á' nna él·lania'. ¹⁴ Guda' tè bi. Pero ca enne' látsi bía nna, la' yéelatsi' lá gùppa cạ qui' bi, acca guthel·la' tè cạ ttu comisión ru'a lo canu rigú'ubia' nía para ina cạ: Labí calatsi' tu' qui'ni nubéyu'ạ' nna ccạ rey qui' tu'. ¹⁵ Pero làbi nna guỹi' la bi poder para ccá bi rey. Làniana beyéqquia bi nna gutàyi' tè bi ca mozo qui' bía canu bete bi bel·liu lani canaá para eyúni bi cuenta lani cạ tsáliáya gana chi beni ttu ttu cạ. ¹⁶ Bitsina' tè nu priméruá ru'a lo enne' ná rey nna rạ: Señor, lani bel·liu qui' cuiạ'lu'a nna chi benia' gana átsi cantidat. ¹⁷ Làbi nna ra tè bi ạ: Tsè'ba ná nu beni lu', pues siervo tsè' ná lu' porqui'ni lani ti'to' rúbá nna uccua lu' fiel, acca annana gudúa' lu' para cu'úbia'ni lu' tsìi ca yetsi. ¹⁸ Bitsina' huá áttuạ nna rạ: Señor, lani bel·liu qui' cuiạ'lu'a nna chi benia' gana ágayu' cantidat. ¹⁹ Làbi nna ra bi ạ: A'hua lu' nna, gudúa' lu' lo gayu' ca yetsi. ²⁰ Bitsina' huá áttuạ nna rạ: Señor, nìba té bel·liu qui' lu'a, túabá te' ạ le' ttu panitu, pues ²¹ anía benia' porqui'ni gùtsi te' cuiạ'lu', porqui'ni ná cuiạ'lu' ttu enne' duro, cáalá bethá' ya' ạ nna entonces huedi' telá cuiạ'lu' itútiạ, porqui'ni redi' cuiạ'lu' làti labí guda cuiạ'lu'. ²² Làniana ra bi ạ: Siervo malo ná lu'. Por la'a mísmuba titsa' qui' lu' nna acca ccá lu' condenar. Hua yù bá lu' qui'ni ná' ttu enne' duro, redi'a' nu làhuabi guda' ạ'hua rutùppa' làti lahuábí bedál·la'a'. ²³ Entonces, bianicca labí gulú'u lu' bel·liu quíyi'ị banco para qui'ni canchu chi él·lania' nna edí' ya' ạ lani yì'ni nì'i. ²⁴ Làniana ra bi canu tsè'e nía: Líccua bél·liuạ' lo ní'ị nna, líúte tì ạ lani nu beni gana átsi tantua. ²⁵ Làcạ nna ra tè cạ bi: Pero Señor, chía té tsìi quì'ị.

²⁶ Becàbi enne' ná rey nna ra bi: Inte' nna nia' le qui'ni nuña tediba té qui'ì nna, entonces là nna thí' lá adí; pero nu labí té qui'ì nna, pues hàstaá ti'to' nu té qui'ì nna ítua telá. ²⁷ A'hua iyaba canu na contrario quiya'a nna canu bihua uccualatsi' qui'ni ccá' rey qui' qui, litàxì' tsate' cạ nì nna lichù yáni qui ru'a lua'.

²⁸ Beyacca ba gunne Jesús ca tìtsa'a nna, dia tìe denérue para Jerusalén. ²⁹ Exa tegáabá ca yetsi Betfagé nna Betania nna chi dia cabi luítta' i'ya láạ Monte de los Olivos, guthel·la' tìe chuppa ca discípulo qui'áa nna, ³⁰ rẹe cabi: Lítsía le' yetsi to' nu re' frente taá tétia nna. Canchu chi bitsina' le nna hua taxácca' dígá le làti tá' ttu burro to' nu nìdi ttu enne' labí chi gutsiạ na. Ethàtsi li ạ nna eche' tẹtsate' li ạ nì. ³¹ Canchu nuña inàba tìtsa'ạ le: Bianicca rethàtsi li ạ, entonces lebi'ì nna ecàbini lí ạ: Porqui'ni Señor nna riquína'nie na. ³² Huía tè ca discípuluá nna taxácca' cabi tì'ba nu chi ra Jesús cabi. ³³ De rethàtsi cabi burro tú'a nna, biria chì canu ná xana' niá nna ra cạ cabi: Bianicca rethàtsi le burro tú'ạ' nì'i. ³⁴ Becàbi cabi nna ra cabi: Señor nna riquina'nie na. ³⁵ Làniana beche' tè cabi burro tú'a làti du Jesús. Guxua tè cabi ca lári' qui' cabía cui'ì, Jesús nna gutsia tìe na. ³⁶ Gutsìla tè cabi ca lári' lo néda para ttíe. ³⁷ Chi' tegáabá duạ quel·la' cabi liáỷu qui' Monte de los Olivos nna, làniana iyaba ca enne' yẹtse' dia lani áa nna yala bedacca' latsi' qui' nna gudulo cạ bedàliani cạ Tata Dios por iyaba ca milagro nu chi benie lani ca enne' nna, ³⁸ acca gunne cạ iditsa tsè': Bendito Enne' da' por nombre qui' Señor Dios para quée

rey qui' ri'u. Acca hua té la' redacca' latsi' le' ÿiabara', la' dàliani para Tata Dios nna. ³⁹ Làniana tuchùppa ca fariséua canu dia huá çà entre ca enne' ÿétse'á nna ra çà Jesús: Maestro, gutìl·la tí' canu da' lani cuiá'lu'á'. ⁴⁰ Becàbi Jesús nna rèe çà: Hualigani te' riquixa'ánia' le: Canchu làçà guthàya rú'a qui' nna, pues hàstala ca íyya anta' lo nedì nna thulo çà inne çà iditsa a favor de inte'. ⁴¹ Jesús nna bilá' banie ciudad ri'á exa taá nna, gudulue guretsie por là nna, ⁴² ra tìe: Cáalá nabia' tsàni lu' qui'ni anna ná tsá de la ÿeni para lu', pero bágá' bá ló lu'. ⁴³ Inte' nna nia' lu' qui'ni huàl·lani tsá qui'ni ca contrario qui' lu'a nna de repente taá íl·lani çà nna tséqquíá çà ita'lùba lu'; ca soldado qui' qui' nna gudàa çà guardia para qui'ni làa l·lá ca enne' qui' lu'. ⁴⁴ Gutàppa' guthìnniani çà ca dé'e qui' lu' nna ca yú'u qui' lu' nna, gul·lùÿa çà latsi' ca enne' qui' lu' nna. Pues hàstaba ca íyya nna labí eyà'na iqquia luetsi qui' sino iyáÿiani çà iyìnnia. A' ccá lani le porqui'ni labí bedácca'ni le loti' gul·lanie lani le.

⁴⁵ Gutà'a ba Jesús le' templua nna, bedàl·lee fuera iyaba canu tsè'e nía huètti' nna huì'i nna runi çà negocio nna, ⁴⁶ rèe çà: Tata Dios nna rèe lo titsa' qui'e: Yú'u qui'yi'ì nna nà yú'u para oración; atsi'íni lebi'i nna, bèlià qui' ubàna lá chi nani li á. ⁴⁷ Jesús nna gutixè'e ca enseñanza nu cca qui' Tata Dios ttu ttu tsá bá le' templua. Acca ca sacerdote principal nna ca maestro de la ley nna á'hua canu rigú'ubia' entre ca enne' judíua nna yala uccua latsi' qui' gutti çà ne. ⁴⁸ Pero bihua modo betseláni çà bíÿalá guthácca' çà ne, porqui'ni iyáÿiani ca enne' bedà naga' qui' qui'e nna labí uccua latsi' qui' gunitti çà

ni ttu titsa' nu gunnie.

20

¹ Ttu tsá lània nna de riquixá'ani Jesús ca enne' le' templua ca enseñanza qui' Tata Dios nna de runie predicar acerca de ca titsa' tse' qui'e nna, bitsina' tè ca sacerdote principal nna ca maestro de la ley lani canu rigú'ubia' entre ca enne' yétsiá. ² Gunne cã lani e nna ra cã ne: Gutixa'áni intu'. Núní por mandado qui'ni acca runi lu' ca così. Núní benna deréchuì qui' lu' cá. ³ Becàbi Jesús nna rève cã: A'hua inte' nna guni huá' le ttu pregunta, lecàbini inte': ⁴ Derecho nu béniní Juáan bautizar, tsí dá'ã de ÿiabara', o tsí ca enne' ba bete cã na áccá. ⁵ Làniana gudulo cã gunne lettia cã tì'iýalá ecàbini cã ne nna ra luetsi qui: Ti'ani ecàbi ri'u annana: Canchu ina ri'u qui'ni Tata Dios bete derecho qui' Juáan para guni bi bautizar, entonces gá taã ri'u: Biálacca làa huíalatsi' le qui' bi cá. ⁶ A'hua canchu ina ri'u qui'ni ca enne' ba bete permiso qui' bi, entonces iyaba ca enne' nna gudua cã íyya iqquia ri'u porqui'ni yala seguro ga'na cã qui'ni Juáan nna uccua bi ttu profeta nu guthel·la' Tata Dios. ⁷ Acca mejor la becàbi cã nna ra cã: Labí yù tu' gáýalá da' derecho qui' bía. ⁸ Làniana ra tè Jesús cã: Nìhua inte' nna labí quixa'ánia' le nuýa benna la'huacca quia' acca runia' ca così.

⁹ Gutixa'a tènì Jesús ca enni'a ttu comparación nna rève: Ttu ène'yu' nna guda bi planta qui' betsulí' le' loyu qui' bi. Betèsa tè bi lóyúa lani canu guni cã na tsina. Làniana guda' tè bi dia bi attu lugar nna labí betsina' tè bi. ¹⁰ Bi'yu díbá tiempo cosecha qui' betsulí'a nna guthel·la' bi ttu mozo

lani canu runi tsina le' lóyúa, para qui'ni gute çà qui' rendimento qui' loyu qui' bía. Pero làçà nna bè' lá çà mózuá idí' tsè' nna bethel·la' tè çà na, bittu tení biÿa bete çà éyu'á. ¹¹ Bedethèl·la' gáabá bi attu mozo nna, anía huá bedua dí' çà mózuá nna bè' çà na lani yà nna, á' tètuba dénáló ní'ì bethel·la' çà na. ¹² Bedethèl·la' gáabá bi attu mozo nu cca tsunnáa nna. Aníahuá bedethácca' çà na, de chi beni dí' çà qui'ì nna bedàl·la çà na fuera. ¹³ Làniana enne' ná xana' lóyúa nna ra bi: Annana biáttсарúnuá gunia'. Ithél·la' cà'a' ÿì'nia' enne' yala cats'ítì'ì, xiaba canchu chi ilá'ni çà bi nna huappa cà'ba çà bi respeto. ¹⁴ Pero canu runi tsina lóyúa nna de bilá'ni çà ÿì'ni bía nna gulù'u taá titsa' luetsi qui' nna ra çà: Là nui nuá' eyà'na itúbá lóyúì. Lítsa', gutti ri'u á para qui'ni ri'u la thí' nu reda' latsi' tàta qui' niá na ccá ri'u xana' itúbá lóyúì. ¹⁵ Làniana bedàxu' çà ÿì'ni bía nna bedàl·la çà bi fuera nna betti çà bi. Acca, biani guni propio gani enne' ná xana' lóyúa lani làçà cá. ¹⁶ Pues el·lani bi nna gul·lùÿa bi latsi' canu runi tsìnàa nna, gutèsa tè bi loyu qui' bía lani canu huaya' la. A' ná comparación nu gutixa'a Jesús. Ca enni'a nna de biyénini çà ca titsa' qui'e nna ra tè çà: Làa ina cànna Tata Dios thacca' tu' tì' ra cuíá'lu'á'. ¹⁷ Pero Jesús nna gunne'e çà nna rèe: Pues biani ritelíni le titsa' nu ga'na escrito làti ra:

Iyya nu labí guyú'u latsi' canu rucùà' yú'a nna,
 Chi nà íyya principal nu adila tsìttì naxu'á yú'a.
¹⁸ Inte' nna nia' le: Nuÿa tediba ibìxi lo íyya principal ni nna l·lúÿa latsi'ì, á'hua nuÿa íqquianí ìnnia íyyì nna gútsi'ití'níá na.

¹⁹ Làniana ca sacerdote principal á'hua ca mae-

stro de la ley nna gutelíni cã qui'ni contra làbáca nuá gutixa'a Jesús enseñánzaá. Acca yala uccua latsi' qui' gudàxu' cã ne, pero gutsibáni cã ca enne' yétsiá. ²⁰ Acca guleda ba cã ttu oportunidad nna bete cã bel·liu làtsi' ná' tuchùppa ca enne' para tsía cã guni bá cã ne prueba ti'átsi yala amigo tsè' ná cã lani e, canchu ecàbie ttu titsa' nu labí ná correcto, anía modo nna gappa cã néda gute cã ne cuenta làtsi' ná' gobernador. ²¹ Acca gunàba titsa' tè cã ne nna ra cã: Maestro, hua yù bá tu' qui'ni rulue' cuiã'lu' nna riquixa'a cuiã'lu' puro taá nu ná tsè', nìhua labí rucué'ní cuiã'lu' ca enne' según la' rinna' qui' qui', sino ttu ru'ataá cani cuiã'lu' cã nna riquixá'ani cuiã'lu' iyábani ca enne' lo néda lígani qui' Tata Dios. ²² Gutixa'áni cuiã'lu' intu': Tsí hua ná tsè' qui'ya ri'u nu ruthítsini gobierno qui' César ri'u, o tsí bíhuá áccá. ²³ Pero Jesús nna gutelí taánie la' rulábalatsi' mal qui' qui' nna rèe cã: Biecca calatsi' le guquinnia le inte' lani ca tìtsa'ã'. ²⁴ Líúlue' tsánnanì inte' bél·liuã' nna. Núní retrato qui'ní nui dua lo monédj, ã'hua núní láa ní nui dua nì. Becàbi cã nna ra cã ne: Qui' Cesar enne' romano ná rey. ²⁵ Làniana ra tie cã: Entonces líúte bá qui' César nu ná qui' César, ã'hua líúte bá qui' Tata Dios nu ná qui'e nna. ²⁶ Por ca tìtsa'a nna labí biríalàni cã uquinnia cã ne lani ttu titsa' ru'a lo ca enne' yétsiá, sino qui'ni biquíla' bá latsi' qui' ti'iyã becàbie, acca mejor la uccua taá tsi qui' qui'.

²⁷ Làniana bitsina' tè tuchùppa canu denó cã religión saduceo. Ca saducéuá nna labí ríalatsi' qui' qui'ni eyátha ca enne' de lo lù'uti. Làcã nna gunàba titsa' cã Jesús nna, ²⁸ ra cã: Maestro, lo

escritura nu bethà'na Moisés lani ri'u nna, ra qui'ni canchu nuña ttu enne' ní gatti ttu bettsi'ì nna pero lanu ÿi'nì uccua, entonces ná qui'ni guttsa taání'ì lani niuláa para qui'ni elitha descendencia qui' bettsi'ì nu gúttía. ²⁹ Gutsé'e gàtsi bettsi' ca enne'. Bettsa tená' nu néruá nna, pero gùtti bá nna lanú ÿi'nì uccua. ³⁰ Làniana nu cca chùppáa nna bettsa huání'ì lani viúdaá, pero gùtti huá nubéyu'a nna, ñihua lanú ÿi'nì uccua. ³¹ Anía tehuá uccua lani nu cca tsùnnáa, hàstaá qui'ni iyaba canu gàtsi bèttsi'a nna gùdualàni cã niuláa, lanú ÿi'ni qui' uccua. ³² Bitóte nna gùtti huá niuláa. ³³ Canchu chi gal·la' tsá eyátha canu yatti nna, núlá canu gàtsi bèttsi'a ccá qui'ì niuláa cá, ya qui'ni iyaba gàtsi cã nna bettsaná' qui' lani a. ³⁴ Jesús nna becàbinie cã nna rè: Ca enne' qui' yétsiloyuì nna ruttsa báná' qui'. ³⁵ Pero canu cca merecer tsé'e cã le' la'labàni nu chì' da'la nna eyátha cã de lo lù'uti nna, pues lanuru nuña guttsaná'. ³⁶ Porqui'ni nía nna lanuru nuña gatti. Pues iyaba cã nna ccá cã ÿi'ni Tata Dios porqui'ni eyátha cã de lo lù'uti para la'labanía, acca ccá lá cã tì'a ná ca ángel. ³⁷ Pero acerca de canu yatti ná qui'ni eyátha cã de lo lù'uti nna, pues la'a mísmuba Moisés gutixa'a bi acerca de nua' làti rinne bi nu cca qui' tittsa yèttse' nu ritè làl·lanía loti' ra bi qui'ni Señor nna née Dios qui' Abraham nna Isaac nna Jacob nna màsqui'ba chía gutsá gùtti cabi. ³⁸ Quiere decir qui'ni canu yatti nna bàni ba cã. Cálá labí ná a' nna, entonces ti'ani modo ra Tata Dios qui'ni entre canu yatti nna tsé'e canu runi cã ne adorar cá. Pues para lani Tata Dios nna, a'hua ca enne' canu chi gùtti nna bàni bá cã, tì'a canu

labí chi gùtti. ³⁹ Becàbi tuchùppa ca maestro de la ley nna ra cą ne: Maestro, yala tse' becàbi cuią'lu'.

⁴⁰ Pues labiru beyáŷani cą inàba titsa' cą ne adí.

⁴¹ Làniana Jesús nna rée cą: Ti'ani modo acca rena cą qui'ni Cristua nna née ŷi'ni David cá.

⁴² Atsi'íni la'a mísmuba David gunne bi acerca de lèe lo libro qui' ca Salmos nna ra bi:

Señor Dios nna gunènie Señor quiya'a nna rée:

Gùduani cuittá'a' lado bàni,

⁴³ Hàstaá qui'ni gúnná' latsi' ná' lu' iyaba canu làa cca guyu cą lu',

para qui'ni gúl·liani lu' iqquia qui.

⁴⁴ Por ca titsa'a nna yù ri'u qui'ni la'a mísmuba David nna reya bi Cristua SENOR. Entonces, ti'ala modo acca née descendiente qui' bi cá. ⁴⁵ Làniana ru'a lo iyaba ca enni'a nna ra Jesús ca discípulo qui'áa:

⁴⁶ Líhue' cuidado lani ca maestro de la ley,

qui'ni làa guni le tì'a runi cą. Yala rú'ulatsi' qui' cueni cą lo néda lani ŷo tùni qui' qui, ą'hua yala rú'ulatsi' qui' qui'ni ca enne' ŷetse' guni cą cą salu-

dar canchu día cą lo néda, ą'hua yala rú'ulatsi' qui' xúaní cą lo ca asiento dàa íqquiará' tè le' ca sinagoga

ą'hua lo ca primero asiento le' ca fiesta qui' qui' para qui'ni ilá'ni ca enne' cą qui'ni yala enne' re'

cuenta ná cą. ⁴⁷ Làcą nna rigua cą hàstaá ca yú'u qui' ca pobre viuda nna, ą'hua màsqui'ba yala itsá

runi cą oración pero labí lí nu runi cą. Acca nia' le qui'ni ca nui nna adila fuerte ná castigo thí' cą.

21

¹ Le' templua nna bilá'ni Jesús ca enne' rico rigú'u cą bel·liu le' caja para ofrenda. ² Bilá' huánie bitsina' ttu niula pobre ná viuda nna, gulù'í

chuppa moneda nu de cobre dacca' cą ti'to' rúbá.
³ Ra tè Jesús: Hualigani te' nia' le qui'ni niula viúđi
 nna yala là'di' rittią, pero adila iýeni betią ti'chula
 iyaba cą. ⁴ Porqui'ni iyaba cą nna rute cą qui'
 ofrenda para Tata Dios nu réxabáni cą, pero niulíj
 nna màsqui'ba ną pobre, pero bete lą itute hàstaá
 nu ná gonią.

⁵ Rinne tè tuchùppa cabi qui'ni yala tsè' ná
 templua, porqui'ni yala tsè' ná ca íyya cua'ni ca
 dé'a, ą'hua latsitte ni ná canu beda' latsi' ca enne'
 bete cą para ccá tsè' le' templua. Làniana ra
 Jesús cabi: ⁶ Huàl·lani tsá qui'ni iyaba ca cosa nu
 rilá'ni le annana, pues itàppa' iyinniani cą porqui'ni
 huàl·lani canu dittu' nna guthinnia gutàppa'ni cą
 hàstaá qui'ni labiru eyà'na iqquia luetsi ca íyyj.

⁷ Gunàba titsa' tè cabi e nna ra cabi: Maestro,
 cuani ccá nu gútixa'a cuía'lu'ą'. Biani señal ni ilá'ni
 tu' para ccá tu' saber ántesca thulo iyaba ca cosj.
⁸ Becàbi tè Jesús nna rèe: Líhue' cuidado qui'ni
 làa guthacca'ýi cą le. Porqui'ni nuýetse' í·lani lani
 nombre quia' nna ina cą qui'ni làcą nuá Cristua.
 Ađ'hua ina cą: Chì' taání duą í·lani fin. Pero bittu
 tsíalatsi' le qui' quij. ⁹ Canchu chi guna le qui'ni
 cca guerra o qui'ni ritil·la ca gobierno nna, bittu
 gátsini le. Porqui'ni náduel·la' ccá yà'latè ca cosj,
 pero nihuani labí chi gùl·la' tè fin. ¹⁰ Raáruhuée cabi:
 Ttu nación nna til·lą contra attu nación, ą'hua ttu
 gobierno contra attu gobierno nna. ¹¹ Ađ'hua í·lani
 la' riýú' fuérteni, ą'hua í·lani ubina' nna itsahue'
 nna iýé lettia tsè' le' yétsiloyuj. Ađ'hua ca enne'
 nna yala gátsini cą porqui'ni ilá'ni cą ca señal nu
 cca ýiaba. ¹² Pero ántesca í·lani iyaba ca cosj nna,

gutsia latsi' quì le nna gudàxu' cą le nna gute cą le cuenta lani ca enne' principal le' ca sinagoga, ą'hua gudà·la cą le litsi' ìyya, ą'hua iche' cą le ru'a lo ca rey nna canu rigú'ubia' nna porqui'ni ná le enne' ríalatsi' quia'. ¹³ Anía modo nna gappa le néda para quixá'a le nu cca quia'. ¹⁴ Licuèqquia tsìttsi latsi' losto' le qui'ni bittu nùyue gá canì le ti'iyā ecàbi le para guni sostener qui' le; ¹⁵ porqui'ni inte' nna gunna' titsa' nna la' riyénitse' nna lo losto' le, hàstaá qui'ni canu iria contra le nna labiru ccani cą ecàbi cą biyā contra ca titsa' qui' le. ¹⁶ Ą'hua ca tàta nàna qui' le nna, ca bettsi' le nna, ca pariente qui' le nna, ca amigo qui' le nna gute cą le cuenta làtsi' ná' canu labí cca guyu cą le, pues gútti hua cą tuchùppa le. ¹⁷ Pues itute yétsiloyu nna guyudí'ą le porqui'ni ná le enne' ríalatsi' quia'. ¹⁸ Pero nìdi ttu itttsa' iqquia le labí il·latsu' canchu labí ná voluntad qui' Tata Dios. ¹⁹ Canchu ccá bá le tsìttsi lani inte' nna, huatta' la'labàni qui' le. ²⁰ Canchu chi ilá'ni le iyētsē' ca soldado ita'lùba ciudad Jerusalén nna, entonces ttélini le qui'ni chi bi'yu tsá qui'ni l·lúyā latsi'į. ²¹ Làniana canu tsè'e le' región qui' Judea nna dāni cą ucùitta cą tsía cą lo ca ló'ya lá. Ą'hua canu tsè'e le' ciudáad nna dāni cą ucùitta cą. Canu tsè'e fuera Jerusalén nna, bittu éya'a cą lì'į sino dāni cą ucùitta telá cą. ²² Porqui'ni anía nna ccá cumplir iyábani nu chi ga'na escrito acerca de tiempo de castíguį. ²³ Canchu chi bi'yu tsáa nna, ica'rútsi'íru ca niula nùà' huatsa to', ą'hua canu rigátsi' ýi'ni to' qui' quì nna, porqui'ni yala ca sufrimiento il·lani le' ituba nación nì ą'hua ttu castigo xeni iqquia yétsį. ²⁴ Ttu te cą nna gatti cą lo guerra, adí cą

nna iche' canu dítu' cą preso hàstaá attu naciòn huaya'. Ca enne' dítu' nna ebèqquia bestè ní cą ciudad Jerusalén hàstaá qui'ni ilùya tiempo nu ná qui'ni guni cą dominar.

²⁵ Làniana ilá'ní ca señal ÿiaba, porqui'ni labíru gudàni' bitsą' nihua biuá'ą' nna nihua ca bélia nna. Ca enne' qui' yétsiloyu nna yala uccuè'enía latsi' qui' ą'hua yala gátsini cą porqui'ni yala ruido guni in-datù'a thúlínía. ²⁶ Làniana igùtsi latsi' qui' por tántua la' rátsilatsi' de tebé'ni cą íl·lani ca sufrimiéntua le' yétsiloyu, pues hàstaá iyaba ca cosa canu tsia ÿiaba nna, tatittiní cą. ²⁷ Làniana ilá'ni cą Nubeyu' de ÿiabara' il·lanie le' ttu bía lani itute la'huacca qui'e nna la'yani' qui'e nna. ²⁸ Canchu chi thulo ccá ca cosı nna, leyàppa fuerza nna lichitha lo le nna lınna', porqui'ni chi' taání duą íl·lanie para gudilèe le. ²⁹ Làniana gutixa'a Jesús ttu comparaciòn nna rèe: Linna'tsáruhuá ca yà exxuhı ą'hua iyaba adı ca yà. ³⁰ Canchu chi rilá'ni le qui'ni rebia l·la' qui' qui, pues anía modo ritelíni le qui'ni chì taáduą íl·lani tiempo verano. ³¹ ą'hua lebi'ı nna, canchu chi ilá'ni le qui'ni cca iyaba ca cosa nu chi gutixa'ánia' le nna, entonces ccá le saber qui'ni exa taá chi debiga' tiempo de la' rigú'ubia' qui' Tata Dios. ³² Hualigani te' riquixa'ánia' le qui'ni labı tté ca enne' tsè'e tiempo de ca señal ni hàstaá qui'ni iyábani ca cosı nna ccá cą cumplir. ³³ ÿiaba nna yétsiloyu nna l·luya bá latsi' qui, pero ca titsa' quíyi'ı nna labı tté cą sino té qui'ni ccá cą cumplir. ³⁴ Líhue' cuidado por la'a lebi'ı bá, qui'ni làa puro i'ya go le nna guni le borrachar nna yala nùyue ní tsè'e le nu cca qui' yétsiloyu nna, para qui'ni alàa

ca nui lá runi le canchu de repente taá chi gal·la' tsá señalado nu nani Tata Dios, ³⁵ porqui'ni tì'a cca canchu chi là' retò taání ttu trampa, a' modo de repente taá íl·lani tsáa nna nìyyani latsi' ca enne' tsè'e le' itúỹiani yétsiloyu nna labí l·lá ça. ³⁶ Acca litsé'e al tanto, liguni oración tulidàba qui'ni gappa le fuerza para gutè le tsè' iyaba ca così canchu chi íl·lani ça nna tsé'e le lani la' redacca' latsi' ru'a lo Nubeyu' de Ýiabara'. ³⁷ Jesús nna ttu ttu tsá bá gutixe'e le' templua iyétse' ca enseñanza. Pero de réla lá nna berie nna huíe beyà'née lo i'ya láa Monte de los Olivos. ³⁸ Itúbani yétsiá nna huía ça ru'a lúe de díla lá le' templua para gudà naga' qui' qui'e.

22

¹ Exa taá chi debiga' fiesta canchu chi ro ça ettaxtíla sin levadura para qui'ni guni ça celebrar tsá pascua para éxalatsi' qui' loti' gulàa ca ta' tàta qui' qui' le' pais Egíptua. ² Ca sacerdote principal lani ca maestro de la ley nna beyìla ça néda ti'íỹa modo gutti ça Jesús, pero yà'latsi' bá gune lettia ça porqui'ni gutsibáni ça ca enne' yétsiá. ³ Gutà'a tè Satanás lo losto' Judas nu guta' huá líj Iscariote, uccua huá ttu nu tsì'nu ca discípulua. ⁴ Judas nna huía làti tsè'e ca sacerdote principal a'hua canu ná jefe qui' guardia qui' templua nna bè' huá titsa' lani ça tì'íyalá modo gutiá Jesús cuenta lani ça para gattie. ⁵ Làça nna yala bedácca'ni ça nna beyà'na ça qui'ni gute ça bel·liu qui'j. ⁶ Là nna guỹi'ché' bá nna guduluá beyìla néda ti'íỹa modo gútiá ne cuenta lani ça, sin qui'ni làa tébé'ni yétsiá.

7 Gùl·la' bá tsá ro cą ettaxtíla sin levadura nna uccua duel·la' gutti cą ttu carneru to' para sacrificio qui' tsá pascua. 8 Jesús nna guthèl·le'e Pedrua nna Juáan nna rèe cabi: Lítsía nna guni le preparar para go ri'u nna éxalatsi' ri'u tsá yēñi. 9 Làcabi nna ra cabi e: Gani calatsi' cuią'lu' guni tu' ą preparar. 10 Lèe nna rèe cabi: Canchu chi gá'a le le' ciudá', nía nna etsà' le ttu nubeyu' dénú'ą tu ré'e inda. Tanó tè li ą hàstaá le' yú'u làti éya'ą. 11 Línne enne' ná xana' yú'a nna ga li ą: Guthel·la' Maéstruá intu' para inàba titsa' tu' cuią'lu': Gani nua' dua cuarto làti ná qui'ni gua' lani ca discípulo quiyi'ì nna guni tu' celebrar páscuj. 12 Nubéyu'a nna gulue' taáníą le ttu cuarto xeni nu chía dua léda bą duą iqquia ráa'lá, porqui'ni yú'a nna ną nu chuppa cua', nía nna liguni preparar para ri'u. 13 Làcabi nna huía cabi nna taxácca' cabi tì'a nu chi ra Jesús cabía. Nía nna beni cabi preparar para páscuá. 14 De gùl·la' hóraá nna gùduani Jesús lo méyaá, ą'hua ca apóstol lani e nna. 15 Làniana rèe cabi: Yàlani deseo té quia' gua' lani le tsá páscuj ántesca gattia'. 16 Porqui'ni nia' le qui'ni labiru go ya' ą attu hàstaá qui'ni ccá cumplir itútią le' reino qui' Tata Dios. 17 Jesús nna guyi' tie vásuá nna gunàbèe bendición lani Tata Dios nna, làniana rèe cabi: Líthi' ą nna líquithia ą entre lebi'i. 18 Porqui'ni nia' le qui'ni labiru í'yá' inda qui' betsulí' hàsta'na canchu chi íl·lani reino qui' Tata Dios. 19 Làniana Jesús nna guyi' tie ettaxtílaá nna gunàbèe bendición; làniana gùl·le'ée na nna bì'e cabi nna rèe: Nui nna ną cuerpo quia' nu rutía' por lebi'i. Iì ba guni le para nu chì' da'la, pero siempre éxalatsi' le inte'. 20 Beyacca díbá

gutó sé' cabi nna, guỹi' huéé vásaú nna rèe: Vásuį nna runia representar convenio cubi nu runia segúruni por medio de réni quia' nu ilàlia por lebi'į. ²¹ Pero linna'áruhuá qui'ni nu gútią inte' cuenta para gattia', pues niba rucà ní'į lo meỹi lani a'. ²² Hualigani qui'ni Nubeyu' de Ÿiabara' nna dia bée ttie iyaba nu chi ná qui'ni ccá, pero ica'rútsi'iru nubeyu' nu gunia inte' traicionar. ²³ De biyénini ca discípuluá ca títsa'a nna gudulo cabi gunàba títsa' luetsi cabi núyalá cabi nuá guni anía.

²⁴ Huàdi hua ttu disgusto entre ca discípuluá acerca de núyalá cabi ccá adiru enne' re' cuenta. ²⁵ Pero Jesús nna rèe cabi: Iyaba ca rey yétsiloyuį nna rigú'ubia' çą itúbani, ą'hua iyaba canu té la'huacca qui' quį nna yala rudàliani ca enne' çą. ²⁶ Pero entre lebi'i nna labí ccá ą', sino qui'ni nu ná enne' principal entre lebi'į nna dànią eyacca lą ttu nu ruthète' tì'a ttu nu cuiti'. A'hua nu rigú'ubia' entre lebi'į nna dànią thú huą al tanto para gunia servir. ²⁷ Porqui'ni, núlá dacca' adiru segun yétsiloyuį: Tsí nu ribé' lo meỹa, o tsí nu runi servir áccá. Tsí álahua adila dacca' nu ribé'ní lo meỹa cá. Pero inte' nna dua' entre lebi'į tì'a ttu nu runi servir. ²⁸ Lebi'i nna tulidàba gutsé'e le lani inte' hàstaá lo iỹetse' ca prueba. ²⁹ Acca inte' nna gutía' derecho qui' le para cu'úbia' le le' reino nu chi benna Tata quí'a lani inte', ³⁰ para qui'ni í'ya go le lani inte' le' reino quíya'a, ą'hua xuàni le lo ca xila' tsè'ni para guni le juzgar ca tsì'nu yetsi qui' ca enne' Israel.

³¹ Señor nna ra huéé: Simón, Simón, bè' cuidado qui' la'a mísmuba lu', porqui'ni Satanás nna chi

té permiso qui'ì gunià iyaba le probar, tì'a ttu campesino rùttià ÿua'xtila le' ttu harnero. ³² Pero inte' nna chi gunábania' Tata Dios por lu' para qui'ni bittu eyàtsa fe qui' lu'. Lu' nna de chi beyéqquia lu' lani inte' attu nna ná qui'ni gútse'e tsìttsì lu' ca bettsi' lu'. ³³ Pedrua nna ra bi e: Señor, lístubá dua' para tsa'á' alàarùla litsi' iyyà lani cuià'lu', sino à'hua hàstaá gattia' lani cuià'lu'. ³⁴ Jesús nna rèe bi: Pedro, nì nia' lu' qui'ni annana labí thí'ché' lu' por tsunna vuelta qui'ni nabia'ni lu' inte', làniana cuetsi xcurúdiá.

³⁵ Raáruhuá Jesús cabi: Loti' guthél·la'a' le sin morral nna sin bolsa para bel·liu nna sin guarachu nna, tsí beyatsa biyà qui' le cá. Becàbi cabi nna ra cabi: Labí biyà. ³⁶ Làniana rèe cabi: Pero annana nu té ttu morral qui'ì nna, pues thí'á na, à'hua nu té ttu bolsa to' nu yù'uni bel·liu qui'ì nna ná qui'ni huá'á na gaýa tediba díá. Nu labí té ttu espada qui'ì, pues ná qui'ni gúttí'á biyà màsqui'di mata qui'ì para ccá gó'oníá tu espada, porqui'ni chi taání duá lanúruà' té lani le. ³⁷ Porqui'ni caduel·la' ccá cumplir lani inte' iyaba nu ga'na escrito làti ra: Làcá nna belàtsi' cã ne entre canu huèni maldad para gattie.

Pues iyate nu ga'na escrito acerca de inte' nna chi gul·lani tsá qui'ni ccá cumplir. ³⁸ Làcabi nna ra cabi e: Señor, nì té chuppa teruba espada. Lèe nna rèe cabi: Huacca taání ca nuá'.

³⁹ Biria tè Jesús nna hué Monte de los Olivos tì' ba nu runi bée. Ca discípulo qui'áa nna denó tè cabi e. ⁴⁰ Bitsina' díbée nía nna rèe cabi: Liguni oración para qui'ni làa ìnnia le le' ttu prueba nu labí ccani le gúchia li á. ⁴¹ Làniana biria yètsì'e nna hué

ati'to' tèt idittu', beduỹíbie nna benie oración nna ⁴²rèe: Tata quia', canchu calatsi' cuiã'lu' nna gutua bá cuiã'lu' sufrimiento nu tté yì'ì lani inte'; pero aláa tì'a cabálátsa'a', sino ccá bá según voluntad qui' cuiã'lu'. ⁴³Làniana de repente taá gudu tèt ttu ángel qui' ÿiabara' ru'a lúe nna gùppèe adí fuerza qui'e para qui'ni bittu quée desmayar. ⁴⁴De chi rehuiní' xàttànie nna adila fuerte benie oración nna indétha qui'e nna uccuã ti'taání càniba' él·lani réni binnia cã loyu. ⁴⁵De beyacca beni oración nna bedulie nna beyéqqie làti tsè'e ca discípulo qui'áa nna, bilá'nie qui'ni ti'áthi bá cabi, porqui'ni yala chi guretsi cabi por tristeza nu uccuani cabi. ⁴⁶Jesús nna ra tìe cabi: Leyátha nna liguni oración, línaba qui'ni làa ìnnia le le' tentación.

⁴⁷Hua rinne cànaa bée nna bitsina' chì canu ÿetse' ca contráriuá. Judas ttu canu tsì'nu ca discípuluá nna dénèruã lo qui' nna gubíga'ã ru'a lo Jesús para gúttsa'lúì ne. ⁴⁸Jesús nna ra tìe na: Judas, tsì lani ttu beso rute lu' cuenta Nubeyu' de Yiabara' cá. ⁴⁹Ca enne' tsè'e nía lani Jesús na, de bilá'ni cabi ti'iyã chi ruthácca' cã ne nna, acca ra cabi e: Señor, guni dí' cà'a tu' qui' qui' lani espada cá. ⁵⁰Ttu bi nna quèthani bè' bi ttu siervo qui' nu ná huexána' qui' ca sacerdotéa nna guchu bi yéti nàgui'ì lado bàni. ⁵¹Ra tèt Jesús: Bítuúru biyã guni le. Líhue'él·la' cã. Làniana beláppa' tìe yéti naga' siérvuá nna beyúnie na. ⁵²Làniana gunne Jesús lani ca sacerdote principal ã'hua lani canu ná jefe qui' guardia qui' templua nna ã'hua canu rigú'ubia' le' yétsiá nna, quiere decir iyaba canu bitsina' para gudàxu' cã ne nna, rèe cã: Tsì da' le yù'u ná' le espada nna yà nna para gudàxu' le inte' preso

ti'atsi ná' ttu ubana cá. ⁵³ Ttu ttu tsá bá gudúa' lani le le' templua nna, atsi'íni bihua bedàxu' le inte'. Pero chi gul·la' hora qui'ni lebi'i nna la'huacca de la' chúl·la nna guni le nu calatsi' le.

⁵⁴ Bedàxu' cą ne preso nna guche cą ne litsi' huexána' qui' ca sacerdotéa. Pedrua nna idittu' bá denó bi e. ⁵⁵ Becùà' tè cą yi' le' lí'a. Guỹua tení iyaba cą ita'lùba yí'a. Pedrua nna gure' huá bi lani cą. ⁵⁶ Ttu sirvienta nna bilá'nią Pedrua re' bi cuitta' yí'a nna bedácca' tsè'bánią bi nna ra tią: A'hua nui nna gurèni huą lani nubéyu'ą'. ⁵⁷ Pero Pedrua nna labí guỹi'ché' bí nna ra la bi: Lu' niula, labí nabia' te' nubéyu'ą'. ⁵⁸ Ti'to' taá bitola nna bilá'ni áttuą bi nna rą: A'hua lu' nna enne' qui' huá quí ná lu'. Pedrua nna ra bi ą: Labí ná'. ⁵⁹ Ttu hora ti'gá bitola nna adila fuerte benią sostener nna rą: Hualigani qui'ni nui nna gurèni huą lani ą porqui'ni ą'hua lą nna ná huą enne' Galilea. ⁶⁰ Pedrua nna ra bi: Lu' nubeyu', nìdi làa yúá' biỹa nuá ra lu'. Atsaba rinne Pedrua nna gurètsi chì xcurúdiá. ⁶¹ Làniana bedèqquia lo Señor nna gunnè'e Pedrua. Pedrua nna bexa tèlatsi' bi ca titsa' qui' Jesús loti' rèe bíá: Antesca cuetsi xcurúdiá nna, tsunna vuelta ína lu' qui'ni labí nabia'ni lu' inte'. ⁶² Acca yala behuiní'ni bi nna, beria tè bi nía nna biditsùni bi guretsi bi.

⁶³ Canu bedàxu' cą Jesús preso nna yala burla beni cą ne nna bè' cą ne golpe. ⁶⁴ Bethàya tè cą lúe lani ttu lári' nna gutìni ná' quí lúe nna ra tè cą ne: Gùnna tsánna nuỹa nua' bè'ą lu' nna canchu hualigani ná lu' ttu profeta. ⁶⁵ A'hua lani iỹétse'éru ca titsa' mal nna beni cą seguir bedua dí' cą ne.

⁶⁶ Huàni' bá nna betùppa canu rigú'ubia' entre

ca enne' judíua lani ca sacerdote principal nna ca maestro de la ley qui' ca niá nna; iyaba cą nna guche' cą Jesús ru'a lo Junta Suprema. Nía nna gunàba títsa' cą ne nna ra cą: ⁶⁷ Gutixa'áni intu' canchu lu' nuą' Cristua. Lèe nna rèe cą: Canchu quixa'ánia' le nna, labí tsíalatsi' le. ⁶⁸ A'hua canchu biya inába títsa'a' le nna, labí ecàbini le inte' nìhua làa gúla' huá le inte' nna. ⁶⁹ Pero dèsdeba annana Nubeyu' de Ýiabara' nna cué'níe ýiabara' lugar de la dàliani qui' Tata Dios enne' té itute la'huacca qui'e. ⁷⁰ De rèe ca títsa'a nna iyaba cą nna ra cą ne: Tsí hualigani ná lu' Ýi'ni Tata Dios cá. Jesús nna rèe cą: Lébi'i bá chi ra qui'ni á' ná'. ⁷¹ Làniana ra cą: Biáruálá títsa' ni riquína' gúna ri'u cóntrı́ cá. Porqui'ni la'a mísmuba ri'u chi biyénini ri'u ca títsa' qui'ı́.

23

¹ Làniana guduli chì iyáyiani cą nna guche' cą Jesús ru'a lo Pilátua. ² Gudulo tè cą betsia cą queja contra Jesús nna ra cą: Chi bedàxu' tu' nubéyu'ı́ porqui'ni yala escándalo runiá le' nación qui' ri'u nna labí calatsi'ı́ quiya tu' nu ruthı́tsi gobierno qui' rey qui' ri'u César nna reną qui'ni la'a labá ná Cristo, ti'átsi ná huá ttu enne' rigú'ubia'. ³ Làniana gunàba títsa' Pilátua Jesús nna rą: Tsí ná lu' Rey qui' ca judíua' cá. Becàbi Jesús nna rèe na: A'chu chi ra lu'. ⁴ Pilátua nna rą ca sacerdote principal a'hua iyaba ca enne' tsè'e nía: Nidi ttu falta làa retsèla te' qui' nubéyu'ı́. ⁵ Pero làcą nna adila dı́tsa gunne cą nna ra cą: Yala alboroto runi ca enne' por causa de

ca enseñanza qui'ì, guduluą dèsdèba Galilea làniana le' itúyiba Judea hàstaá nì.

⁶ Pilátua nna de biyéninią qui'ni Jesús nna bethète'nie ca enne' dèsdèba le' estado qui' Galilea, acca gunàba tìtsa'ą canchu née enne' galileo. ⁷ De ùccuą saber qui'ni Jesús nna uccuee enne' galileo, acca gulèqquia latsi'ì ithél·la'ą ne ru'a lo Herodes nu uccua gobernador qui' Galilea. Herodes nna re' huą ciudad Jerusalén tiempo lànìa. ⁸ Bilá' báni Herodes Jesús nna, yala bedácca'nią porqui'ni chia gutsá uccua latsi'ì gunibí'ą ne; porqui'ni iýtse' ca cosa chi biyéninią nu cca qui'e, acca yala uccua latsi'ì ilá'nią ne gunie ttu milagro. ⁹ Herodes nna beni tią Jesús iýtse' pregunta, pero lèe nna labí biyā becàbinie na. ¹⁰ Tsè'e tē ca sacerdote principal ą'hua ca maestro de la ley, yala fuerte beni cą sostener nu gunne cą còntre. ¹¹ Làniana Herodes nna lani ca soldado qui' niá nna yala bedua dí' cą ne nna beni cą ne burla nna begàccu' tē cą ne ttu lári' latsitte nu dacca' yáyì nna. Làniana bethel·la' tią ne lani Pilátua attu. ¹² Dèsdèba tsá lànìa nna yala amigo beyacca Pilátua lani Herodes. Antes nna bìtsa'a báni luetsi qui.

¹³ Pilátua nna gutaýi tią ca sacerdote principal nna canu rigú'ubi'á nna ą'hua ituba yétsiá nna ¹⁴ rą cą: Chi tahua' le nubéyu'ì ru'a lua' nna ra le qui'ni yala rigú'u tìtsa'ą ca enne' para chatha cą contra gobierno qui' rí'uì, pues iyaba chi gunába tìtsa' ya' ą ru'a lo le nna pero labí causa betselà te' qui'ì acerca de ca queja nu rutsia le còntri, ¹⁵ nìhua Herodes nna labí causa betseláni bi qui'ì, acca bethel·la' bi ą nì attu. Nubéyu'ì nna labí biyā delito

ni chi benia nu dacca' gattinia, ¹⁶ acca guni tí'cà'a ya' a castigar làniana gúlá' ya' a. ¹⁷ Anía ra Pilátua porqui'ni uccuá obligado qui'ni ttu ttu fiesta nna gúlá'a ttu preso nu inàba yétsiá. ¹⁸ Pero iyáỹiani cã guretsiyà'a cã ttu tiémpubá nna ra cã: Gatti bá nuá' nna bela' bá Barrabás nà'. ¹⁹ Barrabás nna tíã litsi' ìyyà porqui'ni gulanía canu gutíla alboroto le' yétsiá contra gobiérnuá nna betti cã ttu enne'. ²⁰ Gunèni Pilátua cã attu nna uccua latsi'í gúlá'a Jesús. ²¹ Pero làcã nna adila dìtsa guretsiyà'a cã nna ra cã: Betaá' a lo curutsi, betaá' a lo curutsi. ²² Pilátua nna bedenàba titsa' gáábã cã nu cca tsunna vuelta nna rã: Pues, biani mal ní chi beni nubéyu'í ni'i. Nidirubani ttu delito ni'i etsèla te' quí'í nu dacca' gattinia. Guni ba ya' a castigar tí'to', lànialá nna gúlá' ya' a. ²³ Pero làcã nna adila túléchùni gutsé'e cã gunne cã idìtsa nna gunàba cã qui'ni gutá' ca soldádua ne lo ttu yà curutsi. Canu yétsiá a'hua ca sacerdote principal nna beni ba cã seguir guretsiyà'a cã hàstaá qui'ni uccua tí' calatsi' qui. ²⁴ Làniana beni Pilato mandado qui'ni guthácca' cã Jesús tí'ba nu gunàba yétsiá. ²⁵ Bethà'na tíã libre nubeyu' nu té litsi' ìyyà nu gutíla ruíduá nna bèttiã enne', porqui'ni á' bá gunàba cã. Pero Jesús nna bete tíã ne cuenta làtsi' ná' ca enne' làa cca guyu cã néa.

²⁶ De chi dia cã che' cã ne nna, tattsa' cã ttu nubeyu' Cirenéo lã Simón, déda'a de lo tsina. Bet-sia tè cã curutsi qui' Jesús cùi'í para huá'níã na nna tanó tíã Jesús. ²⁷ Dia tè iyétse'ní ca enne' qui' ciudáad, entre làcã nna tse'e huá ttu te ca niula canu yala ribetsi cã nna rehuiní'ni cã por nu

ruthacca' cą Jesús. ²⁸ Bedèqquia tè lo Jesús gùnne'e ca niuláa nna rèe cą: Lebi'ì nu Jerusalén, bittu cuetsi le por inte' sino licuetsi la por la'a lebi'i ba nna por ca ÿi'ni le nna. ²⁹ Porqui'ni huì'yu tsá qui'ni ina cą: Ica'rubà ca niula ná huètsi, canu labí begátsi' huatsa nna. ³⁰ Por ca sufrimiento nu íl·lani nna, thulo ca enne' gatta'yúni cą ca i'ya nna ína cą: Liyinnia iqquia tu'. Gá huá cą ca i'yatò': Liucàtsi' tí' intu', ³¹ A' ná nu ccá lani ca enne' canchu chì' ridulo ba ca sufrimiéntuą', pero tì'a gani ccá la'té qui' quì después lá cá. ³² Guche' huá cą lani Jesús chuppa canu hueni delito nu dacca' qui'ni gatti cą. ³³ De bitsina' cą lani e làti láą Lugar Iqquia Bega' Yatti, nía nna gùda cą ne lo yà curútsia. Aníahuá gùda cą chuppa canu hueni maldad lo áchúppa ca curútsia. Bedu cą curutsi qui' ttuą lado ná' bànie, áttuą lado ná' yàttie. ³⁴ De rutá' cą Jesús lo curútsia nna, gùnne nna rèe: Tata Dios, beyuniyén latsi' cuią'lu' qui' quì, porqui'ni labí yù cą biyã nui runi cą. Làniana ca soldádua nna gùl·la'ání cą ca yúeá nna, bedàl·la cą rifa lo quì para gùlui'ą nuyã ca yúeá gal·la' ttu ttu tsa cą. ³⁵ Iyábani ca enne' yétsiá nna tsè'e cą rinna' cą. Canu rigú'ubia' le' yétsiá nna beni cą ne burla nna ra cą: Canu huaya' nna bedilà bą, pues gudilà la'a làbą canchu hualigani ną Cristo enne' becué' Tata Dios. ³⁶ A'hua ca soldádua nna beni huá cą ne burla, bitsina' cą nna bè' cą ne vinagre í'yèe, ³⁷ ra tè cą ne: Canchu hualigani ná lu' Rey qui' ca enne' judío nna, bedilà la'a lù'ba. ³⁸ Betá' tè cą ttu letrero yíqquie lani ca titsa' griego nna latín nna hebreo nna rą: NUI NUA' NÁ REY QUI' CA JUDÍO. ³⁹ Làniana ttu canu hueni delito tá'

nía nna, bedua dí' huá Jesús nna rą ne: Canchu hualigani ná lu' Cristo nna, bedilà la'a lù'ba nna tsa'tsela tehuá intu'. ⁴⁰ Attu nu tá' huá lo attu curútsia nna gutítsa'ą na nna rą: Tsí átsahuá lăa rátsini lu' juicio qui' Tata Dios de chi tá' huá lu' nà' para gatti lu', pues ⁴¹ ri'u nna hualigani cca bá ri'u merecer sufrimiento nu ritè ri'u anna porqui'ni chía ríya ri'u por ca mal nu chi beni ri'u. Pero ènni'ì nna labí biya mal benie. ⁴² Làniana ra tią Jesús: Exa tí' chì latsi' cuią'lu' inte' canchu chi ita cuią'lu' para cu'úbia' cuią'lu'. ⁴³ Jesús nna rèe na: Hualigani te' nia' lu' qui'ni anna taá chi du lu' lani inte' le' lugar de la' redacca' latsi' nna la'ýeni nna.

⁴⁴ De gùl·la' ttú tsì'nu hora ti'gá nna, bechul·la le' itúbani yétsiloyu hàstaá ritì tsunna. ⁴⁵ Bitsą' nna betua la'yani' qui'ì. Lári' rriani nu dàa le' templua nna biredà'ą nna uccua chuppa l-là'a. ⁴⁶ Gunne tè Jesús idítsani nna rèe: Tata Dios quia', làtsi' ná' cuią'lu' rucà'na' espíritu quia'. Beyacca ba rèe anía nna, gùttie. ⁴⁷ De bilá'ni capitán románua iyaba nu uccua nna, guduluą bedàlianią Tata Dios nna rą: Hualigani qui'ni nubéyu'ì nna labí biya mal benie. ⁴⁸ Iyaba ca enne' iyétse'ní tsè'e nía huia' nna bilá' huáni çağ iyaba nu uccua. Deyya tè çağ nna yala rue' losto' qui' porqui'ni yala sentir uccua çağ. ⁴⁹ Pero iyaba canu benibiá' çağ ne, ą'hua ca niula da' dèsdèba Galilea huíalatsi' qui' ne nna, idittu' gutsé'e çağ bilá'ni çağ iyaba ca cosa nu uccua.

⁵⁰ Gùdua ttu enne' lá bi José nu yetsi Arimatéa región qui' Judea. Làbi nna uccua bi ttu miembro lani Junta Suprema qui' ca enne' judíua. Yala enne' tsè' nna enne' de respeto nna uccua bi. ⁵¹ Joséa

nna hua yù hua bi qui'ni íl·lani reino qui' Tata Dios, acca labí de acuerdo gudu bi lani propósito qui' Júntaá ñihua lani ca hecho qui' caniá nna. ⁵² Huía bi ru'a lo Pilátua nna gunàba bi cuerpo qui' Jesús. ⁵³ Bechìda diba bi e nna betùbi bi e ttu sávana nna gutìxa tè bi e le' bà nu dua le' ttu iyyatò' làti lanú nuña nu yàttini chi guyú'u. ⁵⁴ Tsá lània nna runi prevenido qui' ca enne' para tsá ýeni ná qui'ni edí' latsi' quí, nu ridulo gùl·là viernes lània. ⁵⁵ Ca niula canu beni çà Jesús acompañar dèsdeba birie Galilea nna, huía huá çà nna bila'ni çà qui'ni chi gutta' cuerpo qui' Jesús le' bèlia nu gudua le' iyyatù'a. ⁵⁶ Beyéçquia tè çà nna beni çà preparar especias nna unguento nu rilàa' iýixí nna, para cuerpo qui'e. Làniana bedi' latsi' quí conforme tì'a ra lo mandamiento qui' Tata Dios.

24

¹ Dilatò'ni qui' tsá domíngua nna huía ca niuláa lo bàa. Làçà nna bià' çà ca unguento iýixi nu beni çà preparar. Huía huá átuchùppa ca niula lani çà. ² Bitsina' çà nna bilá'ni çà qui'ni íyya nu yáyani ru'a bàa nna, pues ttu lado la chi ri'á. ³ Gutà'a ba çà nna pero lanuru cuerpo qui' Señor Jesús té nía. ⁴ Acca yala nùyue uccuani çà lani la' rátsilatsi'. De repente taá nna gùdu chuppa ca nubeyu' cuitta' quí, uccua tìttini ýó cabi. ⁵ Ca niuláa nna yala gutsini çà nna bedètta' tè lo quí loyu. Ca ángeliá nna ra tè cabi çà: Biecca reyila le entre canu yatti enne' bàni cá, ⁶ lanúrue té ñì, pues chi beyáthee de lo lù'uti. Hua yù ba le biña gutixe'e loti' reniírue le' Galilea nna rèe: ⁷ Náduel·la' qui'ni Nubeyu' de Yiabara' nna gute çà ne cuenta làtsi' ná' canu tul·la' hàstaá qui'ni

gutti cã ne lo yà curútsia, pero tsùnnà ubitsa bitola nna eyáthee de lo lù'uti. ⁸ Làniana bexa latsi' ca niuláa ca titsa' nu gunne Jesús. ⁹ Bedà' tè cã lo bàa nna beyya cã huequixa'áni tsìnia ca discípuhá a'hua adí ca enne' iyaba ca così.

¹⁰ María enne' Magdala nna, a'hua Juana nna, a'hua attu María nàna qui' Jacóbua nna, a'hua adí ca niula nna gutixa'a cã ca così ru'a lo ca apóstol. ¹¹ Pero para làcabi nna puro cuento ba ná nu ra ca niuláa, acca labí huíalatsi' cabi nu ra canaá. ¹² Pero Pedrua nna huía tè bi quèthani lo bàa. Gunna' tè bi liú'u nna bilá'ni bi tsuá' teruba ca lári' nu betètsiní cabi Jesús. Bedà' tè bi nna yala belaba latsi' bi de nu uccua.

¹³ La'a mísmuba tsá lànìa nna, chuppa cabi nna deyya cabi ttu yetsi to' láa Emaús, ga'nã ttú tsunna legua ti'gá idittu' de Jerusalén. ¹⁴ Dia cabi lo neda rue' cabi titsa' qui' iyaba ca cosa nu chi uccua. ¹⁵ De rue' thuti cabi titsa' nna bitsina' tè la'a mísmuba Jesús nna dia tìe lani cabi. ¹⁶ Pero làcabi nna labí bedácca'ni cabi qui'ni Jesús bá enni'a rida' lani cabi. ¹⁷ Làniana rèe cabi: Biani titsa' ní nuã' rue' le de yù'u le néda, biecca yala rehuiní'ni le nì'i. ¹⁸ Becàbi ttu bi lá bi Cleofas nna ra bi e: Iyáỹiani ca enne' nna yù cã biỹa ná nu uccua le' Jerusalén nàya náthiá'. Tsí làteruba lu' nu huía nà' nna labí yù lu' nu uccua cá. ¹⁹ Làniana rèe cabi: Biani uccua. Làcabi nna ra cabi e: Pues acerca de Jesús enne' Nazaret enne' uccue profeta qui' Tata Dios lani la'huacca, tantua por ca hecho qui'e le' templua ru'a lo iyábani ca enne', a'hua por ca titsa' tsè'ni qui'e nna, ²⁰ pero ca sacerdote principal nna ca uxtíciã qui' tu'ã' nna bete cã ne cuenta hàstaá qui'ni

gulèqquia çà sentencia qui'e gattie nna, betaá' çà ne lo yà curútsia. ²¹ Atsi'íni intu' nna uccuani tu' qui'ni lèe nuá enne' ná qui'ni ìta gunie librar yetsi Israel. Pero anna lá cca tsunna ubitsa qui'ni gùttie lo curútsia nna bigàttsi' tìe. ²² A'hua yala uccuaýí latsi' tu' por nu ra tuchùppa ca niula canu huía huá latsi' qui' ne. Làçà nna huía çà ru'a bàa ántesca tsáni', ²³ pero núruhuá cuerpo qui' Jesús té nía, acca beyéqquia çà nna ra çà qui'ni bilá'ni çà ca ángel de ýiabara' nna ra cabi çà qui'ni Jesús nna beyacca bànie nna, ²⁴ huía tè tuchùppa ca compañero qui' tu' ru'a bàa nna bilá'ni cabi qui'ni hualibani ca niuláa nu ra çà, pero labí bilá'ni cabi Jesús. ²⁵ Làniana ra tè Jesús cabi: Lebi'i nu làa ritelíni. Yala bétsi cca le convencer para tsíalatsi' le iyaba nu gunne ca profeta, ²⁶ tsí álahua uccua duel·la' qui'ni Cristua nna quée padecer iyaba ca cosí ántesca etsine'e ýiabara' para thí'e la' dàliani nna quée enne' ýeni cá. ²⁷ Làniana bethàtsi là'nànie cabi iyaba ca Escritura nu riquixá'a acerca de lèe, dèsdeba ca libro nu bedia Moisés a'hua ca libro nu bedia iyaba ca profeta nna. ²⁸ Betsina' bá cabi yetsi Emaús. Jesús nna benie ti'atsi dia bée adí idittu'. ²⁹ Pero làcabi nna yala duel·la' beni cabi gutta'yúni cabi e nna ra cabi: Niba beyà'na cuiq'lu', porqui'ni chí' tegání ràl·là. Làniana gut'à tìe litsi' cabi. ³⁰ De chi re'níe lo méyaá lani cabi nna guýi'e ettaxtiláa nna gunàbèe bendición nna gùl·le'ée na nna bì'e cabi. ³¹ Làniana gutelíni cabi qui'ni Jesús bá enni'a. Pero lèe nna de repente taá bede'e ru'a lo cabi nna labiru bilá'ni cabi e. ³² Làniana ra tè luetsi cabi: Tsí álahua tì'a ttu yi' nu ràl·la' uccua titsa' qui'e lo losto' ri'u loti' gunènie ri'u de beyú'u ri'u nédaá nna gutixa'ánie

ri'u nu ra lo Escritura cá. ³³ Guduli tabá cabi nna beyéqquia cabi Jerusalén nna betseláni cabi tsìnia ca apóstol tsè'e cabi jùntubá, ą'hua adí ca enne' tsè'e lani cabi. ³⁴ Làcabi nna gutixa'a tè cabi qui'ni hualigani chi beyátha Señor de lo lù'uti nna bànie attu nna, ą'hua chi bilá'ni Simón ne. ³⁵ Làniana chuppa ca ènne'yu'a nna gutixa'a huá cabi iyaba nu uccua loti' deyú'u cabi néda para yetsi Emaús, ą'hua ti'iŷa modo bedácca'ni cabi e tiempo de gùl'le'ée ettaxtílaá nna.

³⁶ Atsaba rinne cabi nna, la'a mísmuba Jesús nna gùdue lahui' iyaba cabi nna benie cabi saludar nna rée: La'ŷeni para lo losto' le. ³⁷ Pero làcabi nna yala gùtsini cabi, belába latsi' cabi qui'ni bilá'ni cabi ttu nu tsayèlà. ³⁸ Pero lèe nna rée cabi: Bianicca rátsini le nna gùl'łani la' rudu chùppanią lo losto' le nì'i. ³⁹ Línna'áruhuá ca nàya' nna ca nì'a' nna, qui'ni la'a inte' ba nui. Liuláppa' nna línna' tsè', porqui'ni ttu espíritu nna labí yu'ą bèlá' nìhua tsítta nna, inte' nna entero cuerpu ba ná' tì'taání rilá'ni le inte' dua' nì. ⁴⁰ De rée anía nna, belue'nie cabi ca né'e nna ca nì'e nna. ⁴¹ Làcabi nna labí huía tè latsi' cabi por tanto la' redacca' latsi' canchu enni'a nua' Jesús. Lèe nna rée cabi: Tsí hua té tí' qui' le biŷa go ri'u. ⁴² Bete tè cabi ttu pedazo bél'la nàyi' qui'e ą'hua ttu etta ŷixi bédu nna. ⁴³ Guŷi' tìe ca nna bilá'ni cabi e gùtùe. ⁴⁴ Làniana ra tìe cabi: Chi gutixa'ánia' le loti' reniíruà' lani lía qui'ni uccua duel'la' ccá cumplir iyate nu ga'na escrito nu cca quia' lo ley qui' Moisés nna ą'hua nu ra lo ca libro nu bedia ca profeta nna libro láą Salmos nna. ⁴⁵ Làniana bethàtsie la' ritelíni qui' cabi para qui'ni telini cabi tsè' ca enseñanza nu ra lo ca Escríturaá acerca de

lèe nna, ⁴⁶ rèe cabi: A' bá ga'na escrito, qui'ni uccua duel·la' qui'ni Cristua nna quée padecer, pero bìtsa tsunna nna eyáthee de lo lu'uti nna, ⁴⁷ ná qui'ni ccá predicar lani nombre qui'e, dèsdeba Jerusalén hàstaá le' iyaba ca nación qui' yétsiloyu qui'ni eyacca ca enne' arrepentir nna eyuniyén latsi' Tata Dios ca tul·la' qui' qui. ⁴⁸ Lebi'ì nna chi bilá'ni le iyaba ca cosa nu uccua lani inte', para qui'ni cueqquia lí lé çà ru'a lo ca enne'. ⁴⁹ Inte' nna ithél·la'a' lani le nu chi beni Tata qui'a prometer qui'ni gúnnée qui' le, pero lebi'i nna ná qui'ni cueda ba le le' ciudad Jerusalén nì hàstaá qui'ni guni le recibir itute la'huacca de ÿiabara' nu gúnnée qui' le.

⁵⁰ Jesús nna benérue cabi lo néda para fuera ciudáad nna guda' cabi lani e hàstaá yetsi láa Betania. Nía nna guchìtha né'e ru'a lo cabi nna benie cabi bendecir. ⁵¹ Hua dàa càнна ba né'e runie cabi bendecir nna de repente taá bede'e ru'a lo cabi nna déyyeé ÿiabara'. ⁵² Làcabi nna bedu taá ÿibi qui' nna beni cabi e adorar. Làniana beyéqquia cabi Jerusalén nna yala bedacca' latsi' cabi. ⁵³ Tulidàba gùtse'e cabi le' templua bedàliani cabi Tata Dios.

A' uccua.

Ca titsa' de la'labani para iyate ca enne'
New Testament in Zapotec, Sierra de Juárez
(MX:zaa:Zapotec, Sierra de Juárez)

copyright © 1970 Wycliffe Bible Translators, Inc.

Language: Zapotec, Sierra de Juárez

Translation by: Wycliffe Bible Translators, Inc.

Zapoteco, Sierra de Juárez [zaa], Mexico

Copyright Information

© 1970, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Sierra de Juárez

© 1970, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

70388afd-12a8-5021-a72b-e063675664f5